

სიტყვები და წერილები  
ყოვლად სამღვდელთა  
ალექსანდრეზე

შეკრებილი და გამოცემული  
ზ. ჭიჭინაძისაგან

ამ წიგნს შესავალი უნდა მოხმარდეს ქართველ მაჰმადიანთა წიგნებს

თფილისი  
სტამბა „ნადეჟდა“ სემენოვის ქუჩა. № 4.

სიტყვები და წერილები  
ყოვლად სამღვდელთა  
ალექსანდრეზე

შეკრებილი და გამოცემული  
ზ. ჭიჭინაძისაგან

ამ წიგნს შესავალი უნდა მოხმარდეს ქართველ მაჰმადიანთა წიგნებს

თფილისი  
სტამბა „ნადეჟდა“ სემენოვის ქუჩა. № 4.



შოვლად სამღვდელო აღმსახდგი  
1822—1907

## † ყოვლად-სამღვდელო ალექსანდრე.

(1824-1907 წ.)

1907 წელს, 9 ნოემბერს, შიო-მღვიმის სავანეში, გარდაიცვალა ჩვენი „საზოგადოების“ წევრი, საქართველოს ეკლესიის მსჯოვანი მღვდელ-მთავარი, ყოვლად-სამღვდელო ალექსანდრე, რომელსაც არა მცირედი ღვაწლი მიუძღვის ჩვენი ერისა და ეკლესიის წინაშე,

ჯერ კიდევ სტუდენტობის უამს, ყაზანის სასულიერო აკადემიაშივე ეტყობოდა მომავალს მღვდელ-მთავარს, რომ უხვად იყო დაჭილდოვებული მოყვასის მიმართ მტკიცე სიყვარულით. როგორც ამ აკადემიის ისტორიის აღმწერი პროფესორი ზნამენსკი ამბობს, ერთს წელიწადს ქალაქ ყაზანში ხოლერა მძვინვარებდა, ბერ-დიაკონი სტუდენტი ალექსანდრე ოქროპირიძე, ორს სხვა თავის ამხანაგ რუსის სტუდენტთან ერთად, ავითმყოფთა მომვლელთ დასში ჩაენერა და უშიშარის თავ-გამეტებით ასრულებდა თავის მოვალეობას.

1850 წლებში მან დაამთავრა სასულიერო აკადემიის კურსი და დაბრუნდა თავის სამშობლოს სხვა-და-სხვა მხარეს: ქართლში, იმერეთში, გურია-სამეგრელოში და აფხაზეთში – ჯერ მასწავლებლად, შემდეგ ილუმენათ, არქიმანდრიტად და ბოლოს მღვდელ-მთავრად.

აფხაზეთში ის მოღვაწეობდა მკვიდრთა შორის ქრისტიანობის დასამყარებლად.

1862 წელს ხელ დასხმულ იქნა ეპისკოპოსად.

ორ გზის, 1869 - 1882 და 1886 - 1898 წლებში, სულ ოცდა ხუთ წელს, ყოვლად-სამღვდელო ალექსანდრე ასრულებდა გორის ეპისკოპოსის, ქართლ-კახეთის ეპარქიის პირველი ქორ-ეპისკოპოსის თანამდებობას.

1882-1885 წლებში იგი მართავდა გურიის ეპარქიას ხოლო 1898 წელს სინოდმა უბოძა გურია-სამეგრელოს ეპისკოპოსობა.

ყველგან მის მოღვაწეობას წინ უძლოდა მხურვალე სიყვარული მშობლიურ ეკლესიისა და სამშობლოს მიმართ. ამ სიყვარულით გამსჭვალული მღვდელ-მთავარი არ იყო მხოლოდ მონასტრის სავანეში კარ-ჩაკეტილი ცხოვრების მოტრფიალე. პირიქით, მას ცხოვრების მიზნათ ჰქონდა დასახული ფართო საზოგადოებრივი მოღვაწეობა, სარწმუნოების დიდმნიშვნელობის შეგნებით განათებული.

ყველას კარგად ახსოვს, თუ როგორს მარტივ ცხოვრებას წარმოადგენდა ყოვლად-სამღვდელო ალექსანდრეს კერძო ცხოვრება. საკუთრთათ თავის თავზე იგი ხარჯავდა სულ მცირეს, და მთელ თავის მონაგარს უმთავრესათ სწირავდა იმ სა-

ქმეს, რომელსაც, სხვათა შორის, ჩვენი ნორჩი „საზოგადოება“ ემსახურება, სახელდობრ: აახლებდა ჩვენი ძველი ხე-როთ-მოძღვრების დიდებულ ნაშთებს, თავისი საფასით აბეჭდინებდა ჩვენი ძველი მწერლობის საყურადღებო ნაწარმოებებს, ნოტებზედ აღებინებდა და ასტამბინებდა ქართული გალობის საუკეთესო ნიმუშებს და სხვ.

ყოვლად-სამღვდელო აღიქვანდრემ თავისი ქონების უდიდესი ნაწილი მოახმარა შიო-მღვიმის მონასტრის განახლებას: აღადგინა და ძვირფასი მხატვრობით შეამკო წმ. შიო მღვიმელის საფლავის ეკლესია და დავით-აღმაშენებლის მიერ აგებული დიდებული ტაძარი; მტკვრის პირას მონასტრის მამულში გააშენა ჩინებული ზვარი; ააშენა მონასტრის ძმათათვის საცხოვრებელი ბინები და, დასასრულ, დიდძალი თანხა უანდერძა მონასტერს მომავალში მის უზრუნველ-საყოფელად.

მანვე განაახლა ზედა-ძნისა, ჯვარისა და დავით გარეჯელის მონასტრები, რომელთაგან პირველს საკმაო თანხაც უანდერძა.

დიდ ყურადღებას იქცევდა განსვენებული მღვდელ-მთავარი ქართული მწერლობის ნაშთების გამოქვეყნებას. მან საკუთარი საფასით დაასტამბინა ჩვენი სიტყვიერების ძვირფასი საუნჯე „ქართული ლექსიკონი“ სულხან-საბა ორბელიანისა, აგრეთვე კათალიკოზის ანტონ პირველის „მზა-მეტყველება“, ამბროსი ნეკრესელის „სიტყვანი და მოძღვრებანი“, შიო მღვიმის მონასტრის ისტორიული საბუთები (სიგელ-გუჯრები და სხვანი. ამავე მიზნით (ძველი ხელ-ნაწერების გამოსაცემად) მან შესწირა საეკლესიო მუზეუმს 2200 მანეთი. ამ თანხით გამოიცა ათონის ხელნაწერის ტექსტი 1074 წლისა, ცხოვრებაჲ იოანესი, ეფთვუმესი.

ყოვლად-სამღვდელო აღიქვანდრე კარგად ხედავდა, რომ ჩვენი ძველი საეკლესიო გალობა თან-და-თან ეცემოდა და დავიწყებას ეძლეოდა ხალხში. ამიტომ იგი შეუდგა ამ გალობის შეკრებას და ნოტებზე გადაღებას, რაც მიანდო სპეციალისტ მიხ. იპოლიტოვ ივანოვს, რომლის მიერ ნოტებზე გადაღებული წირვის საგალობლები კიდევაც გამოსცა თავისი საფასით.

განსვენებული მღვდელ-მთავარი მოსარჩლეობას უწევდა ქართულ ენას, რომელიც მე-XIX საუკუნის მე-80 წლებამდის საქართველოს სასულიერო უწყების სასწავლებლებში ყოველ პატივს იყო მოკლებული და სავალდებულო საგნად არ ითვლებოდა პეტერბურგიდან ჩამოსულს სინოდის რევიზორებს ყოვლად სამღვდელო აღიქვანდრე ყოველთვის წარუდგენდა ხოლმე მოხსენებას ქართული ენის ასეთი უნუგეშო ყოფის შესახებ; და, ბოლოს, ეგზარხოსის იოანიკეს დროს, ქართული ენის და, ქართული გალობის მდგომარეობას საკმაო ყურადღება მიექცა: ორივე საგანი ქართველ მონაფეთათვის სა-

ვალდებულო საგნებად იქნა ცნობილი.

არა ნაკლები ღვაწლი მიუძღვის ყოვლად-სამღვდელო ალექსანდრეს სამეგრელოს სამრევლო სკოლებში ქართული ენის უფლების დაცვის საქმეში. როგორც ბევრს ეხსომება, დეკანოზის ვოსტორგოვის დროს, გაილაშქრეს აღნიშნულ სკოლებში ქართული ენის სწავლელების წინააღმდეგ. სიმართლის მოყვარე მღვდელ მთავარმა დაიცვა ამ მხარეში ქართული ენის ბუნებრივი უფლებანი... და დიდი ხანიც აღარ დარჩენილა ამას შემდეგ გურია სამეგრელოს ეპარქიაში... მან სამსახურს თავი დაანება და დაბინავდა შიო-მღვიმის საფანეში.

როგორც მქადაგებელს, ყოვლად-სამღვდელო ალექსანდრეს საზოგადოთ არ უყვარდა მოძღვრებაში მრავალ მეტყველებას: თუ იტყოდა რასმე, იტყოდა მოკლეთ და მკაფიოთ ისე კი რომ არავის წყენას არ დაერიდებოდა. ერთი ქართ. სამხედრო გვამი გარდაიცვალა, ყოვლად-სამღვდელო მიიწვიეს გასვენებაზე. მან ბრძანა: „განსვენებული დიდი შეძლების პატრონი იყო და დიდი სახელიც ჰქონდაო; მაგრამ ერთი-უბედურება სჭირდა: თავისი ქვეყნისა და მიწისაკენ მცირედ ეჭირა თვალი, ქართველთა გაჭირვებას ყურადღებას არ აქცევდაო“ სიტყვა თამამათ და უშიშრათ იყო თქმული, მერე ისეთი კაცის გარდაცვალებაზე, რომელიც ერთ დროს ხელს მწიფის მოადგილეთ იყო კავკასიაში...

განსვენებულ მღვდელ-მთავარს არ მოსწონდა სიტყვით მამულიშვილობა: მას უყვარდა თვალ-საჩინო, სასარგებლო საქმე. ივანე კერესელიძის დასათვლავებაზე აი რა ბრძანა ყოვლად-სამღვდელომ: „საკვირველია ქართველების საქმე: ცოცხალს მშიერს ვკლავთ და როცა მოკვდება, მაშინ კი ვგლოთობთ. დროა გავახილოთ თვალები, შევიგნოთ ჩვენი მოვალეობა, ვუშველოთ ჩვენს თავს და ჩვენს ერს საქმე ვუკეთოთ; მარტო წერა, ბეჭდვა და ლაპარაკი არ კმარა; ვისაც როგორც შეგეძლოსთ, საქმით ემსახურეთ ქვეყანას, თორემ დავიღუპებით, აღვიგვებით!“

ყოვლად-სამღვდელო კერძო ქველ-მოქმედებასაც ეწეოდა. მან დაარსა რამდენიმე სტიპენდია თბილისის სასულიერო სემინარიასა, საეპარქიო საქალო და სავაჟო სასულიერო სასწავლებლებში, რის მეოხებით არა ერთმა და ორმა ქართველმა ახალგაზდამ მიიღო განათლება.

თავის კერძო ცხოვრებაში ყოვლად-სამღვდელო ალექსანდრე წარმოადგენდა ჩვენის დროისათვის იშვიათს მაგალითს ღრმამორწმუნე ადამიანისას. მისი ხასიათის ძირითად თვისებასა და სამკაულს შეადგენდა სარწმუნოების დიდი მნიშვნელობის შეგნება. ამ თვალ-საზრისით შეხედა ყოვლად-სამღვდელოს ცხოვრებას ღრმამო-დაკვირვებულმა მგოსანმა ილია ჭავჭავაძემ, რომელმაც თავის სიტყვაში, მათის მეუფების 50 წლის მოღვაწეობის გამო, სხვათა შორის მოახსენა მას: სხვამ რაც უნდა

სთქვას, და ჩემის ფიქრით კი, კაცი ის არის, ვისაც გული-  
თადი რწმენა რისამე აქვს, ქვეყნის საკეთილდღეოთ მის მიერ  
აღსარებული, და იმ რწმენას ემსახურება თავ-დადებით. თქვენ  
გნამთ, რომ ადამიანის მხსნელი, მის ხელმძღვანელი და გამწმენ-  
ნდელი მისი სჯული და სარწმუნოებაა, და ამ გზაზე ღვანლ-  
მოსილობისათვის არა დაგიზოგიათ-რა... თქვენის ცხოვრე-  
ბის წმიდათა-წმიდად ორი დიდი საგანია: ერთი ღმერთი და  
მეორე თქვენი სამშობლო ქვეყანა: ღმერთს ღვთისას აძლევ-  
დით და ქვეყანას-ქვეყნისას, და ორსავე ემსახურებოდით ერ-  
თმანეთის დაუკლისათ, გულმხურვალებით და სიყვარულით;  
ერთი წუთიც არ ვიცით თქვენი სიცოცხლისა რომ ცხოველ-  
მყოფელი შუქი ამ ორკეცი სიყვარულისა არ მოჰყვნოდეს თვი-  
თვითეულს თქვენს საქმეს!“

ყოვლად სამღვდელო აღიქვანდრე განგებამ დღეგრძე-  
ლობითაც დააჯილდოვა: იგი გარდაიცვალა შობიდან 83  
წლისა.

დაუვიწყარი მღვდელ-მთავრის განსვენებას, 16 ნოემბერს  
1907 წელს. შიო-მღვიმის მონასტერში მრავალი ხალხი დაე-  
სწრო. აქვე იყვნენ სხვა-და-სხვა წოდებათ და დანესებულე-  
ბათა წარმომადგენელი: ქართლ-კახეთის, იმერეთის და გუ-  
რია სამეგრელოს ეპარქიათა სამღვდელოებისა, თბილისის  
გუბერნიის თავად-აზნაურობისა, წერა-კითხვის გამავრცელებე-  
ლი საზოგადოებისა, საქართველოს საისტორიო და საეთნო.  
გრაფიო საზოგადოებისა, თბილისის სასულიერო სემინარიისა,  
საეპარქიო საქალო სასწავლებლისა და სხვათ მიცვალებულის  
კუბოს წინ წარმოთქმულ იქნა მრავალი სიტყვა, რომელშიაც  
სიტყვის მთქმელი შეეხენ ვრელად სამღვდელოს მოღვა-  
წეობას საქართველოს ეკლესიის სასარგებლოთ. განსვენებუ-  
ლის გვამი დაკაღეს შიო-მღვიმის მონასტრის დადს საკ-  
რებულოს ტაძარში, რომელიც აღაშენა საქართველოს დიდე-  
ბულმა მეფემ დავით აღმაშენებელმა მე-XII საუკუნეში და  
განაახლა ამ რამდენისამე წლის წინათ, როგორც ზემოთ მო-  
ვიხსენეთ, ყოვლად-სამღვდელო აღიქვანდრემ.

„ძველი საქართველო“.

**სიტყვა.**  
**თქმული ალექსანდრე ეპისკოპოსის დასაფლავებაზე.**  
1907 წ.

საერთო მოვლენაა რომ ადამიანი ესალმება ამ წუთის სოფელს საზოგადოებისათვის შეუმჩნევლად, მას მხოლოდ უახლოებლესნი ნათესავნი და ნაცნობნი გამოიტირებენ, საფლავამდის მიაცილებენ და შემდეგ, ცოტა ხნის განმავლობაში და ისიც ხანდისხან, მოიგონებენ და მწუხარებით აღივსებიან. გამონაკლისს ამისთანა მოვლენათაგან შეადგენს მხოლოდ უუმცირესი რიცხვი ბედნიერ პირთა, სახელდობრ, იმ პირთა, რომელნიც ბუნებით უხვად დაჯილდოებულნი არიან სხვა და სხვა გვარი ნიჭითა, მოღვაწეობენ საზოგადოებრივ ასპარეზზე და ხალხისთვის სარგებლობა მოაქვთ. ამისთანა პირთა შორის ადგილი გიჭირავს შენც, ყოვლად უსამღვდელოესო ეპისკოპოსო ალექსანდრე! შენმა სიკვდილმა არა მარტო შენთა ხორციელთა მოყვასთა გულში გამოიწვია მწუხარება, არამედ ბევრი ქართველი დაალონა. ქართველი ერი შენ გაფასებდა, პატივს გცემდა; ფასს გდებდა იმიტომ, რომ მის წინაშე შრომა მიგიძღვის. შენ ხელს უწყობდი ხალხში ქართულ საღვთისმეტყველო მნიშვნელობის გავრცელებას; შენ აღადგინე და გაამშვენიერე ძველი მონასტრები და ტაძრები; შენ ეწეოდი ღარიბთა და ზრდიდი მოსწავლეთა! შენ მიეც ქართველ ერს მღვდელ-მთავარი, სულით და გულით ქართველი; შენ გვიჩვენე მაგალითი მაღალ ზნეობრივ ცხოვრებისა; შენ გვასწავლე, რომ ადამიანი მიუხედავად თვის უმაღლესი და ბრწყინვალე საზოგადოებრივ მდგომარეობისა, სადათ, მარტივად უნდა ცხოვრობდეს. როცა შენ იყავ გურია-სამეგრელოს ეპარქიის მმართველი და მე ახალსენაკში სასულიერო სასწავლებელში ვმსახურებდი მღვდელ მონაზონის ხარისხითა, როცა შენ სენაკში მოხვიდოდი, გაჩერებას ჩემს მოუწყობელ და ცივს ოთახში ამჯობინებდი, თუმცა ბევრი კარგი ოჯახის პატრონები გთხოვდნენ მათთან მისვლასა; ბერი ბერთან უნდა მივიდესო, – იტყოდი ხოლმე შენა. ბევრნი უგუნურნი შენს უბრალო ცხოვრებას აწერდნენ შენს ვითომც და სიძუნწეს. სანყლები რა რიგ სცდებოდნენ! განა ძუნწი ეწოდება იმ კაცს, რომელმაც თვისი შეძლება მოახმარა ქვრივ-ობლებსა, მონასტრებსა, და მნიშვნელობას? აი ეს მონასტერი, ეს ტაძარი ღაღადებს, თუ როგორი ძუნწი იყავი შენა. ნეტავი შენისთანა ძუნწი ათიოდე იყვეს ჩვენში!

ყოვლად უსამღვდელოესო! გვრწამს, რომ ღმერთმა შენ საუკუნო ბედნიერი ცხოვრება მოგავო. შენ სდგეხარ წინაშე



ღვთისა და მის ნეტარებას სჭვრეტ. დარწმუნებულნი ვართ, რომ შენ ქართველ ერს ხშირად მოიგონებ და შესთხოვ უფალსა, რომ განამტკიცოს მასში სიყვარული, ძმობა, ერთობა, დაამყაროს მასში მშვიდობა, და წარუმართოს მას განათლებაში.

### ალავერდის ეპისკოპოსი დავითი.

---

#### სიტყვა.

#### თქმული, არქიმანდრიტ ამბროსის.

„ეგრეთ ჰბრწყინებდინ ნათელი თქუქნი წინაშე კაცთა, რათა იხილნენ საქმენი თქუქნი კეთილნი და აღიდებდენ მამასა თქუქნსა ზეცათასა“ (მათეს სახ. თ. 5, 16)

ესეც კიდევ ერთი მსხვერპლი ამ მოკლე დროში. გაუმაძღარ და შეუბრალებელ სიკვდილმა საქართველოს მოსტაცა ყოვლად სამღვდელო ალექსანდრე. თუმცა კაცი ღვთისაგან დანესებულ ბუნების კანონს ვერ გადაუვა და ყოვლად სამღვდელო ალექსანდრემ კიდევაც გადააცილა თვისის ხანგრძლივ სიცოცხლით იმ ზომას, რომელიც დადებულია რჩეულთათვის (ფსალმ. 89,10), მაგრამ ამ ნაირ ზეგარდმო მადლით ცხებულ ადამიანთა მიცვალებას კაცის გული მაინც ვერ ურიგდება. მას უნდა ყოველთვის ჰყავდეს იგი სამშობლო მხარის ნუგეშად.

ყოვლად სამღვდელო ალექსანდრეს თავდადებული მოღვაწეობა მშობლიურ ეკლესიის და სამშობლო მხარის აღორძინებისათვის უდიდესი მისაბაძი მაგალითია ჩვენ ქართველთათვის, მისი სხივოსანი სათნოებანი სახე მუდმივი საუკეთესო გზის მაჩვენებელია.

„ეგრეთ ბრწყინავდიან ნათელი თქვენნი წინაშე კაცთა, რათა იხილნენ საქმენი თქვენნი კეთილნი და აღიდებდნენ მამასა თქვენსა ზეცათასა“-ო, გვიბრძანებს ქრისტეს წმიდა მოძღვრება და გვითითებს ამ დიდებულ ცხედარზე, – განსვენებულის ხანგრძლივ, სათნოებიან და სახელოვან მოღვაწეობაზე.

რომელი ერთი განსვენებულის სათნოებით სავსე ხანგრძლივ, ნამდვილი ქრისტიანული ცხოვრების მხარეს უნდა მივაქციოთ ყურადღება?! ჩვენ არ ძალ-გვიძს ამ მოკლე

სიტყვაში სავსებით დავახასიათოთ მისი ღირს-ალსანიშნავი ცხოვრების ყველა მხარეები, ამისათვის საჭიროა მეტი დრო და მეტი ნიჭი და მჭევრმეტყველება.

განსვენებულმა ყოვლად სამღვდელთა გვასწავლა ჩვენ, რამდენათ შეიძლება ამ უკუღმართ დროშიაც ვიყოთ ნამდვილი ქრისტიანნი, – ქრისტიანული იდეალების მატარებელი, როგორც მატარებელი ჭეშმარიტი ქრისტიანული სიყვარულისა, – იმ სიყვარულისა, რომელიც ყველას ერთ რიგათ უნდა ეფინებოდეს, – არ არჩევდეს ახლობელს არა ახლობელისაგან, – რომელიც უნდა ავინყებინებდეს პირად ინტერესებს და აბედინებდეს სიცოცხლის შენირვას მოყვასისათვის, – როგორც მატარებელი ამნაირი სიყვარულისა, ის თვისის ცხოვრებით გვიტყობს, რომ ეს ქრისტესაგან მის მიმდევართათვის დახატული იდეალი ამ ქვეყნად შესაძლებელია განხორციელდეს. ჯერ ისევ სტუდენტობის დროს, როდესაც ყაზანის მხარეში ხოლერა მძვინვარებდა, განსვენებული უშიშრად და თავგანწირულად ემსახურებოდა ამ საშინელი სენით შეპყრობილთ განურჩევლად მათი ჩამომავლობისა და სარწმუნოებისა. მისი თავგანწირულობა მოძმეთათვის, მისი მოურიდებლობა ამ საშინელ და მეტადრე მაშინ თავზარ-დამცემ სენისა აცვიფრებდა ყველას, რაც ხაზგასმით აღნიშნულია თვით ყაზანის აკადემიის ისტორიაში. ეს ერთი ფაქტიც მშვენიერად ახასიათებს ყოვლად სამღვდელთა ალექსანდრეს ქრისტიანულს ცხოვრებას. ასეთივე დარჩა განსვენებული უკანასკნელ წუთამდის. ის თავის ხანგრძლივ ცხოვრებაში ამ ქვეყნად მრავალფერად ასრულებდა ამ დიად მცნებას, – მცნებას მოძმეთა სიყვარულისას.

მისი ქველმოქმედება, მისგან აღდგენილნი ქართველთა კულტურის მაჩვენებელი ნაშთები, მისგან გამოცემული საღვთისმეტყველო და სამეცნიერო ჩვენ წინაპართა ნაწარმოებნი, მისის საფასით აღდგენილნი, მშობლიური გალობა, მისი შრომა და სიქველე მამულის შვილთა აღზრდაში, – ბერობის აღდგენა-გაძლიერებისათვის ზრუნვაში და მრავალი სხვა მისი ამნაირი ღვაწლი ყველასაგან ცნობილია. მისი ღრმა სარწმუნოება ცხოვრებაში განხორციელებული, სიყვარული სამშობლო ქვეყნისა თვით მისი ქრისტიანულ სარწმუნოებასთან მჭიდროდ შეკავშირებული, – მისი პირუთვნელობა, უშიშრობა ამ სოფლის უფალთა და ძლიერთა მხილებაში და მრავალი სხვა მისი სათნოებიანი სულის თვისებანი ხდიდა მას ნამდვილ წარმოდგენელად იმ ძველი ჩვენი წმ. მამათა, რომელთა მრავალმხრივმა ღვაწლმა დაიცვა ჩვენი სარწმუნოება, ენა და ეროვნება მოზვავებულ-აუარებელი მტერთაგან. ყველა ამაებზე უკვე ბევრი თქმულა და დანერგა და მეც აქ არას ვიტყვი.

ვიტყვი ორიოდ სიტყვას მხოლოდ იმაზე, რაც აქ არ თქმულა, – განსვენებულის მოციქულებრივ მოღვაწეობაზე

აფხაზეთში. ღმერთმა პირველ ხანებში მას არგუნა სამსახური და მოღვაწეობა ამ საქართველოს განაპირა მხარეში ჯერ როგორც აფხაზთა შვილების აღმზრდელს, შემდეგ როგორც მისიონერ-მქადაგებელს და ბოლოს როგორც მწყემსთ-მთავარს. ის მუდამ თავგანწირულად ემსახურებოდა აფხაზთა მოქცევის საქმეს, – არ ზოგავდა საკუთარ საშვალეებს შკოლათ დაარსებისათვის, – თავის ხარჯით ზრდიდა აფხაზთა შვილებს და ამზადებდა მათ მღვდლობის ხარისხში სამოღვაწეოდ, – მედგრად იცავდა სამღვდლოების და სამწყსოს ინტერესებს, უხვად ეწეოდა ქვრივ-ობოლთა, მის და სამწყსოს შორის არსებობდა მამაშვილური კავშირი, დაფუძნებული ჭეშმარიტ ქრისტიანულ სიყვარულზე. მას არ უყვარდა მდიდრული ცხოვრება, სცხოვრობდა თითქმის ეგრეთვე სადათ, როგორც ერთი უკანასკნელი ღარიბი მის სამწყსოთაგანი. ეს სადა ცხოვრება, ეს ხალხთან სიახლოვე ხდიდა მას ნამდვილ ძველ მშობლიურ ეკლესიის მწყემსთ-მთავართა მსგავსად.

მოვიყვან ერთს მგალითს იმისას, თუ რანაირი გავლენა აქონდა განსვენებულის ამნაირ ცხოვრებას ხალხზედ, რა ნაირი უბოძო ნდობა აქონდა დამსახურებული თვით მაჰმადიან აფხაზთა შორის. 1866 წლის ამბოხების ჩაქრობის შემდეგ აფხაზების უმრავლესობა იძულებული გახდა გადასახლებულიყო ოსმალეთში.

ამ უბედურ დროს, როცა აფხაზთათვის ყველა ქრისტიანის სახელის მატარებელი საზიზღარი იყო, მხოლოდ ყოველად სამღვდლო აღუქსანდრეს აქონდა აფხაზებთან კავშირი, მხოლოდ მას უზიარებდნენ თავიანთ ჭირ-ვარამს, მას ენდობოდნენ.

აი, ამ ხანებში მწყემსთ-მთავართან შემოდის ერთი მაჰმადიანი აფხაზი, სახელად ურუსი, თავისის თორმეტი წლის შვილით. როდესაც ყოველად სამღვდლომ ჩვეულებრივი აღესიანი კილოთი ჰკითხა ურუსს მოსვლის მიზეზი, უკანასკნელმა მოახსენა შემდეგი: „შენთან მოვედი, კეთილო მწყემსო და მამაო! მე სამუდამოდ ვეთხოვები სამშობლოს, მივდივარ ოსმალეთში საცხოვრებლად და ჩემი ვაჟი უნდა დავსტოვო შენთან. მეტი არა გამაჩნია რა, ცოლი და სხვა შვილები ადრე დავეკარგე. არ ვიცი რა მომელის უცხო მხარეში, მაგრამ მინც ვსტოვებ ჩემს საყვარელ სამშობლოს. არ მინდა ჩემი უბედურება გავუზიარო ჩემს ერთად-ერთ შვილს და შენთან მოვიყვანე, მოწყალეო მამაო, ვიცი მიიღებ, აღზრდი ქრისტიანულად და იქნება ბედნიერი“-ო.

თვალ-ცრემლიანი მამა გამოეთხოვა საყვარელ შვილს, რომელიც განსვენებულის მეოხებითა და საფასით აღიზარდა და მღვდლოებაში დიდი სარგებლობა მოუტანა ქრისტიანობას აფხაზეთში.

ამ ფაქტს განმარტება არ სჭირია. ამნაირ განწყობილობას სამწყსოსთან დიდი ნაყოფი მოჰქონდა. იწყეს აფხაზთა

ქრისტიანობის მიღება, რომელიც კიდევ დამთავრდა თითქმის 80-იან წლებში ნეტარ ხსენებული აფხაზეთის მეორე მოციქულის დროს. ამის შემდეგ განვლო საკმარისმა დრომ. ქრისტიანული საქმე პროგრესულად დენის ნაცვლად რეგრესიულად მიმდინარეობს. უკანასკნელი ცნობებით, რამდენიმე სოფელმა უკვე უარყო ქრისტიანობა. მიზეზი ცხადია: არ არიან ალექსანდრე-გაბრიელისებრი მოციქულნი.

ნეტარ-ხსენებულო მწყემსო-მთავარო, სხვა შენი მრავალ მხრივ ღვაწლთან ერთად ამასაც არ დაივინყებს ქართველი ერი, აფხაზეთის ქრისტიანი ნაწილი და იქაური სამღვდელლოება.

განისვენე, ქართველთა მამაო და კეთილო მწყემსთმთავარო, ზეგარდმო მადლით ცხებულო მოღვაწე, აღმაშენებლად წოდებულო, – განისვენე ამ შენგან განახლებულ-გამშვენებულ ტაძარში. ეს წმ. ტაძარი იქნება საუკუნო შენგანვე შემნილი ნივთიერი ძეგლი შენს საფლავზე და ყოველ ქართველის გულში კი გედგმება სამუდამო უხილავი ძეგლი.

ილოცე, ჩვენო ახალო ღვთის წინაშე შუამდგომელო, – ილოცე სხვა ჩვენ წმ. მამებთან ერთად სამშობლო მხარის ქრისტიანულად და კულტურულად აღყვავებისათვის. ამინ.

**არქიმანდრიტი ამბროსი.**

---

**სიტყვა.**

**თქმული ყოვლად-სამღვდლო ალექსანდრეს დასაფლავებაზე.**

**დიდებული მწყემსო-მთავარო!**

დიდი ხანი არ გასულა მას შემდეგ, რაც უკანასკნელად გინახულე მე შენ ამ, შენგან გამშვენებულ და აყვავებულ, მონასტერში, რომლის ხავს-მოკიდებული კედლები უნებლიეთ მაგონებდა სახელოვან წარსულს ჩვენის, ან დაკნინებულ, ეკლესიისას, იმ ეკლესიისას, რომლის სამსახურს შესწირე შენ შენი ხანგრძლივი სიცოცხლე. მაშინ შენთან ერთად ვიგონებდი ღვაწლსა და მოქალაქეობას ჩვენთან ძველი დროის მწყემსო-მთავართა, ეხლა კი, სამი თვის შემდეგ, მოვსულვარ აქ, რათა ამ მღვიმე-მადაროებთან ერთად ვიგლოვო ჩასვენება იმ ცხოველ-მყოფელ ვარსკვლავისა, რომელიც ნახევარ

საუკუნის განმავლობაში არა თუ ოდენ ანათებდა, არამედ ყველას და ყველაფერს ანათლებდა.

დიახ, მეუფეო, შენ მთელი ორმოცდა ათი წლის განმავლობაში ანათლებდი ქრისტიანობრივ სწავლა-მოდღვრებით შენს მშობლიურ ერსა და ეკლესიას. მონატრულმა, ჯვარმტვირთველმა საქართველომ მეცხრამეტე საუკუნის დამდეგს თითქოს დასტოვა ძველთაგან ნაანდერძევი გზა და ანაზღვეულათ პირი იცვალა. სარწმუნოებრივ შემოქმედებითი გრძობა და ნიჭი, რომლითაც ცხოველ იყო და ძლიერ იგი ძველად, შესამჩნევად შესუსტდა. რიცხვი იმ განათლებულ სამღვდელთა პირთა, რომელნიც სათავეში უდგენ ძველად ქართულ განათლებას და ქმნიდენ ქართულ კულტურას, შემცირდა, თითქოს მოისპო. მონასტერი აღარავის იზიდავდა, რის გამო ის დაცალიერდა და შესანიშნავ ეკლესიებთან ერთად ნანგრევებათ იქცა. სწორეთ ამ დროს გამოდი შენ საშობლო ყანაში სამუშაოდ, მხნედაც შეუდექი საქმეს.

შენ იყავი პირველი, მაღალი სწავლით აღჭურვილი, ქართველი, რომელმაც ბერობის მძიმე უღელი იტვირთე, რომ მით გაგეადვილებინა თავის თავისთვის სამსახური მშობლიურ განათლებისათვის. ჯერ სწავლის დასრულების შემდეგ, შენ თვითონ, პირადათ, ჩაუდექი სათავეში ახალგაზრდობის სწავლა-განათლების საქმეს, – ამას დაამოწმებს აფხაზეთი, ქუთაისი და სხვა კუთხეც ჩვენი ქვეყნისა, ხოლო როდესაც მიწვეულ იქმენ საეკლესიო იერარქიის უმაღლეს ხარისხზე, ამ საქმეს ემსახურებოდი მას შემდეგ მატერიალურად, მრავალ-გვარ და ისე შეწირულებით სხვა და სხვა სამოსწავლო დაწესებულებაში. მუდამ დაუღალავი, პრაქტიკულ საქმიანობით შებოჭილი, შენ არ ეკუთვნოდი მღვდელთ-მთავართა იმ ჯგუფს, რომელთაც თავიანთი კაბინეტურ ნაწარმოებით და ქადაგებათა კრებულებით სურთ ემსახურონ სამწყსოს, თუმცა ამ მხრივაც არ დაგიზოგავს ძალ-ღონე გამოგექვეყნებია და გაგეცნო მკითხველი საზოგადოებისთვის საუკეთესო საერო და სასულიერო ნაწარმოებნი ჩვენ დიდებულ წინაპართა. გარდა ამისა შენ კარგად გქონდა შეგნებული, რომ ჩვენ სწავლა-განათლებას ძველად ქმნიდა განსაკუთრებით ორი უმთავრესი ფაქტორი: მონასტრებში ბერობა და სოფლად კი დედა, ეს ოჯახის კერა, რომელიც წერა-კითხვის ნაკვერჩხალს გაუქრობელად იცავდა და გადასცემდა შვილთა და შვილის-შვილთა, ამისთვის პირველ ყოვლისა შენ განსაკუთრებითი ყურადღება მიაქციე ჩვენში ბერობის მიძინებულ სულის გაცხოველებას და, მართლაც, შენი მაგალითის მიბაძვით არა ერთი და ორი ღვთის-მოსაუვი, სწავლითა და ცოდნით აღჭურვილი ბერი და მონაზონი შეეძინა საქართველოს. შენ დარწმუნებული იყავი, რომ, როგორც თევზი ვერ მომრავლდება უწყლოთ, ისე ბერობა უმონასტროთ, ამისთვის

გულ-მოდგინეთ მიყავი ხელი ძველ ეკლესიას და მონასტერ-  
ლაურათა განახლებას და ბევრგან, სადაც წინეთ ყვაუ-ბუთა  
ჩხავილი ისმოდა, დღეს ატკობს ყურს მომხიბლავი ხმა ქარ-  
თულ საეკლესიო გალობისა, რომელიც შენი მეოხებით და  
საშვალებით გადარჩა დავიწყებას, განახლდა და დაიბეჭდა.  
რაც შეეხება დედათა მნიშვნელობას სწავლა-განათლების  
წინ-წაწევაში, შენ ეს აღნიშნე სამოციან წლებში, როდესაც  
თავი წამოყო ჩვენში სასულიერო წოდების ქალთათვის სა-  
კუთარ სასწავლებლის დაარსების საკითხმა. ამ საკითხის აღ-  
ძვრაში და განხორციელებაში შენ მიგიძღვის უპირველესი  
ღვანლი. შენის დახმარებით და მეცადინეობით. 1878 წელს  
თბილისში დაარსდა ისეთი დაწესებულება, რომელმაც დღე-  
ვანდელ დღემდე გამოუშვა რამოდენიმე ათასი განათლებუ-  
ლი ქალი და სადაც შენი უხვი შეწირულების მეო-  
ხებით არა ერთი და ორი უმწეო და ობოლი გაზრდილა: მე  
მაქვს სახეში თბილისის ეპარქიალური საქალებო სასწავლე-  
ბელი, რომელმაც დღეს გამომგზავნა მე აქ, რათა თაყვანი  
ვსცე შენს გაცივებულ გვამს და გთხოვო ევედრო უფალსა  
და ყოვლად-წმიდა ღვთის-მშობელს მის წარმატება და აყვა-  
ვებისათვის.

ასეთი ღვანლი მიგიძღვის შენ, მეუფეო, წმიდაო, სამშობლოს  
წინაშე, რომლის კეთილ-დღეობისათვის შენ, როგორც გით-  
ხრა ერთხელ ჩვენმა ან განსვენებულმა მგოსანმა, „გშიოდა  
და არ სჭამდი, გწყუროდა და არ სვამდი, გციოდა და არ  
თბებოდი“. აი, ასეთი გულ-შემატკივარი მამა უნდა დათა-  
როს დღეს ჩვენგან შავმა მიწამ, ვითარცა ერთხელ ღრუბელ-  
მა წინასწარმეტყველი ილია თვალთაგან ელისესათა; ჩვენ მე-  
ტი არა დაგვრჩენია რა, რომ ელისაებრ მუხლ-მოდრეკით  
შემოგტიროთ, გვამო პატიოსანო: „მამაო, მამაო, ეტლო  
ივერიისა და მხედარო მისო“, გარდამოგვიგდე ხალენი შენი,  
რომ მან დაამკვიდროს ჩვენში და განამტკიცოს სული სიმ-  
შვიდისა, ქველობისა, უანგარობისა და სამშობლოსადმი სი-  
ყვარულისა, რომელითაც გამჭვალულ იყავი შენ ამ ქვეყნად.

**ღეკ. კ. კეკელიძე.**

**სიტყვა:**  
**დეკანოზ ნ. თალაკვაძისა.**

ჩვენს ლაჟვარდოვან სამშობლო ცას ზედი-ზედ სწყდებოდა და ისტორიის უსაზღვრო სივრცეში ცვივა წარსულ საუკუნის მისი მნათობნი, ქართველ ერის ჭირისუფალნი, მომვლელ-პატრონნი...

ჩვენმა სამშობლომ მეცხრამეტე საუკუნის დასაწყისიდან პოლიტიკურ-საზოგადოებრივ ცხოვრების ახალ პირობებში ჩასდგა ფეხი. ჩვენი ქვეყნის ბედ-იღბალი, მისი მართვა გამგეობა ერთ მორწმუნე რუსეთის ხელში გადავიდა; გარნა ახალმა მთავრობამ, მზრუნველებმა თავისებურად შეხედეს თვის მისსიას საქართველოში და ამიტომ იწყეს ჩვენი ქვეყნის წეს-წყობილების თავიანთ გემოზე გარდაქმნა, ჩვენი ერის სულის განწყობილების, მის ათასი წლობით შემუშავებულ კულტურის რუსულ დარიჯაკში ჩამოყალიბება, ყველგან და ყველაფერში ჩამოერთვა ჩვენს ერს ინიციატივა, შესწყდა მისი შემოქმედებითი ნიჭის თავისუფალი ვარჯიშობა. ჩვენმა ერმა ისტორიულად მიიძინა; გარნა ეს ძილი, თუ ის ხანგრძლივ – საღათას ძილად გარდაიქცეოდა, უქადა ჩვენს ერს ეროვნულ სიკვდილს, ეროვნულ გადაშენებას.

მაგრამ, არა, – ქარაველმა ერმა, იმავე მეცხრამეტე საუკუნის განმავლობაში შესძლო წამოეყენებია მთელი წყება, მთელი რიგი თვის ან სასიქადულო შვილთა, რომელნიც არ დაიბნენ სამშობლო ისტორიის ახალ ხანაში; მათ კარგათ შეიგნეს და ერსაც შეაგნებინეს, რომ საქართველომ მოსჭამა გმირობის ხანა, როდესაც ის ხმლით ხელში განუწყვეტლივ იგერიებდა ყოველ მხრიდან შემოსეულ ურიცხვ მტერს და დადგა ხანა კულტურულ ბრძოლისა; ამ ბრძოლისათვის ანგარიშის გასანგევად კი საჭიროა სხვა იარაღი, – იარაღი მეცნიერებისა – სწავლა – აღზრდა – განათლება; საჭიროა ამ იარაღით ისე აღიჭურვოს ქართველი ერი, როგორც ის წინეთ თავით ფეხებამდის იყო ჩამჭდარი ხმალ-დამბაჩა თუარ-ჩაჩქანში და მტერს მეხივით თავს ეცემოდა...

ქართველ ერით ასეთ ქადაგთა, ქართველ ერის თვითცნობიერებაში მომყვანთა გუნდს ეკუთნოდა ან განსვენებულის ყ~დ სამღვდელო ალექსანდრეც. – საქართველოს ჰყავდა მეფე დავით აღმაშენებელი, იმავე საქართველოს დაბეჩავებულ ეკკლესიას ან ჰყავს მღვდელმთავარი ალექსანდრე – აღმაშენებელ განმაახლებელი! აფხაზეთიდან დაწყებული ჩვენს სამშობლოში არ არის ისეთი ცოტად-თუ ბევრად ჩვენს ისტორიაში ცნობილი საყდარ-მონასტრები, რომელთა აღშენება-განახლებისთვის არ მიექცოთ განსვენებულს ჯეროვანი ყუ-

რადღება და უხვი შეწირულებით არ გაემშვენებოდა და არ გადაერჩინოს განადგურებისაგან. აი თვით ათცამეტ სირიელ მამათაგანის ღირსი შიოს სავანე, სადაც განსვენებულმა უკანასკნელად აღმოიფხვინვა და ჩააბარა თვისი სული მაცხოვარს, – ეს გამშვენებულ-აღდგენილი სავანე – ყდ უსამღვდელოესი ალექსანდრეს უხვი შეწირულების, მამობრივი მზრუნველობის ნაყოფია!

მოვიგონოთ ყდ სამღვდელოს საფასით განახლებულნი ზედა-ზნის მონასტერი, ჯვარის ეკკლესია მცხეთაში, დავით გარეჯის მინასტერი, თვით მცხეთის ათ-თორმეტ მოციქულთა დიდი ტაძარი, რომლის განახლებას მან ჩაუყარა საძირკველი თვისის უხვი შეწირულებით. მოვიგონოთ ის შეწირულებაც, რომელიც ამ ცოტა ხანში გადასდო განსვენებულმა ქართველთა პირველ ქრისტიან მეფე მირიანისთვის ძეგლის ასაგებათ და მრავალი სხვა.

არა ნაკლებ ყურადღებას აქცევდა განსვენებული ქართულ მწერლობის ძველ ხელთნაწერ ნაწარმოებთა დაბეჭდვა-გამოცემას, რომელსაც მოახმარა დიდ-ძალი საფასი და მით კეთილი მაგალითი მისცა სხვა ქველ მომქმედთ – განაგრძონ ეს კულტურული საქმე განსვენებულისა.

მოვიგონოთ მოსწავლე ახალგაზრდობაზე ზრუნვა განსვენებულისა, მას რამდენიმე სტიპენდია აქვს დაარსებული სასულიერო სასწავლებელში, სემინარიაში თუ დედათა ეპარქიალურ სასწავლებელში; რამდენ ღარიბ მოწათვისთვის შეუმსუბუქებია განსვენებულს სწავლა-განათლების მიღება!..

ქველ მოქმედებითი სიუხვე განსვენებულისა ფრიად საგულისხმოა და შთამომავლობისათვის მისაბაძი. იმისი უბრალო, და ჭეშმარიტი ბერული ცხოვრება, იშვიათი მოვლენა-ლაა ჩვენს ფუფუნების დროში: თვითონ ეძლეოდა მოთმინებას, მარხულობას, ხარჯავდა თავის-თავზე სულ ცოტას, რომ რაც შეიძლება მეტი საქველ-მოქმედო საქმე შეესრულებია.

ჩვენთვის, განსვენებული ყდ უსამღვდელოესი ალექსანდრე მეცხრამეტე საუკუნის ცოცხალ მატთანეს წარმოადგენდა, – დაიბადა რა წარსულ საუკუნის თითქმის დასაწყისში განსვენებულმა მხნედ გადმოლახა მეოცე საუკუნის პირველი წლები; – ის მონამე გახდა უკანასკნელი წლების მძლავრ მოძრაობისა მთელს იმპერიაში; იმან თავისი თვალით დაინახა, რომ ქართველი ერიც არ ჩამორჩენია ქვეყნიერებას, მას მრავალ ფერი და მრავალ-შინაარსიანი განვითარება მიუღია, რომ ისიც მძლავრად ჩაბმულა კაცობრიობის წინ სვლის ფერხულში თვისის საკუთარი ღირსებით და ნაკულულოვანებით...

განსვენებული თვისის ხანგრძლივ სიცოცხლის განმავლობაში მონამე იყო ივერიის ეკკლესიის დაქვეითებისა, დამცირებისა, ივერიის მწყემს-ცხოვართა ერთმანეთზე დაშორებისა, რასაც შედეგათ მოჰყვა ქართველ ერის სარწმუნოებრივი განელ-თბი-



ლება. შიგა და შიგ სარწმუნოებრივი გავერანებაც. – ხედვიდა ყოველივე ამას განსვენებული, გული უკვდებოდა – ემდურებოდა, მაგრამ უღონო იყო შებრძოლებოდა რკინის ჯაჭვებით შებოჭილ მდგომარეობას. – სწორედ იმ დროში, როდესაც განსვენებულს მწყემს მთავრული მოღვაწეობების მხნე სამსახური შეეძლო, ის სასულიერო მთავრობას ქორ-ეპისკოპოზად ჰყავდა სიონის ტაძრის ეზოში დაყენებული, მას არავითარი უფლება არ ჰქონდა ჩვენი ერის სარწმუნოებრივ ცხოვრებაში აქტიურათ ჩარეოდა, თუმცა, სადაც კი ხელი მიუწვდებოდა, თამამად და მოურიდებლად ამხილებდა და ჰგმობდა ყოველივე ცუდ მხარეს ჩვენის ცხოვრებისას; ის ასეთ შემთხვევაში, მოციქულ პავლეს მცნებისამებრ, არ დაგიდევდა არც დროს, არც ადგილს, არც ძლიერთა ამა სოფლისათა...

არ შეგვიძლია არ მოვიხსენოთ ის ოთხიოდე წელიწადი, რომლის განმავლობაში განსვენებულს მინდობილი ჰქონდა გურიის ეპარქიის მმართველობა. ამ ოთხიოდ წელიწადს – თვის ხანგრძლივ სიცოცხლის საუკეთესო ხანად სთვლიდა განსვენებული! ის სიამოვნებით და თან თვალ-ცრემლიანი მოიგონებდა ხოლმე თუ როგორ შეეტკბო – შეუკავშირდა ის პატარა გურიის სამწყსოს, თუ შემდეგ როგორ გათიშულ იქმნა მწყემსი სამწყსოსაგან, როდესაც გურიის ეპარქია გააუქმეს, გურია-სამეგრელოს ეპარქია შექმნეს და ამ ეპარქიას დაუყენეს ეპისკოპოზად გრიგოლ დადიანი, ხოლო ყ~დ სამღვდელო ალექსანდრე კვლავ თბილისში დააბრუნეს ისევ ქორ-ეპისკოპოზად!

ჩვენმა სასულიერო მთავრობამ მხოლოდ ღრმა მოხუცებულობის დროს მიანდო განსვენებულს ხსენებული ეპარქია. მაგრამ ვს უკანასკნელი ისეთ მდგომარეობაში დახვდა ყ~დ სამღვდელო ალექსანდრეს, რომ იმისი მართვა-გამგეობა, წესიერებაში მოყვანა აღემატებოდა მის მოხუცებულ ძალ-ღონეს. ამიტომ ეპარქიის სვე-ბედი ფაქტიურად ხელთ ეპყრათ ისევ ბიუროკრატიულ ეპარქიალურ კანცელარიის დამქამებს და თითქმის იმავე და ისეთ პირთ, რომელთაც გრიგოლ ეპისკოპოზის დროს გააძვალტყავეს ეპარქიის სამღვდელოებაც და სამწყსოც...

ღრმა მოხუცებული ეპისკოპოზი ბოროტ ადამიანთ ხშირად შეჰყავდათ შეცდომაში; პატივცემულ ეპისკოპოზის ზურგს უკან ამოფარებული ბნელი ნდობას, მის უსაზღვრო ძალები, პირად ინტერესებით დაბრმავებულნი, სასულიერო თუ საერო პირნი, ერთმანერთს თითქოს ეჭიბრებოდენ უკანონობის და უზნეობის ჩადენაში, – ეპისკოპოზს-კი აჩვენებდენ თავს როგორც უერთგულესნი მისი მსახურნი და იდეური „საზოგადო მიღვაწენი“ ნამღვილად-კი იგივე ცრუ საზოგადო მოღვაწენი აშკარად დასცინოდნენ მოხუცის გულუხვობას, მისს უსაზღვრო გულ-კეთილობას – ამისდა მიუხედავად, ჩვენ შეგვიძლია თამა-

მად ვსთქვათ, რომ ზნეობრივ სიუაქიზეს განსვენებულისას ოდნავადაც არ მიჰკარებია რაიმე ჭუჭყი, სამწყსოს თვალში ისევ ძვირთუასი, ისევ სათაყვანებელი და სასოების მომგრველი მღვდელ-მთავარი იყო...

ამ უკანასკნელ სამ წელს განსვენებული განდევნილობდა შიოს წმინდა საფანეში, საიდანაც ბეჯითად თვალ-ყურს ადევნებდა ის ჩვენი ქვეყნის ავ-კარგსა. განსვენებულის განსაკუთრებულ ყურადღებას იპყრობდა წამოყენებული ქართველთა საეკლესიო საკითხი – ივერიის ეკკლესიის დამოუკიდებლობის, თვით-გამორკვევის უფლების აღდგენა, რომ მით, ერთხელ მორწმუნედ ცნობილი, ქართველი ერი კვლავ შემოკრებს თვისს ეკკლესიის გარშემო, დაუბრუნდეს ქრისტეს სახარების მოძღვრებას, რომელსაც ჩვენი ერი, და არა ჩვენი მხოლოდ, ასე ხელოვნურად ჩამოშორებულ იქმნა და თან და თან უფრო შორდება...

მოხუც-განდევნილის სული ადამფოთა სასიქადულო მგოსნის და ადამიანის – ილიას – ვერაგულმა სიკვდილმა. მოხუცს გულმა აღარ მოუთმინა, მოიკრიბა უკანასკნელი თვისი ძაღლონე და პატივი სცა დიდებულ მამულიშვილს – უსისხლო მსხვერპლის შეწირვით, საფლავის პირზე მიცილებით და მამობრივ ცრემლებს დატირებით. ეხლა კი თვით განისვენა! – შეუერთდა სულმნათ დიდებულ წინაპართ, რომ მათთან ერთად შეავედროს ღვთის მშობელს წილხდომილი – დღეს გადაბუგულ-აკლებულ-დამშეული მისი საქართველო, – გვაკმაროს ამდენი ტანჯვა-ვაება, გადმოგვხედოს თვისის დედობრივი მზრუნველობით, აღგვიდგინოს მშობელი ეკკლესია, რათა ერთითა პირითა და ერთითა გულითა ღირსებით ვადიდებდეთ ძესა მისსა და უფალსა ჩვენსა იესო ქრისტესა, ამინ.

---

**სიტყვა,  
დეკანოზი კალისტრატე ცინცაძისა**

მეუფეო წმიდაო! უამრავი ხალხი, რომელიც გარს ახვევია ჯერ კიდევ გაუციებელს შენს ცხედარს და მოელის შენგან უკანასკნელს ლოცვა-კურთხევას, შეუკრებია აქ ნათელსა საქმეთა შენთა კეთილთა, რომელთა შენს სიცოცხლეში უხვად სთესდი, მწყემსო კეთილო. მაგრამ ამა საქმეთა ჩამოთვლით

მე არა მსურს შენი შენუხება: შენ არ გიყვარდა შენს საქმეებზე ლაპარაკი. მე ვკადნიერდები და მოვავიწყებ შენთ პატივის მცემელთ ერთ მხარეს შენის მოღვაწეობისას, სახელდობრ, – შენს ზრუნვას ბერ-მონაზონების განახლებისათვის ჩვენში...

მართალია, დღეს ბერ-მონაზონებას პატივი აღარა აქვს საზოგადოების თვალში, მაგრამ ამის მიზეზი არის ის, რომ მონაზონობის უმეტესობამ უღალატა თავის პირდაპირ დანიშნულებას. დღეს თუ მონაზონობის უმრავლესობას შეადგენენ უსაქმოდ ცხოვრების მოყვარენი, წინადასე როდი იყო. წინადა მონაზონობა და საზოგადო ასპარეზზედ მოღვაწეობა სინონიმები იყვნენ. წინადა ქართველი თუ სტოვებდა დედას და მამას, დებსა და ძმებს, სახლ-კარს და მეზობლებს და მიდიოდა მონასტერ-უდაბნოში, იგი ამ შემთხვევაში თავის თავისთვის როდი ზრუნავდა, არამედ თავს სწირავდა მამულს, ვინრო ფარგლიდგან გამოდიოდა ფართო ასპარეზზედ სამუშაოდ, ხელს უწყობდა ერის განვითარებას, განსწავლას, გათვითცნობიერებას, განძლიერებას და განთავსიზებას; პატრონობდა ქვრივ-ობოლთ და გლახაკთ-დავრომილოთ, იმედს უნერგავდა გულში და ნუგეშსა სცემდა ტვირთ-მძიმეთა და მაშვრალთ, ამხელდა და შეაჩვენებდა ძლიერთა ქვეყანისათა, როცა ივინი გადაუხვევდნენ ჭეშმარიტებისა და სიმართლის გზას. ამისთვისა იყო, რომ სანამ ბერ-მონაზონობა თავის დანიშნულებას ემსახურებოდა და მოვალეობას ასრულებდა, – საქართველოც იზრდებოდა და ჰყვავოდა, ხოლო როცა ბერ-მონაზონობა დაეცა, – საქართველოც დაქუცმაცდა, დანაწილდა, დაეცა...

ყოველივე ეს გათვალისწინებული გქონდა, მეუფეო წმიდაო, და ამიტომაც შენი ძალ-ღონე შეალიე ჭეშმარიტების ბერ-მონაზონობის აღდგენას და განახლებას ჩვენში და ამ განახლებისათვის ზრუნვა შენ ქვათა და აგურთაგან, ჭერთა და კედელთაგან თვით ბერ-მონაზონთა სულსა და გულზედ გადაიტანე. შენ ჩაავიწყებ და შეავიწყებინე ბერ-მონაზონთ, რომ სულის ცხოვნება მართო ლოცვით არ მოიპოვება, რომ სულის საცხოვნებლად ლოცვასთან ერთად საჭიროა გარჯა-მუშაობა მოყვასთა სასარგებლოდ. ამისთვის, თუმცა შენ მიერ შეყვარებულის შიოს ბერ-მონაზონობის უშრომლად ცხოვრება შენის უხვის შეწირულებით უზრუნველ-ყოფილია, მაგრამ შენ მაინც შეასწავლე და სეაყვარე მათ მეფუტკრეობა, მევენახეობა და მებოსტნეობა. შენ თითონ გაიჩინე ბოსტან-ვენახი, სადაც მადლით შემოსულთ ხელთა შენთა დღე-მუდამ უმუშავნია ამ მოხუცებულობის დროსაც კი. შენმა მაგალითმა ისე იმოქმედა ბერ-მონაზონებზედ, რომ ყოველმა მათგანმა გაიჩინა ბოსტან-ვენახი, რის გამოც დღეს ამ უდაბნოს ამშვენებენ და აცოცხლებენ ეპისკოპოსის, მაქსიმეს, შიოს და ილა-

რიონის ბოსტან-ვენახი. ამ საზოგადო მუშაობამ დაყუდებული საბა ბერიც კი გაიტაცა და მასაც აუღია ხელში წალდი და თოხი და შესდგომია ტყის გამონმენდას და ნიადაგის დამზადებას ბოსტან-ვენახის გასაშენებლად. შეასწავლე და შეაყვარე-რა ბერ-მონაზონთ შრომა-მუშაობა, შენვე მოუპოვე მათ საუკეთესო ნერგი და თესლეულობა იმ პირობით, რომ ახალის მოსავლისაგან თესლეულობა გაეგრცვლებიათ მეზობლად მდებარე სოფლებში. შენ მიერ დადებული პირობის ბერ-მონაზონთაგან შესრულება, როგორც დასაწყისი მონასტრის სოფლისადმი სამსახურისა, შენ გახარებდა და გახალისებდა, და ამის გამო განზრახული გქონდა დაარსება ახლო მომავალში ყველასათვის მუდამ კარ-ღია წიგნთ-საცავის და აფთიაქისა, ხოლო შემდეგ, ბრძანე შენ ამ ორიოდე თვის წინად, იქნება ქსენონის დაარსებაც მოვახერხო, ბევრი ხალხი იხოცება სოფლებში უნამლოდ და უპატრონოდ.

ამ რიგად, შენ დააყენე შენი მონასტერი, შენი შიო, წარსულის დროის მონასტერთა სვლის გზაზედ, და თუ შენმა მოადგილეებმა არ გადაუხვიეს შენ მიერ გაკვლეულ-გაკაფულს გზას, ადვილად შესაძლებელია, რომ ჩვენი მონასტრები კვლავ განახლდნენ, განძლიერდნენ და შეიქნენ ტვირთმძიმეთა და მაშვრალთა გზის მაჩვენებლად, პატრონად და მთვარველად, შენის, ალექსანდრე აღმადგენელო, მეოხებით!..

აი, ამ წარსულის დიდების აღდგენის და განახლების გზაზედ დაყენებისათვის გცემთ, მეუფეო, პატივს, ქედსა და მუხლს ვიდრეკთ შენის ცხედარის წინაშე, სასოებით ვეამბორებით მადლით შემოსილს შენს მარჯვენას, და ვევედრებით იესო მაცხოვარს, რომ მან, სახიერმან, დააწესოს უმანკო და ცხოველი სული შენი საყოფელთა მართალთასა, აღგრაცხოს შენ რჩეულთა თვისთა თანა, ხოლო ჩვენზედ მოილოს მოწყალება და არ გამოგვილიოს შენისთანა მადლით და ღვანლით-შემოსილნი მამულის-შვილნი, ამინ.

---

### სიტყვა

თქმული ქართული ფილარმონიული საზოგადოების წარმომადგენლის ზ. ი. ჩხიკვაძისაგან ყოვლად სამღვდელო ალექსანდრეს დასაფლავებაზედ.

ყოვლად პატიოსანო!

ობოლთ ნუგეშო, ღარიბთ იმედო! საქართველოს სასი-  
ქადულო მამულის შვილო ყოვლად სამღვდელო ალექსანდრე!

ტფილისის ქართული ფილარმონიული საზოგადოება აქ,  
წმ. დავით აღმაშენებლის ტაძარში, რომელიც თქვენის მეო-  
ხებით განახლებული და გამშვენირებულია, დღეს უკანას-  
კნელად ეთხოვება თავის საპატიო წევრს და უმდაბლესად  
ეამბორება თქვენ კურთხეულ მარჯვენას.

ამ ორი წლის წინად, როდესაც მე ქართ. ფილარმონი-  
ული საზოგადოების გამგეობის მონდობილობით გიახელით  
მომეხსენებინა, რომ მან თქვენი მეუფება, ამოიჩინა საპატიო  
წევრად, ფრიად გიამათ და მკითხეთ თუ რა მიზანი აქვს ამ  
ახალ საზოგადოებასაო. მე მოკლედ მიზანი და დიადი მნიშ-  
ვნელობა ფილარმონიული საზოგადოებისა. მე მოკლედ გან-  
გიმარტეთ მიზანი და დიადი მნიშვნელობა ფილარმონიული  
საზოგადოებისა ყოვლად სამღვდელო, თქვენ ყმანვილურის  
აღტაცებით, აკანკალებულის მით შეაქეთ საზოგადოების  
დამაარსებელნი და ის კი დაგავინყდათ, რომ ჩვენზედ წინ,  
თითქმის ოცის წლით, თქვენ მიაქციეთ ყურადღება ჩვენ სა-  
ეკლესიო გალობას და მცოდნე პირების შემწეობით დაანე-  
რინეთ ნოტებზედ თქვენისავე სასყიდლით დიდ ძალი საეკლე-  
სიო საგალობლები.

მე ვგონებ თქვენ უფრო დიდი ქებისა და დიდების ღირსი  
ბრძანდებით. ჩვენ მხოლოდ მივბაძეთ თქვენს კეთილს მაგალითს  
და საეკლესიო საგალობლებთან ერთად მოვისურვეთ საერო სიმ-  
ღერების შეკრება და ნოტებზედ დაწერა, ვინაიდგან ჩვენი  
საეკლესიო და საერო მუსიკა ნაყოფია ერთი ხალხისა, ორი-  
ვე ქართველის გულიდგან აღმონაკვეთია. საკვირველია რომ  
ყოველი კეთილი საქმე საქართველოში უყურადღებოდ არ  
იყო დატოვებული თქვენგან და თქვენი მადლიანი და უხვი  
ხელი გაშლილი იყო ყველასათვის. მე უბრალო მომაკვდავს  
სავსებით არ შემიძლიან დავასურათო თქვენი სამაგალითო და  
საარაკო გულის სისპეტაკე. იგი დღეს ჩემზედ უკეთ დაახა-  
სიათეს და განმარტეს აქ თქვენთან უკანასკნელ გამოსათ-  
ხოვებლად მოსულ პატივცემულ პირებმა. მე მხოლოდ  
ამასა გთხოვთ, ყოვლად პატიოსანი მეუფეო, რომ იქ,  
საქართველოს ეკლესიის წმინდანთა და მონამეთა შორის,  
რომლის წინაშე თქვენ ღირსეულად წარდგებით და რომელ-  
თა გუნდს თქვენი უზაკვრო და სპეტაკი სული უეჭველად  
შეუერთდება; იქ იმათ შეგვავედრე და ბოდიში მოგვიხადე მათ  
წინაშე თუ აქამდინ ჩვენ ღირსეულად ვერ გაუფროთხილდით  
და ვერ დავიცევით, სამწუხაროდ, დამახიჯებისაგან საქართვე-  
ლოს წმ. მამათა სპეტაკ გულიდან აღმონაკვეთი და საუკუნო-  
ებით განსპეტაკებული, გამშვენირებული და საარაკო მელო-  
დიებით მდიდარი ქართული საეკლესიო გალობანი. შეგვავედ-  
რეთ შეგვიწოდონ ეს თითქმის მიუტოვებელი ქართველური და-

უღვერობა, შეგვავედრე რომ მათის ლოცვით ღმერთმა მისცეს ძალა და შეძლება ჩვენ ფილარმონიულ-საზოგადოებას, რომ მან სავსებით შეასრულოს თავისი დანიშნულება და აღადგინოს უტყუარად ის ცათ აღმატრენი სასულიერო ჰანგები, რომლებიც უმეცართა და უვიცთაგან შელახულა და დამახინჯებულა.

შეგვავედრე სამება ერთ-არსების წინაშე რომ ფილარმონიული საზოგადოებამ შესძლოს არამც თუ აღდგენა ჩვენის სათნოებით სავსე საგალობლებისა, არამედ, თვინიერ ამისა, მოგვეცეს ის შემოქმედებითი ძალა და ნიჭი, რომ საუცხოვოდ და სამაგალითოდ გაგვემშვენებინოს ქართულ კილოთა საგალობლები.

საუკუნო და დაუვინყარი იყოს სახელი და ხსენება თქვენი ყოვლად მონყალეო მეუფეო, ჩვენ დროის საქართველოს აღმაშენებელო ყოვლად-სამღვდელო აღიქსანდრე!

**ზაქარია ჩხიკვაძე.**

---

### **მარადის-დაუვინყარო მღვდელოთმთავარო!**

მოვიდა ჟამი, და მიიღე ქრისტიანობითი აღსასრული ცხოვრებისა შენისა უჭირველი, მშვიდობითი და ურცხვენელი...

შეგვრებილვართ სრულიად საქართველოს ეკლესიის შვილნი, მოვსულვართ საქართველოს ყოველი კუთხიდან შენი პატივისმცემელნი და ვეთხოვებით დღეს შენს წმიდა ნემტსა.

სხვებთან ერთად ქართველთა წერა-კითხვის გამავრცელებელი საზოგადოებაც უძღვნის ამ შენს წმიდა ნემტს თავისის მხრით უკანასკნელ თაყვანისცემასა და სწირავს შენს საყვარელ მონასტერს ქართველთა მოციქულის წმიდა ნინოს ხატსა. შეინყნარე იგი და მიითვალე კეთილ შესაწირავად!

წმიდაო მეუფეო, შენ იყავ ქართველთა შორის წერა-კითხვის გამავრცელებელი საზოგადოების საპატიო წევრი, რადგან, ქართველთა სარწმუნოებისა და ძველი ეკლესიისათვის ერთგულ და სამაგალითო მოღვაწეობასთან ერთად, შენ ღირსეულად იღვანე ჩვენი ძველებური ნაშთების გამოქვეყნებისა და აღდგენისათვის, აგრეთვე ჩვენს ახალგაზდა ქართველებში სწავლა-განათლების მოფენისათვის. შენის წყალობით და შენი საკუთარი საფასით დაბეჭდე მრავალი დიდათ შესანიშნავი

ხელთნანერი: უშენოდ მალე არა ნახავდენ სტამბასა საბა  
სულხან ორბელიანის ძვირფასი ლექსი კონი, არა ნაკლებ ძვირ-  
ფასი სწორმეტყველება „სახელ“ განთქმულის ანტონ ქათალიკო-  
ზისა, მისივე მზა-მეტყველება, მრავალი შესანიშნავი გუჯარი  
და სხვა საბუთები; შენივე თაოსნობით და წარსაგებელით  
დაიბეჭდა იოანე ოქროპირის წირვის ქართული საგალობელი,  
ამასაც საეკლესიო დიდ მნიშვნელობასთან ერთად დიდი საი-  
სტორიო და საეთნოგრაფიო მნიშვნელობა აქვს. შენის წყა-  
ლობით არა ერთმა და არა ორმა ახალგაზდამ მიიღო საშუა-  
ლო განათლება და ზოგმა თვით უმაღლესი განათლებაცა.

მრავალი საბუთი მოწმობს შენს ქრისტიანებრივ კეთილ  
მოღვაწეობასა. ყაზანის სასულიერო აკადემიის საბუთები მოგ-  
ვითხრობენ შენი სტუდენტობის დროიდან შენს ქრისტიანე-  
ბრივ პატიოსანს ზრუნვასა საშინელი გადამდები სენით შეპ-  
ყრობილი უშნეო ხალხისათვის, და სიყვარულით მოვლასა.  
ათხაზეთის დაობლებული სამღვდელმთავრო კათედრა და ძვე-  
ლისძველი ტაძრები მოგვითხრობენ შენს სამისიონერო ღვაწ-  
ლსა ქრისტიანობის აღდგენისათვის და ტაძართა განახლები-  
სათვის. იხილა შენი კეთილი მღვდელმთავრობა ჭყონდიდელ-  
თა დაბეჩავებულმა კათედრამაცა და შემოქმედელთა კათედ-  
რამაცა... მაგრამ ყველაზედ მეტი ღვაწლი მიგიძღვის შენ იმ  
ძველის-ძველ და სახელგანთქმულ სავანეს წინაშე, სადაც და-  
ასრულე შენი სამაგალითო ბერმონაზნული ცხოვრება და  
სადაც დღეს დაიკრძალება შენი წმიდა ნეშტი შენს საყვარელ  
ღირს მამა შიოსთან და სხვა მრავალ აქ განსვენებულ წმიდა  
მამებთან ერთად. ეს სავანე, ეს ოდესმე ქართველების სახელ-  
განთქმულ ლავრად ყოფილი სავანე, დიდებული და მრავალ-  
მეტყველი წიგნთა მისთვის, ვინც იცის ამისთანა წიგნების  
კითხვა და დაფასება. აქ ოდესმე ქართული მწიგნობრობა და  
საგანათლებო მოღვაწეობა სდულდა და სჩქეფდა, აქ ქართ-  
ველთა გამამხნევებული სიტყვა და საქმე ბრწყინავდა... შენ  
აღადგინე მკვდრეთით ეს მონასტერი და აღმოიყვანე სიკვდი-  
ლისგან ცხოვრებად, მიანიჭე სიცოცხლე ახალთ: გამოცოცხლ-  
დენ ძველი ტაძრები, სენაკები, გამოცოცხლდა უდაბნო მო-  
თხრებული და მოიფინა ვენახითა, – უნაყოფო კლდემ გამოს-  
ცა ნაყოფი კეთილი, და მოჰყურძნიან კეთილ-მორწმუნენი და  
ღვთის მოსაზნი. ესრეთ გამოჩნდი შენ მეცხრამეტე საუკუნეში  
და მეოცე საუკუნის დასაწყისში საქართველოსათვის მეორე  
„შიო ახლად“. შენივე წყალობით გამოცოცხლდა აგრეთვე  
სავანე დიდებულის იოანე ზედანელისა და მასთან კიდევ  
მცხეთის შესანიშნავი ჯვარის მონასტერი. არ ყოფილიყავ შენ,  
ეს სამი მონასტერი ქართველების ხელიდან დღეს წასული იქ-  
ნებოდენ – სხვა დაეპატრონებოდა მათ და თავისებურ სულსაც  
ჩაუდგამდა... ვინცა აღმოიკითხოს ამ ძველ ნაშთთა კედლე-  
ბი, ეს მრავალმეტყველი და ღრმამეტყველი ფურცლები, მან

გულის ხმა-ჰყოს!.. ძმანო! ჩვენ ვასაფლავებთ დღეს ქართველ-  
თა ძველი მორწმუნეობის და ღვთის-მოსავლობის ნაშთა. გა-  
ნახლდება კიდევ ჩვენი ძველებური მორწმუნეობა თუ არა?  
მე არ ვიცი, ის კი ვიცი, რომ სიცრუე ძალიან მოედო ჩვენს  
ქვეყანას... სარწმუნოების საქმეში: ცრუობენ მორწმუნედ  
წოდებულნიცა და ურწუნოდ წოდებულნიცა; სიცრუით  
იყმენ მრავალნი ანათორასაც და საბერმონაზონო ბარტყუ-  
ლასაც, სიცრუით მიდიან საკურთხევლის ტრაპეზთან და მღვ-  
დელმოქმედობენ, სიცრუით ქადაგებენ, გალობენ, ღალადე-  
ბენ... დიახ, მრავალნი ღალადებენ და მეტყველებენ სიცრუით  
და უქმად, მაგრამ ან ღვთივ შესვენებული ყოვლად სამღვდე-  
ლო აღიქსანდრე შორს იყო სიცრუეზედ: მართლიად სწამ-  
და და ძალ-ღონის კვალობაზედ ერთგული იყო თავისი სარწ-  
მუნოებისა და საეკლესიისა; გულახდით მეტყველებდა, გულახ-  
დით მოქმედებდა, წმინდის გულით ლოცულობდა და მარ-  
ხულობდა.

ბერმონაზონული ცხოვრება, ლოცვა და მარხულობა  
მას არ უშლიდა, რომ წმინდის გულით ჰყვარებოდა მრავალ-  
ტანჯული სამშობლო მხარე – საქმითაც და სიტყვითაც, იგი ყო-  
ველთვის გულითადი თანამგრძნობელი იყო და ხელის შემ-  
წყობი ჩვენი ქვეყნის, ჩვენი ერის წარმატებისა და წინსვლი-  
სა. ყველას გვახსოვს აღიქსანდრე ეპისკოპოსისებური სიტყვა,  
გვახსოვს მისებური ქება ქების ღირსისა და მისებური გაკიც-  
ხვა გაკიცხვის ღირსისა!

განა უნდა დავივიწყოთ ყოვლად სამღვდელო აღიქსანდ-  
რეს ცხარე და მწარე სიტყვები მათ მიმართ, ვისაც ძალა შე-  
სწევდა და კი არა ზრუნავდა სამშობლო ქვეყნისათვის, ანუ  
დაუთარავად და საჯაროდ განკიცხვა აღიქსანდრე ეპისკოპო-  
ზის მიერ იმ კაცთა, ვინც საკუთარი, მდაბალი და არა-საკად-  
რისი ანგაარებისათვის ორგულობდენ და ღალატობდენ დე-  
და-ქვეყანას, თავის გვარტომობას? სამაგიეროთ, როგორი  
გულსაღვსებით ეკიდებოდა იმათ, ვინც იყო ჩვენი დედა-ქვეყ-  
ნის ჩინებული მოღვაწე და ღირსეული შვილი! როგორი სიყ-  
ვარულით და ერთგულობით უძღვებოდა ჩვენს დიდებულ და  
პატივსაცემ მიცვალებულებს! გავიხსენოთ დასაფლავება დი-  
მიტრი ყიფიანისა, ნიკოლოზ ბარათაშვილის ნემტის გადმო-  
სვენება, ვახტანგ ორბელიანის დასაფლავება და სხვა... ბო-  
ლოს, სულ უკანასკნელად, მხცოვანებისაგან მოუძღურებუ-  
ლი, იგი მაინც დაეწრო ჩვენი ახალ-დროების მოწამის დი-  
დის ილიას დასაფლავებას, შეასრულა სარწმუნოებრივი წესი,  
გამოესალმა თავისებური გულითადი სიტყვით და სიყვარულით  
ემთხვია ილიას გვამსა! ეს იყო უკანასკნელი ნახვა მის მიერ  
ჩვენი დედა-ქალაქისა და უკანასკნელი ნახვა მისი ჩვენი დე-  
და-ქალაქის მიერ...

დასაფლავების მეორე დღეს შევიდა დილა-ადრიანად



ჩვენს წმიდა სიონში, ილოცა ღმობიერად, გამოეთხოვა თავის საყვარელს სიონისა მღვთის-მშობელს, წმიდა ნინოს ხატსა და ჯვარსა, გამოეთხოვა სიონს დეკანოზსა, და გამოეშურა თავის საყვარელ შიოსადმი, თავის უკანასკნელ საიქაო ნავთსაყუდელისაკენ... გაიარა ორმა თვემ, და – კიდევ აღესრულა აქ სასოებით, უჭირველად, ურცხვენელად – განუტევა წმიდა სული თავისი მშვიდობით, მისი საყვარელი ღირსი მამა შიოს წმინდა ძვლების გვერდით-კერძო...

განვლო ყოვლად სამღვდელო ალექსანდრემ ცხოვრებისა ზღვა მღვლვარე, განიცადა ამ სოფლის სიბოროტე მრავალი, ორგულობა, ღალატი, ცილის-წამება, დასმენა, ძმის გაცემა, და – ღრმა მოხუცებულობის უკანასკნელ დღეებში შიოს ნავთსაყუდელს შეათვარა მოუძღურებული თავი. ეხლა კი ეს საიქაო ნავთსაყუდელიც დაუტევა და შევიდა საუკუნო სამშვიდობო ნავთსაყუდელსა...

განისვენე, ჩვენო მსცოვანო წმიდაო მღვდელმთავარო, ჭეშმარიტო ძველებურო ბერ-მონაზონო, მშვიდობით! ღირსო მამაო შიო, აჰა, შემოვალს შენთან იგი, ვინცა განაახლა შენი დიდებული მღვიმე, – შენ სიყვარულით შეინწყნარებ მას და განუსვენებ შენთან საუკუნოდ!..

**ივანე რატიშვილი.**

---

### **სიტყვა.**

**თქმული ყოვლად სამღვდელო ალექსანდრეს დასაფლავებაზედ.**

დღეს ქართველი მართ-მადიდებელი ერი აბარებს შავს მიწას ერთად-ერთ საუკეთესო თვით-მოქმედ საზოგადო მოღვაწეს. დღეს ის სამუდამოთ ეთხოვება ისეთ გვამს, რომელიც თავის სიცოცხლეში განუწყვეტლივ ქადაგებდა ქართველთა შორის სიყვარულს, ძმობას და ერთობას და ახორციელებდა დიდ მნიშვნოვან ქრისტეს სიტყვებს: „მოდით ჩემდა მაშვრალნი და მტვირთ მძიმენი და მე განგისვენო თქვენ.“ ბევრი საწყალი და გაჭირვებული იღებდა მისგან შემწეობას; ბევრი კეთილი საქმე ჰხდებოდა ჩვენში განსვენებულის თაოსნობით, რაც, რასაკვირველია, არის მიზეზი მისა, როიმ ამო-

დენა ხალხი შეგროვილა დღეს აქ აღნიშნოს თავისი სიყვარული და პატივის ცემა ასეთ საზოგადო მოღვაწისადმი. თავის კეთილ-ცხოვრებით დაანახა ყველას ნათლად, რომ იყო გამომხატველი ქრისტეს მოძღვრების ღვთისა და მოყვასისადმი სიყვარულის შესახებ, რომ ის იყო მასწავლებელი არა მარტო სიტყვით, არამედ საქმით, შემკული და დაცული მორჩილებითა, კრძალვითა და სიმდაბლითა, ის საუკეთესოდ სცნობდა თავათ ეცხოვრა ძლიერ უბრალოდ და მარტივად და თავისი საშვალეობა ეძღვნა საქველ-მოქმედო საქმისთვის. სიუხვე და ქველ-მოქმედება ახლად განსვენებულ მღვდელ-მთავრისა კარგათ იცის მთელმა საქართველომ. ძველებური ეკლესიები და მონასტრები საქართველოსანი, ეს დიდებულნი ნაშთი ქართულის ძველის ხუროთ-მოძღვრებისა, ნათლად მონმოებენ იმას, თუ რა იყო მათთვის მღვდელ-მთავარი ალექსანდრე. თითქმის ყველამ იცის ის ეკლესიები და მონასტრები, რომლებიც ახლად-განსვენებულმა გაახლა და გაამშვენა. კიდევ მრავალი კარგი საქმე ჰქმნა თავის სამშობლოსათვის, მის ხანგრძლივ ცხოვრების განმავლობაში, რაც გახდის უკვდავად მის სახელს ქართველი ერის ხსოვნაში.

ახლა, როდესაც ქართული ეკლესია შეუდგა მეცადინეობას აღადგინოს თავისი უკიდურესი უფლებანი და მოიპოვოს ის თავისუფლება, რომელიც მას მიენიჭა კიდევ მე-VI საუკუნეში, მოშორება ისეთი მოღვაწისა, როგორიც იყო განსვენებული, უნდა ჩაითვალოს ქართველთათვის სამწუხარო მოვლენათ. ეს მწუხარება ორკეცდება მაშინ, როდესაც კაცი წარმოიდგენს ქართული ძველი მწერლობის აღდგენის საქმეს, რომელზედაც ბევრს ზრუნავდა განსვენებული მღვდელ-მთავარი, რადგანაც იცოდა, რომ მხოლოთ მწერლობის აწყვევებას შეეძლო გაეუმჯობესებია ქართველი ერის მდგომარეობა და შეექმნა ისეთი პირობები, რომლებმაც მე-XII საუკუნეში წარმოშვეს შესანიშნავი მწერლები: მოსე ხონელი, შავთელზი, თმოგველი, შოთა რუსთაველი და სხ., რომელთა ნაწარმოები, როგორც ხელოვნური ნაშთი, დიდათ აღემატება სხვა ერთა იმ დროის ასეთივე ნაწარმოებს და მუდამ იქნება მონამე ამ დროის ქართველთა გონებრივ განვითარებისა...

მშვილობა მტვერსა თქვენსა ახლად-განსვენებულ მღვდელ-მთავარო. დაუვინყარი იქნება სახელი თქვენი ქართველი ერის ხსოვნაში და საქართველოს ისტორია არა ერთ საუკეთესო კაბადოთაგანს უძღვნის თქვენი მოღვაწეობის აღწერას შთამომავლობის სამოძღვრებლად.

**სასულიწერო სემინარიის მე-VI კლასის მონათვე ე. ნიკოლაძე.**

## ილია ჭავჭავაძის სიტყვა. \*)

„თქვენო ყოვლად უსამღვდელოესებავ! მე ვბედავ თქვენს წინაშე ხმის ამოღებას დღევანდელ დღეს არა იმისთვის, რომ თქვენ ჩემს ქება-დიდებას საჭიროებდეთ. თქვენი საქმენი, თქვენი ღვაწლ-მოსილი სიცოცხლე ჩემზედ უკეთესად ჰლაღადებს თქვენს ქებასა და დიდებას და ჩემი თქმა რას მიუმატებს თქვენს სათნოებით მოპოებულს სახელს.“

„ნამეტანობაში ნუ ჩამომართმევთ და გულით წმიდით ვიტყვი, რომ სჩანს ღმერთს კიდევ არ დავეინყებოვართ, რადგანაც თქვენისთანა სათნოებიან კაცს მოუვლენს ხოლმე ჩვენს ქვეყანას და რაკი თქვენისთანაებსა ვხედავთ, გულს კვლავ ერჩის წუთი სოფლისაგან ღონე მიხდილი სასოება და წუთი სოფლისაგანვე გამოჭრილი იმედები უკეთესის დღეებისა. უღონოება ქვეყნისა მარტო უფულობაა და უქონლობა კი არ არის, როგორც ეხლა ბევრსა ჰგონია, არამედ ისა, როცა სათნოებიანი, კეთილ მოქმედი, მაღალ ზნეობის კაცი არა ჰყავს, სიმაგრე ქვეყნისას, ქვეყნის ძალ-ღონე, რის შემნახველი და გამადიდებელი, ქვით-კირი ადამიანის ცხოვრებისა მარტო სათნოებაა და მარტო სასოებაანი კაცი ქმნის ამ წუთი სოფელს ტაძრად, სადაც ღმერთს აღიდებენ და სამოთხედ, რაცა ბედნიერება ადამიანისას ასულდგმულებს“.

„თქვენის ცხოვრების წმიდათა-წმიდად ორი დიდი საგანია: ერთი ღმერთი და მეორე თქვენი სამშობლო ქვეყანა.“

---

\*) ეს სიტყვა დღეს ბევრს აღარ ეხსომებათ, ამიტომ ვბეჭდავდ მეორედ. იგი მოთავსებული იყო ალექსანდრე ეპისკოპოსის ბიოგრაფიაში, რომელიც გამოიცა 1903 წ.

ღმერთს მღრთისას აძლევედით და ქვეყანას ქვეყნისას და ორსაც ემსახურებოდით ერთმანეთს დაუკლისად გულ-მხურვალე-ბით და სიყვარულით. ერთი წუთიც არ ვიცით თქვენის სიცოცხლისა, რომ ცხოველ-მყოფელი შუქი, ამ ორკეცს სიყვარულისა არ მოჰვენდეს თვითეულს თქვენს საქმეს, აქ თვითეულს თქვენს მოქმედებას, ქვეყანას ემსახურებოდით, მღეროთ-სათვის ღმერთს აღიდებდით ქვეყნისათვის, რადგან ღმერთი არს სიყვარული და სიყვარული მხსენელია ქვეყნისა“.

თქვენი სიცოცხლე მთელი და განუწყვეტელი სათნოებაა, სათნოება რომლის მაგალითს მარტო იმ მაღლით ცხებულს მღვდელ-მონოზენების შორის ვპოულობთ, რომელნიც ერთ დროს ყოფილან ჩვენში, ჩვენდა საუბედუროდ ეხლა აღარ არიან, თქვენ ხორცი დაუმორჩილედ სულს და ერთი უდიდესი სათნოებაც ეს არის. გმიოდათ არ სჭამდით, გწყუ-

როდით და არ სვამდით, გციოდით და არ თბებოდით იმისთვის კი არა, რომ ვითაარცა ანგარმა და ძუნწმა ოქრო და ვერცხლი მოახვეჭოთ, არამედ იმისთვისა რომ რაც საკუთრად თქვენის თავისთვის არ გემეტებოდით, რასაც თქვენს თავს აკლებდით, ის სხვას შეჰმატეთ, სამადლოდ, საქვეყნოდ გაეცით, თქვენს სამშობლოს მოახმარეთ, მართალი უთქვამს, ვინც სთქვა, რომ ორ ნაირი სათნოებაა ქვეყანაზე ადამიანის ღირსების აღმნიშვნელი. ერთი უქმი, რომელსაც მოსდევს არა ქმნა ბოროტისა, მეორე მოქმედი, რომელსაც მოსდევს ქმნა კეთილისა. პირველ მაგდენი – ვერაფერი ღვანლია... სადიდებელი კაცისა, მეორე მოქმედი, რომელსაც მოსდევს ქმნა კეთილისა, პირველი მაგდენი ვერაფერი ღვანლია, სადიდებელი კაცისა, მეორე სათნოებაა და ამისთანა სათნოების პატრონი თქვენა ბრძანდებით“.

„თქვენ აღგვიდგინე ჩვენი დავიწყებული წმინდანნი შიო მღვიმელი და იოანე ზედაძნელი, სხვამ რაც უნდა სთქვას და ჩემის ფიქრით კი კაცი ის არის, ვისაც გულითადი რწმენა რისამე აქვს ქვეყნის საკეთილ დღეოთ მის მიერ აღიარებული და იმ რწმენას ემსახურება თავდადებით, თქვენ გნამთ რომ ადამიანის მხსნელი, მისი ხელთ-მძღვანელი და განმმენდელ მისი სჯული და სარწმუნოებაა“ და ამ გზაზე ღვანლმოსილებისათვის არა დაგიზოგიათ რა. ამისდა მონად თქვენ მიერ აღდგენილი მონასტრებია, ეს ნაშთი ჩვენის სულიერად ზე აღსრულებისა. აქ მეტია თვითეულის თქვენის ღვანლის ჩამოთვლა და მარტო ამას ვიტყვი, რომ თქვენი მადლით ცხებული მარჯვენა ყველგან მიგინვდენიათ, საცა კი თქვენის ქვეყნის, თქვენის ერის საკეთილდღეოდ საქმე რამ აჩენია, არ არის არც ერთი საერო საქველ მოქმედო საქმე ქართველთა რომ თქვენი უხვი წვლილი არ ერიოს, თქვენი ლოცვა კურთხევა – წინ არ მიუძღოდეს, თავს არ დასტრიალებდეს.

„მარტოდ ისიც საკმარისია თქვენის მადლობის ხსენებისათვის, რომ თქვენის მეოხებით, თქვენის ღვანლით, თქვენის მამობრულის სიყვარულით გამოუზარდეთ ჩვენს ქვეყანას იმისთანა შვილი, როგორიც ახლად ნაკურთხი ეპისკოპოსი ლეონიდეა. ჩვენ კაცებით ღარიბნი ვართ და ჩვენთვის თქვენგან გაზრდილი – თქვენის მაგალითიდ განვრთვნილი, თქვენის ხელისა და გულის თანამოზიარე განძია, ჩვენ შევხარით ჩვენს ახალს ეპისკოპოსს სასოებით და იმედითა, იმიტომ რომ თქვენი – გაზრდილია, თქვენი სულიერი შვილია, და ყოველი მზგავსი მზგავსა შობსო ნათქვამია“.

„თქვენ გაზრდილს დიდი ეკლიანი გზა უძევს წინ, თუ სიყვარულს ქვეყნისას თქვენებრ წინ წაიძღვანებს და მსახურება მისი მსახურება იქმნება ქვეყნისა. ეს გზა გზაა საკუთარის თავის განირვისა, წამებისა, ნამეტნავად ჩვენში, რაც უმადურება და კილვა ისე ხშირია, როგორც არსად. ჩვენ

იმედი გვაქვს, რომ თქვენი გაზრდილი, თქვენი განვრთნილი არა ეკალს არ შეუშინდება და თქვენს მაგიერობას გაგვიწევს. მაგიერობას მეთქი!.. მოგვიტევეთ, გული კაცისა ხარბია! თქვენი ბედი გვენატრება. ნუ თუ თქვენ თითონ არ ინებებდით, რომ თქვენი გაზრდილისაგან მეტი მოითხოვოთ, მეტი მოველოდინოთ, თქვენ მამა ხართ და ეგ თქვენი შვილია და რადგანაც ის გვირჩევნია მეტი მოველოდინოთ. „ის ურჩევნია მამულსა რომ შვილი სჯობდეს მამასაო.“ ჩვენ დარწმუნებული ვართ, რომ თქვენ თვითონ ჩვენზედ უფრო მეტის ნატვრით ინატრებდით, რომ თქვენი გაზრდილი თქვენ დაგემჯობინოთ ჯერ ღვთით და მერე თქვენისავე კურთხევითა“.

ამისი და, ამ ჩვენის კადნიერების რწმენის თავმდეები და სანყაული თქვენი მამაშვილური სიყვარული, რომლის წინაშე ქედს იხრის ყოველივე სხვა პირადი გრძნობა პატიოსანი კაცისა. ჩვენ მართლად საყვარელო და ღირს სახსოვარო მღვდელმთავარო! თქვენ აქედამ მიბრძანდებით, მაგრამ მღვთის მადლით ჩვენის ქვეყნიდამ კი არა. იქაც ჩვენი ქვეყანაა და ჩვენი ერია, ჩვენი ძმები არიან, ჩვენ აქ გიახელით სამგზამშვიდობორო მოგახსენოთ და თქვენს წინაშე ღმერთს ვთხოვოთ თქვენი დღევგრძელობა და თქვენგან ლოცვა კურთხევა მივიღოთ. მოგვირთმეგია მცირე-ოდენი ძღვენი ესე ჩვენდა სახსოვრად კი არა, ჩვენ უამისოთაც გეხსომებით მთელ საქართველოსთან ერთად, რადგანაც შვილნი ვართ საქართველოსი, რომელსაც დღეთა თქვენთა სწირავთ უორგულობითა და სიყვარულითა... მიიღე ნიშანი ჩვენი გულითადის მადლობითა და უღრმესის პატივისცემას და გიხაროდენ, რომ შენის ქვეყნის შვილნი მოიწიფენ იმოდენად, რომ შეძლებისამებრ მადლობას უხდიან მადლობის ღირს კაცს. გიხაროდენ იმიტომ, რომ ესეც ერთი ფეხის წინ წადგომაა, ერთს საფეხურით ზე აღსვლაა თქვენის შვილებისა, რადგანაც მართო ბრძამ და უკეთურმა არ იცის სხვის სიკეთის დანახვა, სხვისი ღვაწლის დაფასება.

თქვენ მიბრძანდებით ჩვენგან და ვწუხვართ, რომ ჩვენ გვშორდები, მაგრამ ჩვენთა იმერ ძმათა სიყვარული ანელეებს ჩვენს მწუხარებას და გვამხნევეს ჩვენ. ჩვენგან მეტის მეტი გულ-ძვირობა იქმნებოდა, რომ ეს ასე არ იყოს. ჩვენ მწუხვართ თქვენი წასვლით და გვიხარიან თქვენი იქ მისვლა, ჩვენ ვაკვლდებით და ღვთის მადლით, იქ შეგვემატებით. ყველგან ჩვენს ქვეყანაში საჭიროა ამისთანა კაცი, რომლის მიხედვით და მაგალითით იწურთნება ხასიათი, იწმინდება გონება და გული ადამიანისა. უხაროდეთ მათ, სადაც თქვენ მიდიხართ, და ჩვენ ეს არ გვშურს, რადგანაც იქაც ჩვენები არიან, თუნდ ესეც არ იყოს, თქვენი ცხოვრება სათნოების სკოლაა ჩვენთვის და ამიტომაც მართო ერთი ხსენება თქვენის სახელისა ჩვენი მწვრთვნილია. ოჰ, რა ბედნიერია იგი

კაცი, რომელიც გვწრფონის და გვასწავებს ჩვენ არამც თუ ჩვენთან ყოფნით, არამედ მარტო თავისი სახელის ხსენებით-თაცა, ამბობს ნატვრით ერთი ძველი ბრძენი. ამისთანა ბედნიერი ხარო თქვენ, საცა გინდა ბრძანდებოდეთ. იყვენით კვლავაც ესე ბედნიერი ჩვენდა თავმოსაწონებლათ და ნუ მოაკლებო თქვენს ლოცვა-კურთხევას თქვენს ღვანლს, თქვენს საყვარელს ქვეყანას, ერს. თქვენს საყვარულს თქვენი საყვარელი ქვეყანა, საცა გინდა ბრძანდებოდეთ, არ დაივიწყებს. ადიდე კვერთხი ესე, და წარიყვანე ერი შენი გზასა სიმართლისა და სარწმუნოებისასა.

„დაგვლოცე და შენის მადლიანი ხელით გვაკურთხე შენი მადლობელნი და შენი მიერ ღვანლ-დებულნი.“

### ილია ჭავჭავაძე

მისმა მეუფებამ, მადლობა გარდაუხადა რა, სთქვა, რომ წმიდათ დაიცავით სარწმუნოება, არ უღალატოთ თქვენთა სახელოვანთა მამა-პაპათა ანდერძს, რომელთა შორის მრავალმა მეფემ, თავად-აზნაურმა და მდაბიომ დაიდგა სანამებრივი გვირგვინი სარწმუნოებისათვისაო. ზნეობით ფაქიზნი იყავით, ოჯახი წმინდათ შეინახეთო. მე თუმცა შორს ვიქნები თქვენგან, მაგრამ გულითა და სულით არ დავივიწყებ ჩემს ძველს სამწყსოს და ვილოცებ მისის წარმატებისთვისაო.

ამ სიტყვათა წარმოთქმის დროსაც ბევრს ამოუჯდა გული და ცრემლით გამოეთხენენ საყვარელ მწყემსთ-მთავარს.

კვერთხი გამოწერილია ქართველ სამწყსოს მიერ მოსკოვიდან და მეტად ძვირფასის, იშვიათის ნაკეთებისაა, მთელის კვერთხის ბუშტები საგანგებო ხელოვნების მინანქრითა და სევადით არის დამშვენებული. კვერთხს თან დართული აქვს პერანგი და ზედ აწერია, „ადიდე კვერთხი ესე და წარიყვანე ერი შენი გზასა სიმართლისასა. 15 მაისი 1899 წლისა.“ კვერთხის ბუდის თავზე ამოჭრილია ქართულად ასო „ა“, რომელსაც თავზე სამღვდელ-მთავრო მიტრა აქვს გაკეთებული.

გუშინ, ორშაბათს, 18 მაისს, მისი უსამღვდელოესობა გაემგზავრა ფოთისკენ. რკინის გზის სადგურამდე დიდ-ძალმა ქართველობამ მიაცილა საყვარელი მწყემსთ-მთავარი, მრავალთ შორის ეპისკოპოსი ლეონიდე გორამდე გაჰყა.

## † ალექსანდრე ეპისკოპოზი.

(სომხურიდამ)

ამა წლის ნოემბრის 9. ღამით, შიო მღვიმის მონასტერში გარდაიცვალა 85 წ. ცნობილი ალექსანდრე ეპისკოპოზი. საქართველოს სამღვდელთა ეპისკოპოზ ალექსანდრეს სიკვდილით ჰკარგავს რჩეულ და მოღვაწე წევრთაგან ერთს, რომელსაც მეტად საპატიო ადგილი ეჭირა მათ შორის. განსვენებულ გორის მამრის ერთ მივინწყებულ სოფლის მღვდლის დავით ოქროპირიძის შვილი იყო.

მან სწავლა მიიღო პირველად გორის სასულიერო სასწავლებელში და შემდეგ თფილისის სასულიერო სემინარიაში.

1845 წ. სასულიერო წოდების მიღებისათანავე განაგრძნო მან სწავლა ყაზანის სასულიერო აკადემიაში, სადაც ჩინებულად დაამთავრა სწავლა და ეკურთხა ბერად. შემდეგ მონვეულ იქმნა მასწავლებლად თბილისის სასულიერო სემინარიაში. აქედგინ გადავიდა აფხაზეთში და მოღვაწეობდა როგორც მასწავლებელი და მოქალაქე. შემდეგ დაინიშნა დიდებულ გელათის მონასტრის მამათა მთავრად, საიდგანაც რამოდენიმე ხნის შემდეგ გადავიდა აფხაზეთში და დაინიშნა ამ სათემო წინამძღვრად. ეპისკოპოზად იგი ეკურთხა 1862 წ. რამოდენიმე წლის შემდეგ გადაყვანილ იქმნა გორში წინამძღვრის მოადგილეთ, ხოლო 1882 წ. დაინიშნა პირველ მოადგილეთ, ბოლოს კი 1898 წ. მას ჩაებარა გურიისა და მინგრელიის თემები.

1898 წ. ებოძა თვით იმპერატორისაგან თვალ მარგალიტით მორთული წ. მაცხოვრის ხატი.

განსვენებულის მოღვაწეობა დიდია თუ სამოსწავლებლო თუ სალიტერატურო და თუ სხვა სასარგებლო საქმეებში. მაინც იგი დიდი მოტრფიალე იყო სიძველეებისა, რითაც აისხნება ის გარემოება, რომ იგი თავის წვლილს არ იშურებდა ძველ მონასტრების და ეკლესიების შესაკეთებლად. ეგრეთვე დიად ყურადღებას აქცევდა შკოლებს. მან თავის ხარჯით გამოსცა ისტორიული ღირს შესანიშნავი ნაწარმოებნი, როგორც მაგალითად საბა სულხან ორბელიანის ლექსიკონი, მე-18 საუკუნე და სხვა ძველი გუჯრები-ღირსეული ნაწარმოებნი.

ამ ბოლო ხანებში მან შეაკეთა იმერეთის ეპისკოპოზი ლეონიდის დახმარებით შიო მღვიმის დიდებული ტაძარი, რომელიც აღუშენებია ისტორიის გარდმოცემით დავით აღმაშენებელს (1125) წ. განსვენებულმა ჯერ თავის სიცოცხლეში მთელი თავისი ქონება დაახლოვებით 26,000 მანეთი შესწირა შიო მღვიმის და იოანე ზედაძნელის მონას-

ტრებს რითაც დაგვიმტკიცა თვისი ზომას გადაბიჯებული სიყვარული ამ სიძველეებისადმი.

ამ უკანასკნელ ხანებში (1903) ღრმა მოხუცების გამო სცხოვრობდა განმარტოებულად შიო მღვიმის მონასტერში, სადაც საუკუნოდ განისვენა.

განსვენებულის ცხედრის დაკრძლვას ხუთშაბათს ნოებმ. 15-ს დაესწრო აუარებელი ხალხი. ახლო-მახლო სოფლების საზოგადოებათაგან, ეგრეთვე სხვას და სხვა საზოგადოების და ამხანაგობის წარმომადგენელი. საქართველოს სამღვდელთა ეპისკოპოსო და ვითით, წინამძღვრებით გაზეთების და სასწავლებლების მხრით ამორჩეული დელეგატები და სხვანი.

წაიკითხეს და წარმოსთქვეს მრავალა სიტყვები, სადაცა აქებდნენ და აღიდიდნენ მის მოღვაწეობას მის იშვიათი კაი მსახურებას და ქველმოქმედებას. ცხედარი ჩაასვენეს შიო მღვიმის გვერდით მდებარე ტაძარში, რომელიც თვით განსვენებულს შეუკეთებია სიკვდილის რამოდენიმე წლის წინ.

განსვენებულის კერძო ცხოვრება მეტად საყურადღებო და გასაკვირია. იგი წინააღმდეგი იყო ოთხფეხ ცხოველების დახოცვისა და დაკვლისა. არცა სჭამდა მათ ხორცსა. როგორც განსვენებული სომეხთა კათოლიკის საყვარელი და საუკეთესო საჭმელი „პური“ იყო, ეგრეთაც ეპისკოპოსო ალექსანდრეს საყვარელი საჭმელი ღრმა სიბერემდის „ლობიო“ იყო. მან თავის ზომიერი ცხოვრებით მოგროვილი თანხა მთლად მოახმარა სხვა და სხვა საქველმოქმედო საქმეებს.

ამ სიტყვის ფართო მნიშვნელობით განსვენებული მეტად კეთილსულოვანი სულგრძელი და მორწმუნე ვინმე იყო, რასაც თავისი საქმეებით გვიმტკიცებდა, იმისი ამგვარი ცხოვრება, სიტყვა და საქმის ერთნაირი მიმართულება თვით კერპთ მსახურსაც კი მოიყვანდა სარწმუნოებაზე. აჰა ეს ზემოხსენებული მიზეზია იმისა, რომ მან მოიხვეჭა დიდი სახელი და სიყვარული რითაც ბევრისთვის სამაგალითო გახდა. ალექსანდრე ეპისკოპოსო გავიცანით პირველად 14 წ. წინ.

აფჯალა სადგურიდგან დაახლოვებით 9 ვერსტის სიშორეზე იმყოფება იოანე ზედაძნელის ისტორიული მონასტერი, მონასტრის აშენებას ისტორია მეხუთე საუკუნეს მიაწერს. სადაც არის დაკრძალული ცხედარი იოანე ზედაძნელისა რომელიც ერთი და უფროსი იყო იმ 13 სომეხთაგან რომლებიც მეხუთე საუკუნეში კაპადოკიიდან გადმოვიდნენ საქართველოში ქრისტიანობის საქადაგებლად და რომლებმაც პირველად დაისადგურეს.

ზემოხსენებულ მთის ქედზე, სადაც აშენდა ეს მონასტერი, იქიდგან დაიწყეს მათ ქრისტიანობის ქადაგება და გავრცელება ქართველთა შორის. ამ 13 სომეხთა წინამძღოლი და უფროსი მოთავე იყო იოანე. იგი დარჩა ამ მთაზე, ხოლო მისი ამხანაგები დაიშალენ-დაიფანტენ და წავიდნენ



საქართველოს სხვა და სხვა მხარეს ქრისტიანობის გასავრცელებლად. ასე მაგალითად დავითი თფილისში ავრცელებდა ქრისტიანობას და თავისთვის სადგურათ ამოირჩია მთანმინდა, სადაც დღევანდლამდის სდგას მის სახელზე აშენებული მამა დავითას მონასტერი. მეორე – სახელდობრ ანტონი თფილისი დგან 23 ვერსტის სიშორეზე მყოფ ნორიო სოფლის ახლო-მახლო ქადაგებდა ქრისტიანობას. მის სახელზე იქვე აშენდა მშვენიერი მონასტერი და ეგრეთვე მრავალი ოთახები მლოცველთათვის, რომლიდან უმეტესობა სომეხ მლოცველების აშენებულია და დღევანდლამდის მონასტრის დღესასწაულზე 15 აგვისტოს, მრავალი მლოცველი ხალხი და მათ შორის სომხობაც მიეშურება მისაკენ.

მესამემ სახელდობრ შიომ ამოირჩია თავისთვის საქადაგებლად სხვა მხარე. მის სახელზე აშენებულია შიომღვიმის მონასტერი და სხვა და სხვა...

იოანნე ზედაძნელის დღესასწაული მაისის 7. შია. მთის ქედზე ასავალი გზა მეტად ლალავს ქვეითად წასულთ მლოცველებს, მიუხედავად ამ გარემოებისა მლოცველთა მრავალრიცხვი დღესასწაულის წინა დღითი მიეშურება მონასტრისაკენ.

1891 წ. მაისის 6 რამოდენიმე ამხანაგები საათის 3-ზე წასადილევს, აჭალა სადგურიდან ფეხ და ფეხ გავემგზავრეთ იოანნე ზედაძნელის მონასტრისაკენ. ჩვენთან ერთად მიდიოდა მლოცველთა ურიცხვი ხალხი, უმეტესად რუსის ბებერი ქალები და ვაჟკაცები. ათი წამის შემდეგ, დავინახეთ მლოცველთა შორის ხანში შესული ბრძენი სახის ვინმე ცხენოსანი, რომელიც ჩვენთან ერთად მიემგზავრებოდა ზემოხსენებულ მონასტრისაკენ, ეს ალექსანდრე ეპისკოპოზი იყო. მის დანახვამ ყველანი გაამხიარულა, იმისმა ტკბილმა სასიამოვნო მუსაიფმა ყველას დაგვაწინყებინა გზის სიძნელე.

მთის მაღალ გორაზე გასვლამდის იგი ანუგეშებდა ყველას მაცხოვრის სიტყვებით: „სარწმუნოებამ თქვენმა მოგანიჭოთ სიცოცხლე თქვენაო.“

როგორც იქმნა სამი საათის მგზავრობის შემდეგ ძლივს მივახნიეთ ძველ ისტორიულ მონასტრამდის. მონასტერი აშენებულია ზედაძნელის მთის ქედზე, მემათიონეთა თქმულებით კაპადოკიიდან ჩამოსულ 13 სომეხთა მასწავლებელ და წინამძღოლ იოანეს დაუსადგურებია ამ ადგილას. აქ მის მოსვლამდის კერპთ მსახურებს თავისი ტაძარი ჰქონიად, კერპთ-მსახურების ბინა ყოფილა, რომლებიც იოანეს მიწასთან გაუსწორებია და ქართველთა ფარნაოზ მეფის, ევლახი კათოლიკოზის დროს დააუწყია ქრისტიანობის ქადაგება ქართველებში. იმ ღამეს ჩვენ უნდა გავვეთენებია ცის ქვეშ, რადგან ოთახები სულ ერთიან დაკავებული იყო. როდესაც ეპისკოპოზმა ალექსანდრემ შეიტყო ჩვენი მოსვლა მაშინათვე განკარგუ-

ლება მოახდინა, რომ გამოეტანათ ჩვენთვის სტოლი და ხალიჩები დაეგოთ ნოტიო მიწაზე. პატარა ხანს შემდეგ ჩვენ დავსხედით ვახშმათ და მოვიწვიეთ მათ მეუფება ალექსი ეპისკოპ. რომელმაც დიდათ დაგვავალა ჩვენი თხოვნის შესრულებით. მან ვახშმის გათავებამდის გაგვართო ჩვენ თავისი ბრძენი მუსაიფით.

– საკვირველია თქვენო!? როგორ ატარებენ ღამეს უსაბნოთ ამისთანა ცივ ამინდში. ქალაქში კი მიუხედავად იმისა რომ თბილ ოთახებში ისვენებენ მცხოვრებნი, მაინც კიდევ ზოგიერთი სჩივის გაცივებას – მიმართა ჩვენგით ერთ-მა ეპისკოპოსს.

ამ მლოცველთ ინახამს თავიანთი სარწმუნოება, მათი ფიქრი და აზრი მხოლოდ თუგინდ აღთქმა შესრულებაზეა გაჩერებული. აბა სწორეთ მის გამო ბუნება ველარ მოქმედობს მათზე და ეს გარემოება ჰსიხოლოგიითაც მტკიცდება უპასუხა ეპისკ. ალექსანდრემ: მე სარწმუნოება ძალიან ფართო მნიშვნელობით მესმის, სოლოდ თქვენი კი არ ვიცი რა აზრისა ხართ მაგის შესახებ-თქვენ როგორ გესმით. მომმართა მე იმა ცნობისმოყვარეობით-თუ ადამიანი თავ ს რაიმე საქმეს ჰკიდებს ხელს სარწმუნოებით და გულიანად მაშინ ის უფრო. მიახწევს თავის თავის წადილს ვიდრე ის რომელიც უიმედოთ და არა სარწმუნოებით ეკიდება საქმეს.

– მართლაც რომ ეგ აგრეა და მე ეგრეთაც მესმის და ვქადაგებ. გარდა მაგისა სარწმუნოება საქმით უნდა იქმნეს დაგვირგვინებული.

– მართლაც რომ სარწმუნოება უსაქმოდ არა არს. მე თქვენო მეუფებავე, ამ ბოლო ხანებში სხვათა შორის წავიკითხე ცნობილ ექიმების წიგნები, რომელნიც ამტკიცებენ რომ რამოდენიმე იკურნება სარწმუნოების საშუალებით. მე ვიცი რომ მეცნიერებას სწამს წყლით მკურნალობა, ექიმობა, სულით მკურნალობა და სხვა და აჰა ამ ბოლო დროსაც სარწმუნოების საშუალებით მკურნალობა მტკიცდება.

– ეგ არამც თუ დასაჯერია. არამედ სინამდვილეა გვიპასუხა ეპისკ. ალექს. ყოველი ექიმი გეტყვით თქვენ, რომ თავის გამოწერილი წამალი მაშინ უფრო მოქმადობს, როდესაც ავადმყოფს სწამს რომ ეგ წამალი უთუოდ უშველის, გაჰკურნავს...

– მე წამიკითხავს ერთი ანეგდოტი ინგლისელების ცხოვრებიდან განვაგრძე მე. ერთი ბებერი დედაკაცი იტანჯებოდა წელის ავადმყოფობით, მას მიუმართავს ექიმისათვის, რომელმაც გამოუწერა საჭირო წამალი და დაარიგა რომ წელზე მიეკრა. ბებერ დედაკაცს შეცდომით ჰგონებია რომ ეს რეცეპტი უნდა მიეკრა წელზე, რასაც შეასრულებს და აჰა სასწაული, რამოდენიმე დღის შემდეგ დედაკაცი კარგათ გრძნობს თავს და განიკურნება საბოლოოდ.

– ხა ხა ხა. მაღალის ხმით წაიკისკისა იქვე მდგომმა ახალგაზრდა ქალმა, რომელიც ჩვენ ყურს გვიგდებდა და რაც შთაბეჭდილებასაც ახდენდა ჩვენზე.

– თქვენო მეუფეებავ, ამ ქალსაც რამე ექნება შეთქმული, რომლის გამოც უკისრია ამ შორე და ძნელ გზის გავლა და რამოდენიმე ღამესაც სიცივეში, ცის ქვეშედ გათენება,

– წაიხუმრა ჩვენმა ამხანაგთაგან ერთმა.

ეპისკოპოსმა ალექსანდრემ მაშინვე დაუძახა ახალგაზრდა ქალს, აკურთხა ისა და უსურვა მის წადილს შესრულება, რაიცა ჩვენის თვალითვე ვიხილეთ მეორე წელს. ახალგაზრდა ქალი მიღწეოდა თავის წადილს.

მას შემდეგ ალექსანდრე ეპისკოპოსი ვიხილეთ ჩვენ ბევრჯერ და მუდამ იგივე სასიამოვნო შთაბეჭდილებას ახდენდა ჩვენზედ.

სომხ. გაზ. „ჰოვივი“ №44 და 45 1907 წ. კარ. თემურაზიანი.

#### † ყოვლად სამღვდელო ეპისკოპოზი ალექსანდრე.

15 ამა ნოემბერს ყ-დსამღვდელო ეპისკოპოსმა ალექსანდრემ მიიძინა მისგან განახლებულ შიო მღვდელის უდაბნოში.

ყოვლად სამღვდელო ალექსანდრე დაიბადა 1824 წელს. მას მონათვლის დროს სახელად ალექსი დაარქვეს, იმისი მამა დავით ოქროპირიძე მღვდლათ მსახურებდა გორის მაზრის ერთს სოფელში. ტფილისის სემინარიაში კურსის დამთავრების შემდეგ ალექსი ოქროპირიძე აღიკვეცა ბერად, და სახელად ალექსანდრე უწოდეს. მთავარ-დიაკონის ხარისხით ის გაემგზავრა ყაზანის სასულიერო აკადემიაში სწავლის დასამთავრებლად. სასულიერო კურსის დამთავრების შემდეგ მთავარ დიაკონი ალექსანდრე მღვდელ-მონაზნად აკურთხეს. საქართველოში დაბრუნების შემდეგ ახალგაზრდა მღვდელ-მონაზონი აფხაზეთში გაგზავნეს და შემდეგ ქუთაისის სასულიერო სასწავლებლის ზედამხედველად იქმნა დანიშნული. 1855 წელს აკურთხეს ილუმენად, – მალე არქიმანდრიტადაც და ისევ აფხაზეთში იქმნა გაგზავნილი. 1862 წელს ხელდასხმული იქმნა მღვდელთ-მთავრად თბილისის სიონის ტაძარში ექსარხოსის ევსევის მიერ სხვა მღვდელთ-მთავრების თანამწირველობით, მას ჩაბარდა აფხაზეთის კათედრა. 1869 წელს გადმოყვანილ იქმნა ტფილისში გორის ეპისკოპოსად და საქართველოს ექსარხოსის პირველს ქორ-ეპისკოპოსად, 1882 წლიდან 1886 წლამდის მართავდა გურიის ეპარქიას და შემდეგ ისევ დაბრუნდა ტფილისის თვისსავე თანამდებობაზედ. \*)

ყოვლად-სამღვდელო ალექსანდრე ხშირად საქართველოს ექსარხოსის მაგივრობასა სწევდა. როდესაც ექსარხო-

სები დროებით რუსეთს წავიდოდნენ, „პრაგონს“ მიიღებდნენ, ქართლ-კახეთის ეპარქიას ყოვლად სამღვდელო ალექსანდრე განაგებდა, იგივე თავჯდომარეობდა ქართლ-კახეთ-იმერეთის სინოდალურს კანტორაში. მას აქვს მიღებული მრავალი ორდენი. 15 მაისს 1893 წელს უმაღლესად ებოძა მას ხელმწიფე იმპერატორისაგან ძვირფასის თვალ-მარგალიტებით შემკული „გულზედ დასაკიდი“ – ჰანაგია – ერთად უმაღლესს „წყალობის წერილთან“ („რესკრიპტი“). ყოვლად-სამღვდელო ალექსანდრეს მრავალ გზის მადლობა აქვს მიღებული ხელმწიფე იმპერატორისა, მისის უმაღლესობის დიდის მთავრის მიხეილ ნიკოლოზის ძისა, ლოცვა-კურთხევა და მადლო-

\*) რიონის სადგურზე ერთად შეხვდნენ ალექსანდრე და ბესარიონი მიმავალნი თბილისში, რადგან უქაზით გურია-სამეგრელოს ეპისკოპოსად დაინიშნა არხიმანდრიტი გრიგორი და ყ-დ სამღვდელოს ალექსანდრეს და ბესარიონს არ მისცეს საკუთარი ეპარქია. შესანიშნავი სიტყვები წარმოსთქვა სახალხოდ ეპისკოპოსმა ალექსანდრემ სინოდის მოქმედებაზე. თბილისში უმეტესი ცხარე სიტყვები მოახსენა ექსარხოსს პავლეს. არ დაუფარავს ექსარხოსისათვის, და პირ და პირ უთხრა მას: „შენ განგებ ჩაიღინე ესეთი უკანონო შუამდგომლობა სინოდის წინაშე, რომ გურია-სამეგრელოს ეპარქიის ეკლესიები და სამღვდელოება უმეტესად დაგემდაბლებია და რა პასუხი უნდა აგო ღმერთს, რომელიც ხედავს ამ თქვენს უაჯაო მოქმედებას?“

ბა უწმინდესის სინოდისა და სხ... ყოვლად-სამღვდელო ალექსანდრე წვერი იყო მრავალ საქველ-მოქმედო საზოგადოებათა და დაწესებულებათა, რომელნიც კი რუსეთის სახელმწიფოში არსებობენ. რუს-ოსმალეთის ყირიმის ომის დროს სევასტოპოლის გმირთა და მათ დაობლებულ სახლობათა სასარგებლოდ ყოვლად სამღვდელო ალექსანდრე სწირავდა ყოველ წლებით 200 მანეთს. მანვე განაახლა ქ. სოხუმის ახლოს, ძველი ეკკლესია მოსახსენებლად იმპერატორის ალექსანდრე მეორის სასწაულებრივის გადარჩენისა 4 აპრილს 1866 წელსა. 25 მაისს 1867 წელს ტფილისის სასულიერო სემინარიას შესწირა 2,000 მანეთი მისის იმპერატორებითის უმაღლესობის დიდს მთავრის მიხეილ ნიკოლოზის ძის სახელობაზედ. ამ თანხით იზრდება სემინარიაში ერთი სტიპენდიანტი, რომელსაც თვით ყოვლად-სამღვდელო ირჩევს. ყაზანის სასულიერო აკადემიის ღარიბი სტუდენტების სასარგებლოდ 300 მანეთი შესწირა; ტფილისის საეპარქიო დედათა სასწავლებელს კი – 3,000 მანათი მასში სტიპენდიების დასაარსებლად. მცხეთის დიდებულს თორმეტის მოციქულის საკრებულო ტაძარს შესწირა განსაახლებლად 1,500 მანეთი და ამავე ტაძრის განმარსახლებელი კომიტეტის თავჯდომარეც ბრძანდებოდა. ყოვლად-სამღვდელო ალექსანდრემ განაახლა ჯვარის ეკლესია მცხეთის აღმოსავლეთით. განაახლა თვის სამშობლო სოფელში ძველი

ეკლესია, ლეკებისაგან დანგრეული. მან 2,000 მანეთი ქართული საეკლესიო გალობის ნოტებზე გადასაღებად გადასდო. წირვა ლოცვის გალობა კიდევ გადაღებულ იქმნა ნოტებზედ ბ. იპოლიტოვ ივანოვის მიერ და მონონებულ იქმნა სასულიერო მთავრობისაგან. მანვე გამოსცა თავის საფასით საუკეთესო ნაშთები ძველის ქართულის მწერლობისა: „მზა მეტყველება“ ანტონ ქათალიკოსისა, საბასულებან ორბელიანის „ლექსიკონი“, „ხმა ცოდვილისა ღვთისადმი“, ბ. ავალიშვილისა, ანტონ კათალიკოზის „სწორ-მეტყველება“, ამბროსი ნეკრესლის „სიტყვანი და მოძღვრებანი“ და სხვ... ყოვლად სამღვდელომ დიდი სამსახური გაუწია ქართულის დაბადების შესწორებას და დაბეჭდვის საქმეს. ყოვლად-სამღვდელო ალექსანდრემ განაახლა დიდებული მონასტრები, წმ. შიოსი და იოანე ზედაზნელისა, – პირველს 21,000 და მეორეს – 11,700 მანეთი შესწირა. ეს თანხა ხელ-უხლებლად დადებულია სახელმწიფო ბანკში და სარგებელი ეძლევა მონასტერთა შტატში მყოფ ძმათა სარჩოდ.

გაზ. „მწყემსი“

### სიტყვა

#### ყ-დ სამღვდელო ეპ. ალექსანდრეს დასაფლავებასა ზედა

წმ. შიო მღვდის მონასტერში, 1908 წ. 14 ნოემბერს.

ყ-დ სამღვდელო მეუფევე! დღეს იმოდენა სიტყვეში წოდების განურჩევლად აღნიშნეს თქვენი ღუანლი წინამეურისა, სამშობლო ეკლესიისა, სამშობლოსი და ერისა. ისე სავესებით კიდევ ვერ დაახასიათეს თქვენი ღუანლი, როგორც მოითხოვდა თქვენი პირადობა და გულ უხვობა. თქვენის ბერული ცხოვრებით და მიღება-გამოცილებით ყველას განცვიფრებაში შეიყვანდით ხოლმე, განსაკუთრებით რუსეთით მოსულებს ხოლმე და ბევრს მოსაგონადაც დარჩებით მასთან გულახდით და ბევჯელ პირ და პირი თქმა აგვირგვინებდა თქვენს ცხოვრებას და გიმრავლებდა პატივის მცემელთა, თუმცა ვიეთა არ მოსწონდათ! აი თქვენი ანდაზა „ორი შაურის მუშისა, მის ღღეში არა უშავსრა“ უნდა დარჩეს ქართველთა შორის, ამიტომ რომ ჯერ ერთი თქვენს მოსაგონად და მეორე, ცხოვრებითაც დაუმტკიცე საქართველოს და კაცობრიობასა. რა იყო ეს წმ. შიოს მო-

ნასტერი 1888 წ. და რას წარმოადგენდა? სატირელ და სა-  
ვალალოს და ქართველის იერემია ვერ მოიტირებდა იმის  
მდგომარეობას! აბა ეხლა შეჰხედოს კაცმა და შეუდაროს  
მაშინდელს მინგრეულს მონგრეულს მონასტერსა და სწორეთ  
რომ მისაბაძია ის შეუპოვარი ბრძოლა ცხოვრებასთან და  
მიზნის მისაღწევ გარემოებათა თანა რაიცა განიცადე აქამომ-  
დე. ყველა აქ მრავალთა მიერ მოხსენებულ ღუანლისა წილ  
რა მოგავეთ შენ ყოვლად სამღვდელო მეუფეო, ალექსანდრე  
ეპისკოპოზო? ვერ გიგდეთ ყური, ვერ გიჩვენეთ სიყვარული  
და მხარი ვერ დაგიჭირეთ განსამხნეველად. ყველა ჩამოგმო-  
რდით, ყველამ გილალატეთ და შენ შეგრჩა სიყმი შვილივით  
შენი მაქსიმე, რომელიც აი აქ არის დამარხული, ვერაგულად  
მოკლული და მოყვსისათვის თავდადებული. ეს რომ მოგიკ-  
ლეს გულიც გაგიპეს, გაგიტეხეს და უიმედობაში ჩაგადო  
ჩვენმა ბეჩაობამან და აი ამ უბირო ხალხის შეუგნებლობამ.  
ყოვლად სამღვდელო! ნუ დაგვწყევ უყურადღებობისთვის,  
ნუ დასწყევლი ამ ბეჩავ ხალხსა, რომელიც უვიცობას შეუპ-  
ყრია და უკუმეთის მორევში იშობა. ნუ დასწყევლი რომ  
შენი ერთგული მაქსიმე მოგიკვლეს და მით შენც სიცოცხლე  
მოგისწრაფეს. აი აგერ ისინი აქ დაგტირიან, და ტირილით  
და ცრემლით უმზერენ შენ დაკარგვას. ილოცე წინაშე ღვთის  
და იმ ერისა წმინდათ თანა შეავედრე შენი სიყვარული სა-  
ქართველო, რომ ღმერთმან დაგვიხსნას ჩვენ შინაურის მტ-  
რებისაგან, რომელიც არის გამანადგურებელი და გამათახსი-  
რებელი ერისა და აღმყრელი პირადის ღირსების ქრისტიანისი  
და მოყვასისა. თვით შენ არა გახდი მსხვერპლი ამ შინაურის  
მტერობისა, რომ მოექცე, ჩაიკეტე ამ მონასტერში და ყუ-  
რი ველარ გიგდეთ? გვაპატიე, დაგვლოცე, გვაკურთხე და  
ილოცე ჩუენთვის, რომ შენი საყურელი სამშობლოს შვილ-  
ნი და მოღუანენი არ მოეცვას პირად დიდებასა, ურთიერთა  
ქიშპობასა, ქვებუდანობასა და გამყიდველ დიდების ძებნასა;  
შეეგნოთ ის დიდი და დიდი ჭეშმარიტება, რომ ბოროტებაა  
საზოგადო საქმის შეწირვა პირადი თავმოყურებისათვის!  
ამანვე არ დასცა ჩვენი სამშობლო და ეკლესია? ამისა გამო  
არ არის შეფერხებული ყოველი კეთილი მისწრაფება? ცულს  
ტარად ჩვენივე უყრიან და იმიტომ იღუპება ყოველი კეთილი  
საქმე და მისწრაფება! მოვტიროთ მამანო და ძმანო, დედანო  
და დანო, ყოვლად სამღვდელო ღირსეული მამა ეპისკოპო-  
სი ალექსანდრე და ნუ დავივიწყებთ მისს მისწრაფებათა  
და სიყვარულს ეკლესიისა და მამულისადმი, ვემსახუროთ  
მისებრ თუ გვიყვარს იგი. მართალია იგი მიიცვალა, გარდა-  
იცვალა, გარნა ეხლა განდიდნა, ეხლა იდიდა და მომავალი  
მისი დიდებულია წინაშე ღვთისა! სიკუდილი იგივე ცხოვრე-  
ბა და ღირსეული კაცი ნეტარებით იხსენება. ვნახოთ ვინღა  
გვიალექსანდრეებს და მოსალმებით ვინ გაგვიღებს კარებს

ღმერთო საუკუნეთაო, შემოქმედო, ცათა და ქვეყანისაო! შეი-  
ვედრე სული ყ-დ სამღვდელო აღიქვანდრე ეპისკოპოსისა  
და მეოხებითა წმ. შიოსი და ყოველთა წმინდათა ივერისა  
ეკლესიისათა და წესი იგი, სადაცა მიხედავს ნათელი პირისა  
შენისა ამინ.

## მღ. ვასილ კარბელაშვილი

მღვდელ-მთავრობისა კვართითა შემკობილმან,  
„ღვთივ-მშვენიერად ჰქადაგე, შენ, სახარება...“  
(ახალ წლის დასაღებ.)

15 ნოემბერი, 1907 წ. შიომღვიმეში.

საქართველოს ეკლესიის უკვდაო მღვდელთ-მთავარო,  
ქართველი ერის თავდადებულო ჭირისუფალო! საყვარელო  
მწყემსო-მთავარო! შენმა ამიერ მიცვალებამ დღეს შეგვკრიბა  
შენნი აღზრდილნი შვილნი, რათა ჩვენი წრფელი ცრემლი  
ვაპურეთ შენს წმინდა გვამსა და უკანასკნელ ვეამბოროთ  
შენს მაღლიანს მაკურთხებელს მარჯვენასა! ჩვენ ყოველთვის  
მოქენე ვიყავით შენის მამაშვილობისა, შენის მოძღვრობი-  
სა და, აჰა, დღესაც შენი მომცინარე, მხიარული სახე გემოძ-  
ღვრის შენ ღრმად-მოხუცებულმან შეინარჩუნე, სიკვდილა-  
მდე ცხოველი სიყვარული შენის მშობელი ერისა, მისის  
სიკეთისათვის ბევრა ფიქრი საქმედ გარდაჰქმენ და შენდა  
უფლისა მიერ მინდობილის ტალანტისა ერთი ათად აღ-  
მაროძინებელი მხიარულის სახითა წარსდგები წინაშე პირუ-  
თვენელისა მსაჯულისა! ჩვენ ყველამ კარგათ ვიციით შენი  
განვლილი ცხოვრება, იგი მეტად ნარ-ეკლიანი და ხიფათიანი  
იყო, მაგრამ შენ აღფრთოვანებული იყავ უკეთესი მერმისის  
სასოებით და ქედი არ მოუდრიკე შენის მშობელი ერის  
შამმუსრველ ძალასა. შენი ცხოვრების ეკლიანი გზა უპოვა-  
რებით აღსავსე ცხოვრებით განვლე, სათნოებითა და უბი-  
წოებით ხვიდოდი და ნათელ მოსილი სახით დაიძინე ძილი  
ეგე მართალთა!

შენ საქმით აღასრულებდი ღვთის მცნებათა და ჭირსა  
შინა მყოფთა გვამხნევებდი „დათმენად ფერად-ფერადთა სული-  
სა ქენჯნათა და ტანჯვათა.“

მთელი შენი სიცოცხლე იყო „ნებსით უარყოფა ხორ-  
ცისა,“ რათა სული შენი „ზე აღგვევლინა.“ ამიტომ შენ  
უპოვარებაში განვლე შენი ცხოვრება, ყოველ დღე ჰზოგავ-

დი შენს ქონებრივ შეძლებასა, შენს ნაშრომ-ნაღვანსა.  
მე თვით არა ერთხელ ვყოფილვარ მონამე შენის მოთმინე-  
ბისა და ღვანლისა. შენ შეგეძლო ფუფუნებით გეცხოვრა,  
სხვებივით საუკეთესო საზრდო-სანოვავით გენებივრებინა შე-  
ნი თავი, მაგრამ ყოველ ცისმარე დღე პურსა და წყალზედ  
ალამებდი და ჩვენ ყველას გვაძლევდი მაგალითსა სათნოები-  
სა და მოთმინებისასა, რომ შენი მშობელი ერის საქმისათვის  
მოგეხმარებინა ასე დაზოგვილი მწვლილი. ამ გზივ მრავალი  
ობოლი და სიღარიბეში მყოფი ყრმა გაგიზარდა შენმა უხვმა  
მარჯვენამ.

შენ ჩაუდგი მკვიდრი საძირკველი ქართული ძველი გა-  
ლობის აღდგინების საქმესა, შენ დასტამბე მრავალი ქარ-  
თული ძველი ხელნერი და, ვითარცა ფასდაუდებელი  
საუნჯენი, არ დაუკარგე შენ მშობელ ერსა; შენ განაახლე  
ძველ ტაძართა ნანგრევნი და მხეცთა და ნადირთა ბუნაგად  
ქცეულნი – ბერ-მონაზონთა საცხოვრებელად ჰყავ.

აჰა, ტაძარი და სავანე ღირსის შიოსი, რომელი მკა-  
ფიოდ ღალადებენ შენს ქველობასა, შენს ადამიანობასა! შე-  
ნის მღვიძარებით და თავ-გამოდებულის შრომით შენ ვითარ-  
ცა ფინიკ ამა კლდე-ღრეთა შორის ალაყვავილე წმ. შიოს  
სავანე ესე და ძველი დიდება კვლავ აღუდგინე. ესრეთის  
ქველის საქმით შენ აღიდე ღმერთი და მიემსგავსე ძველ ქარ-  
თველ მღვდელთ-მთავრებსა, რომელნიც „ჭირსა შინა ქვი-  
თკირობდნენ“ და უკეთესის მერმისის სასოებას აღეტყინე-  
ბდნენ თავის სამწყსოსა.

შენ ღირსეულად განვლილის ცხოვრებით უხვად მიუ-  
წყე ღვთისა-ღმერთსა და ერისა-ერსა.

შენი ბერ-მონაზონებრივი ცხოვრება ესრეთ განუწყვე-  
ტელი სათნოება იყო და იგი წინ დაუდგინე ჩვენ დაცე-  
მულს ბერ-მონაზონობასა.

შენგნით აღზდილ და მწყსილნი შვილნი ცრემლით გვევდ-  
რებით ნუ მოგვაგლეხს შენის სულის სიმტკიცესა, შენს მხნეო-  
ბასა. აჰა, საყვარელო მღვდელთ-მთავარო, შენ მიერ ხელ-  
დასხული მღვდელი სასოებით მოვიდრეკ მუხლთა ჩემთა წი-  
ნაზე შენის ცხედრისა და თვალ-ცრემლიანი ვემთხვევი შენს  
წმინდა მაკურთხეველს.

განისვენე ნეტარებით, საყვარელო მწყემსთავარო! აჰ-  
შენი შვილებრ აღზრდილი ლეონიდიც თავს დაგტირის ჩვენ-  
თან ერთად; აგერ შენი ერთგული მაქსიმეც ხელ-განჰყრო-  
ბით მოგეგებება და გეამბორება.

მოვედით ძმანო და მეგობარნო, უკანასკნელი ამბორი  
მივსცეთ ჩვენს დაუვინყარს მღვდელთ-მთავარს ალექსანდრეს!..

**მღ. პ. კარბელაშვილი.**



## ეპისკოპოზი ალექსანდრე

† ამ წლის 9 ნოემბერს, შიო-მღვიმის მონასტერში გარდაიცვალა ოთხმოცდა სამის წლის მოხუცებული მღვდელთმთავარი ალექსანდრე, რომელიც საქართველოში ცნობილი იყო, როგორც ქველმომქედი და მაღალ ზნეობით შემკული ადამიანი.

ეპისკოპოსი ალექსანდრე დაიბადა 1824 წელსა გორის მაზრის ერთს სოფელში. მისი მამა დავით ოქროპირიძე სოფლის მღვდელი იყო... ერის კაცობაში ეპისკოპოსს ალექსანდრეს ერქვა ალექსი დავითის ძე ოქროპირიძე. ის ჯერ სწავლობდა გორის სასულიერო სასწავლებელში, შემდეგ ტფილისის სასულიერო სემინარიისა და ბოლოს ყაზანის სასულიერო აკადემიაში, რომლის კურსიც დაამთავრა 1850 წელსა. ბერად აღიკვეცა ალექსი ოქროპირიძე 1845 წელს სას. სემინარიაში კურსის დამთავრების შემდეგ და სახელად დაერქვა ალექსანდრე. 1850 წლიდან იწყება მისს სამსახური მშობლიო ერის სასარგებლოდ... ის მსახურებდა მასწავლებლად-ზედამხედველად, მისიონერ-მქადაგებლად, ეპისკოპოსად საქართველოს სხვა და სხვა კუთხეში... ეპისკოპოსად აკურთხეს 1862 წელსა. 1898-1903 წლებში ის მსახურებდა მღვდელთმთავრად გურია-სამეგრელოს ეპარქიაში. 1903 წელს ყოველად სამღვდლო ალექსანდრე გათავისუფლებულ იქმნა ეპარქიის მართვა-გამგეობისაგან და დაესახლა მცხეთის ახლო შიო-მღვიმის მონასტერში, რომელიც მანვე განაახლა...

ეპისკოპოსი ალექსანდრე ცნობილი იყო საქართველოში, როგორც თავისი სამშოლოს და მოძმე ერის შეგნებული და მხურვალედ მოყვარე. ის თავგამოდებით იცავდა ქართულს ენას, ქართულს გალობას, სცდილობდა ქართველი ერის გაუმჯობესებას, მისთვის გადაშენება-გადაგვარების მომაკვდინებელი შხამის თავიდან ამორებას... მართალია ბერი (მონოზონი) იყო, თითქოს მოშორებული წუთისოფელს, მაგრამ მოსწონდა ბერობა საქმიერობითი, ღვანლით მოსილი, რომელსაც თვის ტომი, ტოლი და სწორი გულიდამ ამორეცხილი არ ჰყავს... ასეთი შეხედულებისა იყო ეპისკოპოსი ალექსანდრე ბერობაზე და ამის მეოხებით მონასტერში კი არ იყო მხოლოდ კარ-ჩაკეტილი, მართო თავისათვის კი არ ჰზრუნავდა, არამედ ერის სასარგებლოდ დაუღალავად შრომობდა... მეტად საგულისხმოა მისი სიტყვები, რომელიც წარმოსთქვა სიღარიბეში გარდაცვლილის ქართველი მოღვა-

წის ივანე კერესელიძის დასათვლავებაზე; „დროა გავახილოთ თვალები, შევიგნოთ ჩვენი მოვალეობა, ვუშველოთ ჩვენს თავს, ჩვენს ერს საქმე ვუკეთოთ, მარტო წერა, ბეჭდვა, ლაპარაკი არ კმარა. დავავალოთ შეძლებულ ქართველებს საწყალი ქართველი ხალხის პატრონობა, მფარველობა და ქომაგობა, თორემ დავიღუპებით, აღვიგვებით! „სამშობლოს და ერის სიყვარული ჰქონდა სათუძვლად და მთავარ წყაროდ მისს მრავალ გვარს მოღვაწეობას საქართველოს სხვა და სხვა კუთხეში.

ყოვლად სამღვდლო ალექსანდრე ქართველის ერის გამაძლიერებელს ძირითად საშვალებად სთვლიდა წმინდა ეროვნულს სწავლა-განათლებას. ის მეტად გულნატკენი იყო იმის გამო, ქართველი ახალთაობა ჩვენის ქვეყნის სასწავლებლებში სწავლა-აღზრდის უცხო, გაუგებარს, არა-სამშობლო ენაზე წარმოების მეოხებით გადაგვარების გზაზე იყო დამდგარი. ქართველმა ახალთაობამ სამშობლო ენა ან არ იცოდა და ან იცოდა სუსტად, მშობლიურს ნიადაგს მოშორებული იყო, გულ-გრილად უცქეროდა სვე ბედს თვისი ღვიძლი ერისას, რომლის აწმყო და წარსული არ გაეგებოდა... ხშირად იტყოდა ხოლმე განსვენებული მღვდელთ მთავარი: „ნეტავი როდის ეღირსებათ ქართველებს ქართული სკოლაო-“... ბევრჯელ მას თავისი აზრი გამოუთქვამს სასულიერო სასწავლებლებისა და სემინარიაში ქართულს ენაზე საგნების სწავლების შესახებ პირდაპირ, უშშირად, სიტყვით და წერილობით რუსეთიდან გამოგზავნილი უფლებით მოსილი მოსული მოხელეების (რევიზორების) წინაშე, მაგრამ მისს წინადადებას იმ დროს ყურადღებას არავინ აქცევდა. თუმც თანამგრძობი არ იყო სწავლა-აღზრდის აწინდელი წესისა, მაგრამ ეპისკოპოსი ალექსანდრე დიდად აფასებდა საზოგადოდ ცოდნის შეძენას და სულ უსწავლელად დარჩენას ქართველისათვის უბედურებად სთვლიდა. ის უხვს დახმარებას უწევდა მრავალს ღარიბს მონაფეს, რომელთაც თვისს სტიპენდიებს უნიშნავდა და ამის მეოხებით შეძლებას აძლევდა დაემთავრებიათ სწავლა-განათლება. სტიპენდიები ჰქონდა ტფილისის სასულიერო სემინარიასა, სასწავლებელსა და საეპარქიო საქალებო სასწავლებელში. ამას გარდა ეპისკოპოსი ალექსანდრე კერძო ქველ-ქვემოქმედებითაც ცნობილი იყო, რომლის შესახებ ლაპარაკი არ უყვარდა... ქრისტეს მცნების თანახმად, იმისმა მარცხენამ არ იცოდა, რას სჩადიოდა მისი მარჯვენა... ის ცხოვრობდა სადათ, მარტივად, – ჭამა-სმასა და ჩაცმა-დახურვაში მეტად ზომიერი იყო... გველაძეობა, ქვეშ-ქვეშაობა ეჭავრებოდა... გულ ახდილი, პირდაპირი ლაპარაკი უყვარდა...

მან თვისი საფასით მრავალი ძველი ქართულის ხელთნაწერი დაბეჭდა და მათ შორის ქართული ლექსიკონი საბა სულხან ორბელიანისა, შედგენილი მეთვრამეტე საუკუნეში,

ქართული სწორმეტყველება (გრამატიკა) ანტონი კათოლიკოსისა, იმავე საუკუნეში შედგენილია შიო მღვიმის მონასტრის გუჯრები და ბევრი კიდევ სხვა...

ეპისკოპოსი ალექსანდრე სარწმუნოების მოყვარე იყო; იმისი რწმენით, სახარების სწავლა მხსნელი, გამწმენდელი და ხელმძღვანელია ადამიანისა, რომელსაც უნდა უყვარდეს თავისი სჯული, თავისი სარწმუნოება... დიდძალი ქონება შესწირა ეპისკოპოსმა ალექსანდრემ, სარწმუნოების მოყვარემ, ძველი ქართული ტაძარ-მონასტრების განახლებას... უფრო დიდი ამაგი მიუძღვის მას შიო-მღვიმის მონასტრის განახლების საქმეში... აქ თავისი საფასით განაახლა მან ორი დიდი ტაძარი, აღაშენა ბერების სახანეები, გაიყვანა გზა, მდინარე მტკვარზე გამართა ბორანი და დაარსებინა რკინის გზის ბაქანი მატარებელთა გასაჩერებლად...

ეპისკოპოსი ალექსანდრე წვერი იყო ქართველთა შორის წერა-კითხვის გამავრცელებელის, პირუტყვთა მფარველის, საქართველოს ისტორიის და ეტნოგრაფიის საზოგადოებათა, ღარიბთა დამხმარე სხვა და სხვა ძმობათა, საპატივო წვერი ქართლ-კახეთის სამღვდელთა სიძველეთ-საცავისა და სხვა... არ არის არც ერთი ქართული დანესებულება და საქმე, რომ მას გვერდი აეხვიოს და სიტყვით და საქმით თანაგრძნობა არ გამოეცხადებინოს.

საუკუნოდ იყოს ხსენება და კურთხევა შენი, სასიქადულ ქართველო მღვდელთ-მთავარო!

**ნ-ძირელი.**

### **ეპისკოპოზი ალექსანდრე**

შარშან გიორგობისთვის, ისტორიაში განთქმულ შიო-მღვიმის ლავრაში – გარდაიცვალა ღრმად მოხუცებული, 83 წლისა, ეპისკოპოზი ალექსანდრე. ქართველი საზოგადოება სიყვარულით გამოეთხოვა განსვენებულ მღვდელმთავარს და დიდი წარჩინებით მიაბარა მისი გვამი საფლავს სრულიად საქართველოს სახელოვან მეფე დავით აღმაშენებლის მიერ აგებულ ტაძარში, რომელიც შეაკეთა და განაახლა თვით განსვენებულმა მწყემს-მთავარმა თავის ხარჯითა და საფასით. დასაფლავების დროს სასულიერო და საერო ორატორებმა ბევრი წრფელი სიტყვა სთქვეს, მოიგონეს მისი კეთილი და სპეტაკი ხანგრძლივი ცხოვრება, აღსავსე დაუსრულებელ სიყვარულით სამშობლოსა და მოყვასისადმი, იქვე იყო განსვენებულის აღზრდილი მღვდელ-მთავარი ლეონიდი, ეპისკოპოზი იმერიოთისა. უკანასკნელად ეამბორა იგი საყვარელ ბიძას და ათრთოლებული ხმით მოიგონა მისი კეთილი

ზრუნვა და ამაგი.

მაღლე შესრულებდა ასე წელიწადი მას აქვთ, რაც დაობლდა ივერიის თავისუფალი ეკლესია. მოგვეხსენებათ, რომ ობლისა და ქვრივის ცხოვრება სანეტარო არ არის. ბრალიანი და უბრალო სჩაგრავს ოხერსა და უპატრონოს, რადგან შემბრალებელი და გამკითხავი მათ არა ჰყავთ, ასე დაემართა ივერიის ეკლესიასაც. აეხადა შარავანდდით მოფენილი გვირგვინი, გაიძარცვა, გალატაკდა და სულით დაეცა. ტაძარნი და მონასტერნი, ეს ჩვენი წარსულის დროის აკადემია – უნივერსიტეტი, საიდანაც ეფინებოდა უხვად ქართველ ერს მაღალ ზნეობის სწავლა-მოძღვრება და შუქი საერო განათლებისა და სადაც იზრდებოდნენ ქვეყნის მოჭირნახულენი მტკიცე ზნეობისა და ფოლადისებური ხასიათისა, ოხრდებოდნენ და იქცეოდნენ უპატრონობით და მოუვლელობით.

აი სწორედ ამ აკადემია-უნივერსიტეტების აღდგენას შეაღია თავისი ძალღონე და საფასი განსვენებულმა მღვდელმთავარმა. განაახლა და გააპატიოსნა შიო-მღვიმის დიდებული ლავრა და იოანე ზედაზნელის მონასტერი. პირველს შესწირა 21,000 მანეთი, ხოლო მეორეს 11,700 მანეთი და ამ უხვი შეწირულებით უზრუნველ ჰყო მათი მკრთალი არსებობა მანაც \*) ეს აღმაშენებლობაა მიზეზი, რომ ჩვენმა მწერლებმა ნ. თ. ხიზანაშვილმა, ილ. ფერაძემ და ა. ნატროშვილმა სიცოცხლეშივე დაარქვეს განსვენებულ მღვდელმთავარს „ალექსანდრე აღმაშენებელი“.

შესანიშნავი მიწვევით აღმაშენებელი რკინის კაცი იყო, გარეშე მტერს ხმა ჩააწყვეტინა და მარჯვენა დაუდუნა, მოლაღატენი მატლივით გასრისა, ერის ზნეობა აამაღლა, სწავლა-ცოდნით გაავსო სამშობლო, ციხე-ქალაქებით

---

\*) მცხეთის ტაძრის შესაკეთებლად შესწირა 1,500 მ.

და ეკლესია-მონასტრებით მოჰყვინა, ერთი სიტყვით ააყვავა, და ააშენა საქართველო. ამ გზასავე ადგა განსვენებული მწყემსთ-მთავარი ალექსანდრე. მისი ხმალი იყო კეთილი და სათნოიანი ცხოვრება, უზომო სიყვარული სამწყსოსი და სამშობლოსი. ყველაფერი სამშობლოს და მოყვასსაო, რასაც შოულობდა და პოულობდა, სულ სხვისთვის ემეტებოდა. თვითონ კი იცვამდა და იხურავდა, როგორც უბრალო მწირი ბერი, საზრდოობდა პურით და მწვანილით. სასმელად ჰქონდა ცივი წყალი და სტუმართათვის ნობათად ქართლური პანტისა და ვაშლის ჩირი, კერკი და გაფუჭილი ქართლური ჩურჩხელა.

განსვენებული მღვდელ-მთავარი ალექსანდრე სრული განხორციელება იყო ძველის მოღვაწე-მოქადაგე ქართველ ბერისა, რომელიც მთელ თავის სიცოცხლეს სამშობლოს დი-

ლებას ალევდა. ეკლესია და სამშობლო, მაშინ ერთი და იგივე იყო. ბერის ბერობა იხატებოდა იმაში, რომ მუდმივ მოღვაწეობდა, მოქმედებდა, აშენებდა ეკლესია-მონასტრებს, მწერლობდა, ხელოსნობდა, ქადაგებდა, მოქალაქობდა. ასეთი საქმიანობა მიაჩნდათ ღვთის სამსახურად და აბა მაშინდელი ქართველი, მოტრფიალე ქრისტეს დიდებულ სწავლა-მოძღვრებისა რას დაზოგავდა და დაიშურებდა.

ბერი ალექსანდრე დიდი მოტრფიალე იყო სწავლა-განათლებისა და ცდილობდა შეენყო ხელი ამ საქმისათვის. მომეტებული ნაწილი თვისის ავლა დიდებისა ამ საქმეს მოახმარა, ზრდიდა თვისის ხარჯით ყრმათა და ქალთა. ამ აზრით შესწირა ტფილისის სასულიერო სემინარიას 2000 მან. და ტფილისის საეპარქიო სასწავლებელს 3000 მან.

წარსული ჩვენი დიდება და განათლება ცხადად სჩანს იმ აუარებელ ხელთანხრებიდან, რომლებიც ბლომადაა შეკრებილი წერა-კითხვის გამავრცელებელ საზოგადოებაში და საეკლესიო მუზეუმში. უფულობის გამო ვერავინ კისრულობს მათ დაბეჭვდას, რადგან ხარჯი დიდი უნდა, ეს დიდი საქმეც იკისრა განსვენებულმა მღვდელ-მთავარმა და თვისის საფასით დაბეჭვდა: „მზა-მეტყველება, ანტონ კათოლიკობისა, „ლექსიკონი“ საბა-სულხან ორბელიანისა, „ხმა ცოდვილისა ღვთისადმი“ ავალიშვილისა, „სიტყვანი და მოძღვრებანი“ ამბროსი ნეკრესელისა, „ლექსიკონი“ რაფაელ ერისთავისა, „შიო მღვმის „ისტორიული საბუთები“ და სხვანი.

ღვანლ მოსილ, ეროვნულ, თავისუფალ ივერიის ეკლესიას, თავისუფლების დროსვე ამშვენებდა და ამკობდა მშვენიერი საეკლესიო გალობა, გულს ჩამწდომი და სასოების აღმძვრელი. ობლობასა და ქვრივობაში ეს განძიც დაჰკარგა ჩვენმა ეროვნულმა ეკლესიამ და დარჩა ამარად დიაკვნების უგემურ ვითომდა გალობისა. განსვენებულმა მღვდელ მთავარმა არც ეს ფრიად მნიშვნელოვანი საგანი დასტოვა უყურადღებოდ და გადასდო 2000 მან. მის აღსადგენად და ნოტებზე დასაწყობად. ეს საქმე დაავალა მუსიკის მცოდნე იპპოლიტოვ-ივანოვს, რომელმაც უკვე შეასრულა ასეთი დავალება ივერიის ეკლესიის ჭირისუფლისა. დღეიდან ჩვენს საეკლესიო გალობას ხიფათი აღარ მოეღის, რადგან იგი გადაღებულია და დაწყობილი ნოტებზედ ეპისკოპოზ ალექსანდრეს წყალობით.

ასეთი იყო განსვენებული ბერი ალექსანდრე, აღსავსე უბოძო სიყვარულით სამშობლოსა და მოყვასისადმი, მისი მზრუნველი და მოჭირნახული, კაცი სათნოიანი, წყნარი და თან გულადი და უშიშარი. ამა ქვეყნის ძლიერთა წინაშე ქედს არ იხრიდა და როცა საჭირო იყო, თამამად ამხილებდა და უძრახდა ხოლმე უნაყოფო ცხოვრებას. თ. ლევან მელიქიშვილის დასაფლავებაზე პირდაპირ სთქვა განსვენებულმა –

ბევრის სიკეთის მოტანა შეგეძლო, რადგან იყავ ძლიერი და მდიდარიო, მაგრამ ისე მიიცვალე, რომ ქვეყანას არათფერი არგეო.

ხანგრძლივი ცხოვრება განსვენებულ მღვდელ მთავრისა განუწყვეტელი სამსახურია დაობლებულ ივერიის ეკლესიისა და წამებულ სამშობლოსი. მადლიერი ერი არ დაივინწყებს თვის საყვარელ მწყემსს, მის მირონცხებულ მარჯვენას, სათნოებით და სიკეთით საფსე გულს და მამაშვილურ მზრუნველობას ჩვენდა სასიკეთოდ და ზნეობრივად აღსამაღლებლად. მართალი სთქვა „უკვდავმა“ ილია ჭავჭავაძემ, გამოთხოვების დროს, გურია-სამეგრელოს ეპარქიაში რომ გაისტუმრეს ტფილისიდან ეპისკოპოზი ალექსანდრე: „თქვენი ცხოვრება სათნოების სკოლაა ჩვენთვის და ამიტომაც მართო ერთი ხსენება თქვენის სახელისა ჩვენი მწვრთნელია. ოჰ, რა ბედნიერია იგი კაცი, რომელიც გწვრვთნის და გვასწავებს ჩვენ არამც თუ ჩვენთან ყოფნით, არამედ მართო თავის სახელის ხსენებითაცა, ამბობს ნატვრით ერთი ძველი ბრძენიო“.

სიცოცხლის დროს განსვენებულ მღვდელ-მთავარ ალექსანდრეს ქართველმა ერმა მიართვა ძვირფასი სამღვდელ-მთავრო კვერთხი ნიშნად სიყვარულისა და პატივისცემისა.

ყოვლად სამღვდლო ალექსანდრე, ბერობაში ალექსი ოქროპირიძე, დაიბადა ქართლში, ს. დისევში, 1824 წ. სწავლობდა გორის სასულიერო სკოლაში, შემდეგ ტფილისის სემინარიაში და სწავლა დაამთავრა ყაზანის სასულიერო აკადემიაში, ეპისკოპოზად აკურთხეს 1862 წ. ტფილისის საკათედრო სიონის ტაძარში. მღვდელ-მთავრობდა აფხაზეთში, გურია-სამეგრელოსა და ქართლში. სინოდმა მრავალი ჯილდო უწყალობა განსვენებულს, ხოლო მთავარ-ეპისკოპოზის ხარისხი მაინც არ მისცა.

**ალ. ყიფშიძე.**

---

### სიტყვა

**თქმული დეკანოზი დ. ხახუტაშვილის მიერ ნეტარ ხსენებულის ეპისკოპოზის ალექსანდრეს ცხედრის წინაშე და საფლავების დღეს შიო მღვიმის მონასტერში.**

სახელითა მამისათა და ძისათა და სულისა წმიდისათა. მოველ მეც, რათა თაყვანი ვსცე წაქვენს წმიდა ცხედარსა, ჩვენო სასოება მეუფეო. მოვედი შორის მესხეთიღვან, რომლისთვისაც ისრე გული შეგტკივოდა, რომლის ავს, თქვენს ავად ითვლიდით და კარგს კარგადა; რომელზედაც ყოველი

ხილვის დროს გულს მხურვალეთ გამომკითხავდით მის ბედსა და უბედობასა და, თუ იპოვნინდი რამე კარგს მხარესა მის ცხოვრებაში, აღივსებოდით სიამოვნება კმაყოფილებითა, ხოლო უბედობა მისი და სიბნელე მისთა მცხოვრებთა მოგფენდა კაემანსა. გარნა არა მარტო მესხეთი იყო საგანი თქვენი მამობრივი მზრუნველობისა, ამნაირისავე სიყვარულით ეალერსებოდით ყველა კუთხეს ჩვენი დაბეჩავებულს ქვეყნისას და ყველასათვის ერთნაირად ცდილობდით შვება-ლხენას მისცემოდა, კეთილ-ქრისტიანულ გზაზედ ეარნა და დაეთრგუნა სიბნელე, ეს გამანადგურებელი ჩრჩილი ადამიანთა სიცოცხლისა, კეთილ-დღეობისა, წინმსვლელობისა. ამ ნაირივე ქრისტიანული სიყვარულით ეგებებოდით ყოველი ქვეყნის, ხალხის კარგსა, ინყენდით ავსა.

ზემო ნათქვამთა ნათელ საყოფელად საკმარია მხოლოდ დავასახელოდ რამდენიმე-ფაქტი თქვენის ცხოვრებისა, თქვენის მოქმედებისა, თქვენი საფასით აღიზარდნენ სხვა-და-სხვა სასწავლებლებში მრავალნი შვილნი ჩვენის ქვეყნისა. თქვენ განვიახლეთ არა ერთი დიდება ჩვენის წარსულის ცხოვრებისა – მონასტერი – და ამითი თვალი აგვიხილეთ, რათა შეგეყვარებინათ ჩვენთვის ჩვენი თავი, რათა მოგეცათ მაგალითი, გაგემხნევიბინეთ ჩვენ დალაჩრებულნი, დამცონარებულნი, უთავდარიკოდ ქცეულნი. თქვენი საფასით გამოეცით არა ერთი საუნჯე ჩვენი წარსული გონიერებისა, რათა ამითი გაგემდიდრებინათ, წინ წაგენიათ, გაგემხნევიბინათ ჩვენი დაკნინებული ცხოვრება გონების მხრით, დაკნინებული მწერლობა, დაკნინებული ენა. შენ ყველასფერს იკლებდი, ატარებდი ბერულ ცხოვრებას, რათა ზედ მიწევნით აღგესრულებინათ ქრისტეს მცნებანი, ხოლო თუ რამე მოგეპოვებოდათ სთესავდით ამით მადლსა და სიკეთესა.

ცხოვრება თქვენი, როგორც სასულიერო პირისა, იყო აღსავსე სასობითა ღვთისადმი, აღსავსე უმაღლესი ზნეობრიობით, ზომიერებითა, თავ-მდაბლობითა. ქვეყნიურს ცხოვრებას თქვენ არასფერად არ ავდებდით, ვითარცა მოსავი ქრისტესი და ამიტომ იყავით პირადი, სიმართლისათვის თავ-დადებული, ავის მძრახველი, ვისშიაც უნდა შეგენიშნათ იგი, თუმცა არა ერთხელ შეგმთხვევია ამისათვის უსიამოვნება.

ბოლოს დაღლილმა, დაქანცულმა ამა ცხოვრების ამოვებასთან ბრძოლით დაუტევე ხორციელი ესე ცხოვრება, ვითარცა ტვირთი მძიმე, რათა წარსდგე წინაშე ზეციერის მსაჯულისა. განგვშორდი, ჩვენო სასოება მღვდელ-მთავარო, მოგვაკლე თქვენის კეთილ ზნეობრივი მაგალითები, გულწრფელი რჩევა-დარიგება და ამითი ჩაგვაგდე ურარო სიმძიმელში, დარდში, საგონებელში, ვინ ვიშოვოთ თქვენებრ კეთილი მაგალითი ქრისტეს მოსავეებისა?! ძნელია მეტად ეხლანდელს უსარო ცხოვრებაში ვიპოვნოთ იმდენად შემკული სასოებითა,

როგორც თქვენ და აი ამიტომ ვიშიშვით დიდის მწუხარება-ვაე-ბითა. ხოლო თუ ეს სიმძიმელი ცივი გულიდგან არ ამოდის, თუ მართლა მაღლიერნი შვილნი ვართ თქვენი, ამას დავამტკიცებთ იმითი, რომ თქვენს წმინდა ცხოვრებას დავისახავთ მაგალითად, თქვენ მიერ ნავალ გზაზედ ვივლით, თქვენ დიდთა საქმეთა ნავაძავთ. ესე ყველა იქნება თქვენს მაგიერი ნუგეში ჩვენთვის, ხოლო თქვენი სპეტაკი სულისათვის საოხი იმა ცხოვრებაში, ვინაიდგან ამითი ნათელი ყოფილ იქნება, რამე თქვენდა მინიჭებული ღვთისა მიერ ტალანტი კეთილად გინაღმართებით. ამინ.

### დეკანოზი დიმიტრი ხახუტაშვილი.

#### სიტყვა

**თქმული შიო-მღვიმის მონასტერში ალექსანდრე ეპისკოპოსის დასაფლავების დღეს.**

ყოველს ერს ყავს თავის წინამძღოლნი, მოწინავე პირნი, გამოჩენილნი მოღვაწენი, რომლებიც შეადგენენ ერის ძალას, ერის სიმდიდრეს, ერის დიდებას. ჩვენც, ქართველებსა, დღემდისაც გვყოლიან და ეხლაც გვყვანან დიდებულნი მუშაკნი, ზეგარდმომადლით ცხებულნი მოთავენი, რომლებიც მუდამ იღვწოდნენ და დღესაც დაუცხრომლად იღვწიან ჩვენის ერის წინსვლელობისათვის, ჩვენის ერის კეთილ-დღეობისათვის, ჩვენის ერის ბედნიერებისათვის.

აი ამ რჩეულთა მოღვაწეთა შორის, უეჭველად, ერთი უპირველესი ადგილთაგანი ეჭირა ან უკვე განსვენებულს, საქართველოს ეკკლესიის მნათობს, სასიქადულო ეპისკოპოსს ალექსანდრეს... სამშრბლოს ღრმად მოყვარული, ერთგული შვილი საქართველოს ეკკლესიისა, შარვანდოსანი მღვდელთმთავარი ალექსანდრე დაბადებიდან სიკვდილამდის ერთგულად ემსახურებოდა მამულს და ეკკლესიას, მთელი ცხოვრება განსვენებულისა მოწამეა იმის, რომ მას ქონდა სარწმუნოება ურცხვენელი, სასოება მტკიცე, სიყვარული შეუორგულელებელი – მთელი ცხოვრება განსვენებულისა მოწამეა იმისა, რომ საქართველოს ამ დიდებულმა შვილმა დიდებულად შეასრულა თავისი დანიშნულება, ჩინებულად მოიხადა ამ ქვეყნის ვალი და განწმენდილი, განსპეტაკებული დღეს მხიარულად წარმდგარია წინაშე ღვთისა, რომ მიიღოს მისგან უხრწნელი გვირგვინი დიდებისა.

ნეტარება იმ დედას, იმ ქართულ მანდილოსანს, იმ ღვთისნიერ ადამიანს, რომელმაც პანია ალექსი ოქროპირიძეს



ანოვა თვისნი ძუძუნი და ტკბილ რძესთან ერთად ჩაუნერგა მას გულში უელრმესი სიყვარული ღვთისა და მოყვასისადმი.

გიხაროდენ, მეუფეო, და შესწირე მადლობა შენს მთარველს ანგელოზს, რომ სიყრმიდგან აქამომდე დაგიფარა შენ მან ეშმაკის საფრთხეთაგან და მშვიდობით გამოგასალმა შენს მადლიერს სამშობლოს:

იცოდე, მეუფეო, რომ გმადლობს შენ საქართველოს ისტორია, რომლის განმტკიცებას შენ ხელს უწყობდი და რომლის ნაშთთა შენ იყავი მცველი და მფარველი; გმადლობენ შენ წმინდანი კაპადოკიელი მამათმთავარნი: შიო მღვიმელი და იოანე ზედაზნელი, რომელთა სავანენი შენ აღადგინე და განამშვენე შენის წვლილთა.

გმადლობს შენ, მეუფეო, ენა მშობლური, ენა ქართული, რომლის აღორძინებას და გაძლიერებას შენ ეტრფოდი წრფელის გულითა.

გმადლობს შენ, მეუფეო, ერი ქართველი, რომელსაც შენ აღუზარდე და მემკვიდრეთ დაუტოვე შენებრ მორწმუნე და სამშობლოსათვის თავდადებული მღვდელთ მთავარი, აი ეს შენი ლეონიდი, რომელიც ასე გულდანწყეტილად დღეს ეთხოვება შენს წმიდა ნაშთსა.

მადლიერი შენის ღვანლისა და დღეს გულდამწვარი შენის დაკარგვითა სრულიად საქართველოსა და კერძოდ გურია-სამეგრელოს ეკკლესია გეთხოვება შენ, მეუფეო, და ჩემის ცოდვილი ბავითა გვევდრება: ევედრე, მამაო წმიდაო, ყოვლად წმიდა ღვთის მშობელს მარიამს, რომლის წილხდომილი ქვეყანაა ჩვენი საქართველო, რათა მან ყოვლად მონყალემან მოუვლინოს საქართველოს ეკკლესიას კეთილ დღეობა და ქართველს ერს მომადლოს: სარწმუნოება ურცხვნელი, სასოება მტკიცე და სიყვარული შეუორგულებელი...

მშვიდობით, მწყემსო კეთილო!.. გვაკურთხენ, წმიდაო მღვდელთმთავარო!.. ამინ.

ფოთის საკათედრო ტაძრის მღვდელი იოანე ბობოხიძე

### სიტყვა

**ყოვლად სამღვდლო აღიქსანდრე ეპისკოპოსის  
გარდაცვალების გამო მისს ყ-დ უსამღვდელოესობას  
ეპისკოპოსს ლეონიდს.**

ყ-დ უსამღვდელოესო მეუფეო! მართა და მარიამთან მათი ძმის ლაზარეს მიცვალებაზედ, თვით მაცხოვარი ღმერთკაცი იესო ქრისტე შესწუხდა და ცრემლეობდა. თქვენ მეუ-

ფეო, როგორც კაცი და ნანდვილი ქართველი გულკეთილი, განათლებით მგრძნობი ყოველივე ქვეყნიური და ზეციური მოქალაქეობისა, რა გასაკვირველია ვინმესაგან, რომ დიდი მწუხარე იქმნებით თქვენი ღვიძლითი საყვარელი და სასიქადულო ბიძის ყ-დ სამღვდელო ალექსანდრეს საუკუნოდ მიძინებისათვის; გიბედავთ და მოგახსენებთ, რომ მთელად საქართველოში სასიქადულო არსება იყო, კაცი იგი უმანკო, ნათლით მოსილი, არა ანგარი, არა მომხვეტი, არა პირადათ ვინმებთან სათნო, არა შემკრები სიმდიდრისა; არამედ კანონიერი შემოსავალი, რაიცა შემოდიოდა, იმასაც ყოველივეს ახმარდა ქველს საქმეებს და ყოველ გაჭირვებულთ ცხოვრებაში აძლევდა შემწეობას და ნუგეშს.

ვკადნიერობ მოხსენებათ, კაცი იგი და დიდათ პატივცემული ნეტარხსენებული ყ-დ უსამღვდელოესი და თქვენი მეუფების საყვარელი ბიძა ალექსანდრე, ყოველი ქვეყნის სასიქადულო და დიდი მოძღვარი იყო, მასთან თქვენი აღმზრდელთ, ღვთის სასიამოვნოთ თქვენი გზის მანძილის დანიშნულების მაჩვენებელი და სხვა. ნუ უკვე დიდი სამწუხარო არ იქმნება თქვენი მეუფებისათვის ამ გვარი ბიძის და მამის საუკუნოთ მოშორება და დაკრძალვა? ჭეშმარიტათ ყოველ მოფიქრების და გახსენების დროს დიდი მწუხარება აღიძვრის თქვენს წმინდა სულ-გულში. ყ-დ უსამღვდელოესო მეუფეო! მე თქვენი მეუფების უუქვემეგრდომი მოსამსახურე მონა, ღირსად ვსთვლი ჩემს თავს რომ ჩვენი საყვარელი მწყემს მთავრის მწუხარებას, მეც მორჩილმა მონამ თანა უგრძნო და ჩემი გულის სიღრმისაგან აღმონახეთქი მწუხარება შეუერთო თქვენი მეუფების მწუხარებას; არა პირ მოთნეობით, არამედ ჭეშმარიტი მგრძნობი-მწუხარებით.

მე თუმცა მისი მეუფების წმ. სულის ნაშთის ცხედრის, პირადათ თაყვანის ცემის ღირსი ვერ გაფხდი, რომ ერთად თქვენს წინაშე მეც მონაწილეობა მიმელო და შემეერთებია ჩემი ცრემლით მწუხარება სხვათათანა; მაგრამ ეს ვერ მოვახერხე სხვა და სხვა მიზეზების გამო და ნამეტურ დაცემულმა ცხოვრებამ და უსახსრობამ, ამ ორივე მხრის მიზეზების მომფიქრებელმა ისევ მივმართე ჩემდამო რწმუნებულ ალავერდის წ-ის გ-ის ეკკლესიას და ერთად ჩემი მრევლის ორისავე სქესისა თან დასწრებით მხურვალე გულით და ცრემლით შევსწირე ღვთისადმი ვედრება, წირვა. ლოცვით და პანაშვიდებით 10, 15, 17 და 18 ამა ნოემბერს ნეტარ ხსენებელი ყოვლად სამღვდელო ალექსანდრეს სახელზე და მრევლთა მოკლუ სიტყვით გავაცანი მისი მეუფების ყოველი მოღვაწეობა და მრავალნი ქველის საქმენი, ერთად თქვენი მეუფების სისხლითი ნათესაობისა და სხვა საუკუნოთ იქნება ხსენება მისი, რამეთუ წმიდა ადგილი განსვენებისა მიელის მას ამინ.

აი მისი მეუფების, ჩემდამი ერთი კეთილი ქველის საქმე: 1864 წ. მარტო მე ქვეითათ მივდიოდი ზუგდითით სვანეთში ფიქრით დაღონებული, ხოპის მონასტერს იქით სათეკლათში ფოთის გზა ტკეცილზედ შემომხვდა მისი მეუფება ალექსანდრე სოხუმიდამ მომავალი, ტარანტასი ცარილი ნელ-ნელა წინ მიყავდათ და მისი მეუფება უბრალო ტანისამოსით და შლიაპით ქვეითად ნელა მობრძანდებოდა (მუხლების მოსამართავად). მე გაფიქრებულმა ვერ შევიცანი და შორის ნაპირიდგან უბრალოდ თავი დაუკარი, მან ცნობის ნიშნათ ორივე ხელით ჯვარი გადმომსახა, მაშინ ვიცანი მისი მეუფება და ჩემი შეცთომა, ვიახელი და ბოდიშის მოთხოვით თაყვანი ვეცი, შეჩერდა, ვინაობა და გარემოება მკითხა, მეც ყოველივე ჩემი გასაჭირი მოვახსენე, თვალზედ ცრემლი შემნიშნა, ნუგეში დარიგებით მიბრძანა, ჩემი სახელი და გვარი კნიაში დაინიშნა და მიბრძანა „მე გაბრიელთან გავივლიო“... (1) ბოლოს გამოსათხოვარი შენდობის ჯვარი გადამსახა, მე ორივე ხელები გაუნოდე როდესაც ხელებზედ მარჯვენე დამსდო, ჩემს ხელში შევნიშნე და კუშნილი ქალაღდი ჩამიდო, მე შევჩერდი, მაგრამ მიბრძანა: „მოკიდე ხელიო, ცხენი იშოვნე ქირად და საგძლათ იკმარეო“. თაყვანი ვეცი და გაუდეჭი გზას, ვნახე, რომ 25 მანეთი იყო ბოძებული. ერთი თუმნიანი და სამი ხუთ ხუთმანეთიანები, მე კი სვანეთში მიმავალს მარტო 3 მ. 60 კაპ. მედო ჯიბაში, ცალკე ქვეითობა და უფულობა მალონებდა გულს და ცალკე ცოლ-შვილის და ოჯახის მიტოება. და თვალ ცრემლიანი დანუხებული მივლოლავდი... ვერ წარმოიდგენს კაცი ამ დროს ამ გვარმა ქველის საქმემ, რანაირად დაშრიტა ყველა ჩემი მწუხარება და სხვა...

### მღვდელი ალექსანდრე არდიშვილი

(1) ვფიქრობ და საქმითაც აღმისრულა, რომ მისი მეუფების ქუთაის გაბრიელთან გავლის შეპირებამ ჩემზედ კარგათ იმოქმედა 1864 წ. – 1884 წლადღმდე და შემდეგ კი დაიხურა ჩემი მტრების მეოხებით და სხვა.

---

### სიტყვა,

თქმული «საქართველოს საისტორიო და საეთნოგრაფიო საზოგადოებისა» მდივნის ს. რ. გორგაძის მიერ განსვენების დღეს, 16 ნოემბერს.  
ყოვლად-უუსამღვდელოესო მეუფეო!

ორი თვეც არ არის, რაც «საქართველოს საისტორიო და საეთნოგრაფიო საზოგადოებამ» თავის წევრად ავირჩიათ; და დღეს მიუწოდომელი განგების ძალით, იგევე „საზოგადოება“ იძულებულია, აქ, შენ მიერ განახლებულ ამ წმიდა სავანეში, ჩემის პირით უკანასკნელი სალაში მოგიძღვნას!

დაუვიწყარია მეუფეო, შენი ლუანლი ჩვენი „საზოგადოებისთვის“: შენ თითქმის პირველმა დაიწყე ის საქმე, რომელსაც დღეს ჩვენი ნორჩი „საზოგადოება“ ემსახურება; შენ შენის საფასით აახლებდი ჩვენი ძველი ხუროთ-მოძღვრების დანგრეულს ნაშთებს, შენის საფასით ჰბეჭდავდი ჩვენი ძველი მწერლობის საუკეთესო, ნაწარმოებს, აკრებიანებდი და შენისავე საფასით აბეჭდვინებდი თვით ხალხის გულიდან ამოხეთქილის ქართულის საეკლესიო გალობის საყურადღებო ნიმუშებს და სხვა. – ყოველივე ეს ჩვენს „საზოგადოებას“ სრულს იმედს აძლევდა, რომ არც მას დასტოვებდით უყურადღებოდ. მაგრამ განგებამ სხვაგვარათ ჰსაჯა, – და დღეს ჩვენი ნორჩი „საზოგადოება“, სხვა საერო დანესებულებებთან ერთად, მწარედ გლოვობს შენს დაკარგვას.

საუკუნო იყოს ხსენება შენი ჩვენ შორის, სამშობლო ქვეყნის მოჭირნახულე მღვდელმთავარო!

1907 წ. 16 ნოემბერს.

შიო-მღვიმე.

---

### ყოვლად სამღვდლო ალექსანდრე ეფისკოპოზი.

1905 წელს დამნიშნეს მცხეთის ნავთ-საყვანის სადგურის უფროსათ. გავიგე რა, რომ ყოვლად სამღვდლო ალექსანდრე შიო მღვიმის მონასტერში ცხოვრობს, წავედი მონასტერში მის სანახავად, მართალი არის ყოვლად სამღვდლო მე არ მიცნობდა, მაგრამ სამაგიეროთ მას ყველანი იცნობდა და გადავსწყვიტე გავცნობოდი. პატივის ცემით მიმიღო ყოვლად სამღვდლომ და როცა გაიგო, რომ მათ მეზობლათ ვცხოვრობ დიდათ ესიამოვნა და დამპირდა ჩემსას მოსლა.

ზაფხულში იმავე წელს შემთხვევამ მისცა ყოვლად სამღვდლოს არმაზის მონასტერში წასულიყო და დაბრუნებისას გამომიარა. დღის პირველ საათიდან საღამოს ექვს საათამდის დარჩა ჩემთან ყოვლად სამღვდლო თავის კრებულით. ამის შემდეგ არა ერთხელ დავსტკბარვარ მისი ტკბილი, მამობრივი ლაპარაკით. ყოველ მის სიტყვაში მკაფიოთ იხატებოდა მისი განუსაზღვრელი სიყვარული მამულისადმი და და-

ჩაგრულ ქართველ ერის სიბრალული.

როცა მოძრაობის დროს ლაპარაკი ასტყდა საქართველოს ეკკლესიის ავტოკეფალიაზე ყოვლად საღვდელღოს დიდთ გაეხარდა და ყოველთვის, როცა კი მნახავდა იმას მკითხავდა თუ როგორ მიდის ავტოკეფალიის საქმე.

ერთხელ, ავტოკეფალიაზე რომ ლაპარაკი ჩამოვაგდეთ, მითხრა: „ავტოკეფალია იმისთვის კი არ მეხარება რომ, როგორც ყველაზე დამსახურებულს, კათოლიკობა მე მერგოს, არამედ იმისთვის, რომ ქართველ სასულიერო წოდებას ცოტათ თუ ბევრად თავისუფლება მიეცეს, მაშინ ის მანე ქართველებისათვის პირები, რომელნიც ეხლა არიან სასულიერო წოდებათა რიცხვში, საქართველოს ეკკლესიიდან განიდევნებიან. მე კი თუ მცხეთამდის, როგორც უძველეს საქართველოს ეკკლესიამდის, მივალნიე, რომ ვეკურთხო კათოლიკობად, მეორე დღესვე ჩემზე ახალ-გაზდას და უფრო ღირსეულს დაუთმობ კათოლიკობას.“

სოფელ ძეგვის მცხოვრებთანი ბევრნი მუშაობდნენ ჩემთან საღვურზე და რომ გაიგეს მე ვგრე დაახლოვებული ვარ ყოვლად სამღვდელღოსთან, შემომჩივლეს: ალექსანდრე ეფისკოპოზი უსამართლოთ გვეპყრობაო – საძოვრის გადასახადი არის ჩვენზედ დარჩენილი და ოცდა ათ თუმანს ვაძლევთ და არ შვრება, სამოც თუმანს გვთხოვსო და თანაც გვემუქრება, თუ არ მომცემთ ეგზეკუციას ჩამოგიყენებთო. გამიკვირდა ეს ამბავი და მე თავს ვიდე შემერიგებია ყოვლად სამღვდელღო და სოფლელები. ნავედი ყოვლად სამღვდელღოსთან და ყოველივე უამზე და თანაც ვსთხოვე დასჯერებოდა ოც-დაათ თუმანს სოფლელებს. აი მისი პასუხი: „როგორც უთქვამთ, ხომ ისინი ოცდა ათ თუმანს მაძლევენ? მე დიდის სიამოვნებით ოცს დავსჯერდები, მაგრამ არ იძლევინ და მეც ხომ მაგათათვის კარები არ ამიტალახიანებია სიარულით და თხოვნით, რაც შეეხება ეგზეკუციის ჩაყენებას ეს ხომ სულ ცილის წამება არის და რას მემართლებიან არ ვიცი.“

ეს ამბავი, ე. ი. ეფისკოპოზის ალექსანდრეს პასუხი, გადავეცი ძეგველებს და იმ დღიდან გაჩემდნენ; არც ფული მოუტანიათ ყოვლად სამღვდელღოს გადასაცემად და მისი ძვირის ლაპარაკსაც თავი დაანებეს. ვინ ავრცელებდა ამისთანა შეუსაბამო ჭორებს ალექსანდრეზე? რასაკვირველია ისინი ვინც იმ დროს მოისურვეს საღვდელღოების დაცემა ხალხის თვალში.

ამ უსიამოვნებას თან მოყვა ორი სხვა დიდი სამწუხარო შემთხვევა ალ. ეპისკოპოზისათვის: 1) ის, რომ თფილისის გიმნაზიის მოსწავლეებმა, როგორც ეკსკურსანტებმა, ღამე გაათიეს მონასტერში, ყოველ ნაირი პატივის ცემა მიიღეს, როგორც სასმელ-საჭმელი, ისე მოსასვენებლათ საგებასახურავი და მადლობის მაგივრად ისეთი საზიზღარი საქმე ჩაიდინეს, რომლის მგზავსი არა თუ გიმნაზიელებს არამედ

უბრალო, გამოუთლელ და გონება დახშულ ადამიანებს არ ეპატიება და რომელზედაც მაშინდელ ჟურნალ-გაზეთობამ საკმარისად გაჰკიცხეს ჭკუის კოლოფების (გიმნაზიელების) მოქმედება. უნდა გენახათ რა ნაირათ სწუხდა ყოვლად სამღვდელო ამ მოსწავლე ბავშვების საქციელზედ. ის იმას კი არა სწუხდა, რომ მათ დაამტვრიეს და გააფუჭეს, როგორც ზარალზედ არა ის სტიროდა მოსწავლეთ სულიერ დაცემულობას.

2) ის, რომ ბოროტ მოქმედებმა თავს დაესხნენ, გაცარცვეს და მისი გულითადი საყვარელი, მისივე გაზდილი, კელენიკი, ბესო მოუკლეს. ბოროტ-მოქმედებნი შორეულები არ იყვნენ, რადგანაც გაცარცვის დროს საკმარისად გამოიჩინეს ცოდნა თუ თაფლი ან სხვა ნივთები სად ინახებოდა. ისიც გაიგო ყოვლად სამღვდელომ, თუ რომელი სოფლიდან იყვნენ ბოროტ-მოქმედნი და, თუ მიუთითებდა მთავრობას, ადვილათ მოინახებოდა დამნაშავენი, რადგან წაღებულ 40 ფუთ თაფლს ეგრე ადვილათ ვერ დამალავდნენ, მაგრამ ხალხის სიბრალეულმა და სიყვარულმა დასძლია და სწორეთ მისთვის, რომ ეგზეკუცია არ ჩაეყენებინათ სოფლელებისთვის, სადაც დანაშაულებთან უდანაშაულოც დაისჯებოდა, გაჩუმდა და გულში ჩაიკლა ეს ვარამიც და სწორეთ ამ შემთხვევის შემდეგ მისი სიცოცხლის ღღენიც მალე დაითვალნენ.

## იოსებ ფანცულაია

---

### ეპისკოპოსი ალექსანდრე

(საბიბლიოგრაფიო წერილი)

4 მარტს ამა წლისას შესრულდა 35 წელიწადი, რაც ეპისკოპოსად იქმნა კურთხეული დიდად პატივცემული მწყემსთ-მთავარი ალექსანდრე, რომლის დღესასწაულიც ამ 9 მაისისათვის არის გადადებული.

ალექსანდრე ეპისკოპოსი დაიბადა 1824 წელს გორის მაზრაში და ამ უამად 73 წლისა. იგი შვილია სოფლის მღვდლის მ. დავით ოქროპირიძისა. ალექსი ოქროპირიძემ, შეასრულა რა სწავლა გორის სასულიერო სასწავლებელში, დაიწყო

სწავლა თფილისის სასულიერო სემინარიაში, აქაც დაამთავრა იგი 1845 წ. და აღკვეცილ იქმნა ბერად თფილისის პირველ ხარისხოვან ფერისცვალების მონასტერში და ჩარიცხულ მონასტრის ძმათა შორის. იმავე წლის 18 აგვისტოს მიეცა მთავარ-დიაკვნობა და გაიგზავნა ყაზანის სასულიერო აკადემიაში, სადაც 1846 წლიდან 1850 წლამდე სწავლობდა ღვთის მეტყველებასა, ფილოსოფიასა, ფიზიკა-მათემატიკასა, სიტყვიერებასა, საეკლესიო და საზოგადო სამოქალაქო ისტორიასა და აგრეთვე ბერძნულსა, ლათინურსა, გერმანულსა, ოსმალურსა, თათრულსა და არაბულ ენებს. ამ სწავლის დროსვე, 1849 წელს 6 ოქტომბერს იგი ხელ-დასხმულ იქმნა მღვდელ-მონაზონად და, 1850 წლის 9 ოქტომბერს, დამტკიცებულ ღვთისმეტყველების კანდიდატის ხარისხში.

აკადემიაში სწავლის დამთავრების შემდეგ მამა ალექსანდრეს, ყაზანის აკადემიის გამგეობის წინადადებისათა საქართველოს ექსარხოსის განკარგულებისამებრ, თფილისის სემინარიის გამგეობამ მიანდო ამ სემინარიის დაბალს განყოფილებაში სწავლება სამღრთო წერილისა და ლათინურის ენისა, ხოლო უფროსს კლასებში ზნეობრივ ღვთის-მეტყველებისა და არქეოლოგიისა. ამ საქმეს ადგა იგი 1851 წლის 15 თებერვლიდან იმავე წლის 27 ივნისამდე. ამ მცირე ხნოვან ყოფნის შემდეგ სემინარიაში იგი უწმიდესის სინოდის ბრძანებით დაინიშნა აფხაზეთის სასულიერო სასწავლებლის ზედამხედველად და იმასვე მიენდო აფხაზეთის ეპისკოპოსის მღვდელ-მსახურთა შორის მღვდელ-მონაზონობა იმავე 1851 წლის 21 სექტემბერს, თითქმის ამავე ხანს, 1851 წლის 28 ივლისიდან 28 სექტემბრამდე, იგი დროებით ასრულებდა თანამდებობას ქუთაისის სასულიერო სასწავლებლის ინსპექტორისა და სამაზრო სასწავლებლის უფროსს განყოფილებათა მასწავლებლისას, აფხაზეთის ილორში დაარსებულ სასწავლებელთა წარმატებისათვის ისეთი გულ-მოდგინეობა გამოიჩინა, რომ პირადად მაშინდელმა საქართველოს ექსარხოსმა, მიტროპოლიტმა ისიდორემ, 1851 წ. 8 მაისს, ნაბედრენიკით დააჯილდოვა, ხოლო წლის თავზედ, 1853 წლის 7 თებერვალს, მის მიერ აფხაზეთა სასულიერო სასწავლებლის სასარგებლოდ განეულ შეწირულებისათვის უწმინდესმა სინოდმა თავისი მადლობა გამოუცხადა.

სამხედრო გარემოებათა გამო 1854 წლიდან აფხაზეთა სასულიერო სასწავლებელი გაუქმდა და მ. ალექსანდრე ამ წლის 3 მაისს ქუთაისის სასულიერო სასწავლებლის ზედამხედველისა და უფროს განყოფილებათა მასწავლებლის თანამდებობის აღმასრულებლად დაინიშნა და ამ თანამდებობას ასრულებდა 1855 წლის 26 იანვრამდე. ამავე დროს, 1854 წლის 9 დეკემბრიდან 1855 წლის 3 მარტამდე, იმერეთის განსვენებულ ეპისკოპოსის ვეტიმეს განკარგულებით იგი და

ინიშნა გაენათის პირველ ხარისხოვან მონასტრის წინამძღვრად, 1855 წლის 30 ნოემბერს-კი ებოძა აფხაზეთის საარქივლო კათედრის ილუმენობა.

ამავე დროს მან გამოიჩინა დიდი გულ უხვობა ქველმოქმედების საქმეში და ქუთაისის სასულიერო სასწავლებლის ღარიბსა და ხელ მოკლე მოსწავლეებს ფულად დახმარება აღმოუჩინა, ხოლო წლის თავზედ, 1856 წლის თებერვლის, თვეში სევასტოპოლის დამცველ გმირთა და იმით გადატაკე-გულ სახლობათა სასარგებლოდ წელიწადში ოცი თუმანი შესწირა იმ დრომდე, ვიდრე ომი გასტანსო.

1856 წლის 26 თებერვალს, უწმიდესის სინოდის ბრძანებით, აფხაზეთის ეპისკოპოსის გერმანეს მიერ იგი ხელ-და..სხმულ იქმნა არხიმანდრიტად მოსანონ და საქეხ საქციელისა და ეკკლესიისა და მოზარდის თაობის სასარგებლო შრომისათვის. ამავე წლის 2, ოქტომბერს აფხაზეთის ეპისკოპოსი გერმანე იმერეთის კათედრაზედ გადაიყვანეს და აფხაზეთის ეპარქიას 1858 წლის იანვრის თვემდე არხიმანდრიტი ალექსანდრე განაგებდა. 1859 წლის 2 მაისის უმაღლესის სახელით ებოძა ორდენი წმ. ანნასი მესამე ხარისხისა, ხოლო 1862 წლის 4 მარტს თფილისის სიონის საკათედრო ტაძარში ხელ დასხმულ იქმნა აფხაზეთის კათედრის ეპისკოპოსად.

1867 წლის 5 აგვისტოს მან განაახლა თვისის ხარჯით ძველი ტაძარი, სუხუმიდგან 2 ვერსის მანძილზედ მდებარე, რისათვისაც მისმა იმპერატორებითმა უდიდებულესობამ მადლობა განუცხადა. 1868 წლის 31 მარტს გულ-მოდგინე სამსახურისა გამო ეპისკოპოსს ალექსანდრეს ებოძა ორდენი წმ. ვლადიმირისა მესამე ხარისხისა. იმავე წლის 14 ივნის პატივცემულმა ეპისკოპოსმა ალექსანდრემ განაახლა სოხუმს ახლო, ზღვის ნაპირას, ქვითკირის სასაფლაოს ეკკლესია, ძველი ეკკლესია ქ. სოხუმისა. 200 მან. შესწირა ილორის სასწავლებელს და 1878 წლის 22 თებერვალს ფული თფილისის სასულიერო სემინარიის სასარგებლოდ.

1869 წლის 30 მაისის ყოვლად უსამღვდელოესი გერონტი მოხუცებულობისა გამო დათხოვნილ იქმნა და იმის ადგილას ქართლ-კახეთის ეპარქიის ქორეპისკოპოსად, გორის ეპისკოპოსად უმაღლესად დაინიშნა ყოვლად უსამღვდელოესი ალექსანდრე და იმავე წლის 30 ოქტომბერს პატივცემულის ეპისკოპოსის თავჯდომარეობით შემდგარს კომიტეტს მიენდო ქართულის დაბადების განხილვა და შესწორება.

1871 წლის 22 ოქტომბერს გულ-მოდგინე სამსახურისა და მისდა მინდობილ თანამდებობათა წარჩინებით აღსრულებისათვის ეპისკოპოსს ალექსანდრეს ყოვლად უმოწყალესად ებოძა ორდენი წმ. ანნასი პირველ ხარისხისა.

1878 წელს ოქტომბერს მისის უმაღლესობის კავკასიის მმართველ დიდის მთავრის მიერ იგი დამტკიცებულ იქმნა კა-



გვასიაში მართლ-მადიდებელ სარწმუნოების აღმადგენელ საზოგადოების სასულიერო კომიტეტის წევრად.

1882 წლის 2 აპრილს, უწმინდესის სინოდის ბრძანებით, ეპისკოპოსს ალექსანდრეს დროებით მიენდო გურიის ეპარქიის მმართველობა და ამ თანამდებობას ასრულებდა თითქმის ოთხის წლის განმავლობაში, 1886 წლის 2 მარტამდე. ჯერ ისევ 1884 წლის 8 აპრილს მუდმივ გულ-მოდგინე და სასარგებლო სამსახურისათვის და განსაკუთრებულ შრომისა გამო, რომელიც გასწია გურიის ეპარქიის მართვის დროს, ეპისკოპოსს ალექსანდრე ყოვლად უმოწყალებად ებოძა ორდენი წმიდისა მოციქულთ სწორის ვლადიმირისა მეორე ხარისხისა.

უწმინდესის სინოდის 1886 წლის 7 მარტის ბრძანებით მის ყოვლად უსამღვდელოესობას მიენდო დავით გარესჯის უდაბნოს გამგეობა წინამძღვრის უფლებით, ხოლო 1887 წლის 3 მარტის ბრძანებით, რაკი ყოვლად პატივცემულმა მწყემსთ მთავარმა 21,000 მან შესწირა შიო-მღიმის უდაბნოს, ეს უდაბნო მონასტრის ხარისხზედ იქმნა აყვანილი და მის წინამძღვრად დაინიშნა ეპისკოპოსი ალექსანდრე.

1893 წლის 15 მაისის თვით იმპერატორ ალექსანდრე მე-III სიგელი მოუვიდა მისს ყოვლად უსამღვდელოესობას ეპისკოპოსს ალექსანდრეს, რომელშიაც ნათქვამია: „ყურად ვიდე რა თქვენი ხანგრძლივი წარჩინებული და გულმოდგინე სამსახური მართლ მადიდებელ ეკკლესიის სასარგებლოდ, გინყალობებ ამასთანავე წარმოგზავნილს „ძვირფასის ქვებით მოჭედდის გულზედ დასაკიდ სამღვდელმთავრო ხატსაო.“

ამას გარდა აქვს ნიშანი წითელის ჯვარისა, დაჭრილ და ავადმყოფ მეომართა მზრუნველ საზოგადოების მთავარ-სამართველოსაგან მიღებული 1882 წლის 23 ივნისს; იგი ნამდვილი წევრია 1889 წლიდგან წყლებისაგან რუსეთის დამსწნელ საზოგადოების; განსაკუთრებულ ღვაწლის განწევისათვის იმპერატორისა მარია ალექსანდრეს ასულის სახელობაზედ დაარსებულ უსინათლოთა სამზრუნველოს საბჭოსაგან ნაბოძები აქვს გულზე სატარებლად სიკვდილამდე ოქროს ნიშანი 1896 წლის 5 იანვარს, ხოლო 1896 წლის 12 მაისს „ქართველთა შორის წერა-კითხვის გამავცელებელმა საზოგადოებამ“ საპატიო წევრად ამოარჩია „ნიშნად პატივისცემისა იმ დიდის ღვაწლისათვის, რომელიც მას მიუძღვის საქართველოს წინამე როგორც იმითი, რომ ჰბეჭდავს წარჩინებულთა სასულიერო მწერალთა თხზულებათ, აახლებს შესანიშნავ დანგრეულ ტაძართა და სცდილობს აღადგინოს ძველი ქართული გალობა და ამისათვის ყოველ გვარს ღონისძიებასა ჰლონობს, ისე იმითი, რომ, ხელს უწყობს საქართველოს ხალხის გონებრივს განვითარებას და თავისის ხარჯით ჰზრდის ბევრს ობოლს სხვა-და-სხვა სასწავლებელში.

აი მოკლედ, სია იმისი, როგორ უვლია სამსახურის გზა-ზედ ჩვენს დიდათ სასიქადულო მწყემსთ-მთავარს. მისი უხვად გაშლილი ხელი საქველ-მოქმედოდ ყველამ უწყის მთელს საქართველოში და არა ერთი და ორი ობოლი გამოზრდილა და ეხლაც იზრდება იმის ხარჯით. ყველამ უწყის ისიც, რომ მისის საფასით არის გამოცემული საბა-სულხან ორბელიანის ლექსიკონი, ლექსიკონი, თავ. რაფაელ ერისთავისა სამთა სამეფო-თავან, ამბროსი ნეკრესელის მოძღვრებანი, მზა-მეტყველება, ისტორიული საბუთები შიო-მღვიმის მონასტრისა და სხვანი. არავისათვის საიდუმლო არ არის, რომ მცირეოდენი სასყიდელი არა აქვს გამოღებული ჩვენს საერთო გულის-ტკივილით აღსავსე მწყემსთ-მთავარს ქართველის საეკლესიო გალობის ნოტებად დანყობისთვისაც, რომლის განურყვნელად შეუბღალველად დაცვის მნიშვნელობა ფრიად ცხადია და განმარტება აღარა სჭირია.

ეს მრავალი გვარი, მრავალ ფეროვანი და დაუღალავი მოღვაწეობაა მიზეზი, რომ მისი უსამღვდელოება ეპისკოპოსი ალექსანდრე დიდად უყვარს მთელს საქართველოს ერს და ყველა დიდი, თუ პატარა, განუზომელს პატივს სცემს. ამ საერო მაღლობის გარდა, არა ერთისა და ორის ქართველის გულია აღვსილი მისის მეუფების მაღლობის იმ უხვის შემწეობის და დახმარების გამო, რომელიც მას გაუწევია კერძოდ იმათთვის გაჭირვების დროს.

ამ ოცი და თხუთმეტის წლის განმავლობაში და წინადაც მისი მეუფება მტკიცედ და სავსებით ადგა მცნებასა უფლისასა, – „მოვედით ჩემდა ყოველნი მაშვრალნი და ტვირთ-მძიმენი, და მე განგისვენო თქვენ“-აო ყოვლად პატივცემული მეუფე ერთი იმ მწყემსთ მთავართავანია, რომლითაც ერს, სულ ერთია, ქართველი იქმნება იგი, თუ სხვა, თამამად შეუძლიან თავი მოიწონოს, რომ ასეთი მოჭირნახულე, ასეთი გულ-შემატკივარი და მრავალის სათნოებითა და ღირსებით აღსავსე შვილი ჰყავს!.. ერთი მწერალი ამბობს, რომ ღონე და ძალა, ავკარგიანობა ამა თუ იმ ერისა იმითი განიზომება, თუ რომელს უფრო მრავლად ჰყავს დიდ-ბუნებოვანნი კაცნიო, და მისი მეუფება ეპისკოპოსი ალექსანდრეც ერთი იმ დიდ-ბუნებოვანთავანია, რომელიც თავისს ერს, თავისს სამშობლოს მაღლსა ჰყვენს და თავისის სიკეთით თვით ერსაც სახელს უკეთებს.

**ა. ახნაზაროვი**

## ყოვლად უსამღვდელოესო მეუფეო ალექსანდრე!

საქართველო ძაძითა და მწუხარებით შეიმოსა, გლოვის ზარი გაისმა კიდითი-კიდემდე, რომ ობლად დაგვტოვე შენ დაუვინყარო მამათ-მთავარო და ხალხის მოძღვარ-მესვეურო.

საქართველოს ერი იმ იმედით იყო გამსჭვალული რომ კათალიკოსის კვერთხით წინ წარუძღვებოდი, ჩვენს დაბეჩავებულს ხალხს და უფლება აყრილს ჩვენს ეკკლესიასა.

მაგრამ ვაი რომ მუხთალმა წუთი სოფელმა არ გვაღირსა, ეს ბედნიერება არც ჩვენ და არც შენ წმინდაო და ღირსო მამაო!

მაგრამ შენ მაინც ბედნიერი ხარ, რომ წმინდათ და უმნიკვლოდ გაატარე შენი სიცოცხლე და მთელი შენი ძალღონე შესწირე საყვარელ ქართველი ხალხის და ეკკლესიის სამსახურს.

როგორც ფრთხილი დარაჯი, შეუპოვრად და უშიშრად იცავდი ჩვენი ეკკლესიის შელახულ უფლებებს, მტკიცეთ და ერთგულად ემსახურებოდი, ხალხის განვითარებას და უანგაროდ სწირავდი მის კეთილ დღეობას, როგორც შენ პირად ძალღონეს აგრეთვე მთელს შენს ქონებას და ყველაფერს რაც კი რამ გაგაჩნდა.

ქრისტიანულის სიყვარულით გარს ევლებოდი შენს სამწყსოს, ხარობდი იმისი სიხარულით და გულს იკოდდი იმისი სიმწუხარით; ამასთანავე მუდამ პირში ამხელდი, ყოველივე მის ცუდს, და მოურიდებლად – აშკარად ებრძოდი ამა ქვეყნის უნამუსობას, ფლიდობას და უსამართლობას.

შენი სასტიკი, მაგრამ სამართლიანი სიტყვა გულში ხვდებოდა ყველას; მდიდარს – თუ ღარიბს, დიდებულსა თუ მცირე ვინმესა და მძლავრად აგრძობინებდა შენი არსების სიძლიერესა დიდ ბუნოვანობას და შენს რისხვას არ ჰქონდა საზღვარი, როდესაც ხედავდი რომ აწიოკებდენ შენს საყვარელს სამშობლოს და ფრთებს უკვეცამდენ მასთან ერთად ივერიის ეკლესიასაც.

შენი გამუდმებული ბრძოლა ქვეყნის ორგულებთან, შენი ერთგული უანგარო სამსახური ჩვენი ხალხისადმი, სამაგალითოდ დარჩება შთამომავლობას და შენს სახელს მოფენს შარავანდელით და გახდის სამარადისო სათაყვანებლად.

შენ დაგვაობლე წმინდაო მღვდელ-მთავარო ალექსანდრე! მაგრამ ჩვენთან დარჩა შენი საქმენი, არ მოკვდება ის აზრი რომლითაც შენ იყავი აღფრთოვანებული და როდესაც საქართველოს ხალხი მას განახორციელებს, ჩვენც მოვალთ შენს დაუვინყარო საფლავთან და „გიხაროდენ მეუფეო“ გი-

გალობებთ ალტაცებით.

ახლა კი გულ დათუთქული, თვალ-ცრემლიანი მუხლს მოვიდრეკ და ვეამბორები შენს წმინდა ცხედარს, მე როგორც ერთი შენი თაყვანის მცემელი და როგორც თავმჯდომარე წარმომადგენელი ტფილისის წვრილ ვაჭართა საზოგადოებისა.

### სოსიკო მერკვილაძე.

### ყოვლად სამღვდლო, მეუფეო ლეონიდ!

დიდად შემანუხა მსცოვანის, ჩვენის სათაყვანებელის მღვდელმთავრის ალექსანდრეს გარდაცვალებამ. შემანუხა არა იმიტომ, რომ იგი უცხოვოდ მოსწყდა სამშობლოს ციდამ, არამედ იმიტომ რომ ჩვენი დაჩაგრული სამშობლო თანდათან ცარიელდება და გადიან ბრძოლის ასპარეზიდან უკეთესნი შვილნი მისნი. ჭეშმარიტად, სამგლოვიაროა, სატირელ-სავალალოა, რომ მოგვაკლდა წმინდა კაცი, წმიდა ბერი, უმნიკვლო და უანგარო ადამიანი. სავალალოდ ჩემდა, პირადად ვერ დავესწარ, ჩემგან დამოკიდებულ მიზეზთა გამო, მეუფე-ალექსანდრეს დაკრძალვის დროს, ვერ დავესწარ, რომ უკანასკნელად ვმთხვევიყავ მის წმინდა შუბლსა, მის ბრწყინვალე და სპეტაკს სახეს, დავკონებოდი მის მკერდსა სადაც ჰლვიოდა განუქრობელი ლამპარი სამშობლოს სიყვარულისა, სადაც სცემდა გული მხოლოდ და მხოლოდ სამშობლო ეკლესიის, სამშობლო ქვეყნის საკეთილ-დღეოდ და სადიდებლად. ნაილო მან თან ეს აღფრთოვანებული სიყვარული სამშობლოსი, შეუერთდება იგი იმ წმინდა გუნდს ჩვენი სამშობლოს მადიდებელთა, მისთვის წამებულთა და მათთან ერთად აღავლენს „მთა წმიდით სიონით“ წმიდა ლოცვას ღვთის მშობლისადმი დასაცვადად მისს წილხლომილ ქვეყანისა. ნეტარება მისს სულს, რომ წარსდგება პირნათლად იმ დიდებულის გუნდის წინაშე.

დაცარიელდა, მეუფეო, ჩვენი სასულიერო წოდება, განვიდა-რა მისგან წმიდა ალექსანდრე. ვილას შესტკივა გული ჩვენის ეკლესიისათვის? ვილა ამოიღებს ხმას ამა ქვეყნის დიდებულთა წინააღმდეგ? ვინ ეტყვის მედგარს, პირდაპირ სიტყვას ჩვენი სამშობლო ეკლესიისა და ქვეყნის მღვდენელთა? ერთად-ერთი მეუფე ალექსანდრე იყო ასეთი მებრძოლი.

ოღესმე ვეახლები შიო-მღვიმეში და თაყვანსა ვცემ მისს

წმიდა ნაშთსა. მინამღე კი ვსთხოვს მის წმიდა სულს და თქვენ მეუფეო, მომიტევეთ, რომ პირადად, დაკრძალვის დროს ვერ ვეამბორე მის კურთხეულ მარჯვენას და თაყვანი ვერ ვეც მისს დიდებულს სახელსა.

თქვენი მეუფის ღრმათ მოყვარული და მსასოებელი

**სოფრომ მგალობლიშვილი.**

---

**თქვენო ყოვლად უსამღვდელოესობამ  
მეუფეო ლეონიდ!**

ვეამბორები თქვენი წ-დით მოსილს მარჯვენას და გავმოვითხოვ თქვენი მეუფებისაგან ლოცვა კურთხევას.

თქვენი ბიძა ყ-დ სამღვდელო აღიქვანდრეს გარდაცვალება გავიგე გაზეთებიდან, რომელიც დამირჩა დიდი სამწუხაროდ, მსურველი ვიყავი უკანასკნელად პატივი მეცა განსვენებულიისათვის და დავსწრებოდი მისი გვამის დაკრძალვას; მაგრამ ხელი შემიშალეს: ავათმყოფობამ და მეტადრე გვიან შეტყობამ.

ნეტარ არს კაცი იგი, ვინც ეღირსება ამისთანა სიკვდილს: არ განუცდია ავათ მყოფობა ისე მოსვენებულად მიიძინა და ეწია თავისი სიყრმიდგანვე აღრჩეულს სანადელს სანატრელად. მისი ქველმოქმედებები, მისი გულ შემატკივრობა ყოველი კეთილი საქმისადმი არ დაკარგავს მისი სახელს ამ წუთ სოფელში. მისი განსვენება არ ნიშნავს სიკვდილს, არამედ მშვიდობიანად გადასვლას სატანჯველიდან საუკუნო ცხოვრებისადმი. საუკუნოდ იყოს ხსენება მისი წიაღთა შინა აბრაამისათა.

ასული ჩემი ბებე უერთდება ჩემგან გამოთქმულს სამძიმარს მისი გარდაცვალებაზედ, რომლისათვის ყ-დ სამღვდელო აღიქვანდებოდა ბრძანდებოდა ყოველთვის გულკეთილი და პატივის მცემელი.

დავშთები მარად თქვენი მეუფებისაგან ლოცვა კურთხევის მოხონენელი. პრინცესა სალომე მურატისა.

---

**თქვენო ყოვლად უსამღვდელოესობავ, მონყალეო  
მღვდელ-მთავარო ლეონიდ!**

თქვენი დაუვიწყარი ბიძის ყოვლად სამღვდელო ალექსანდრეს ღვთივ აღსრულებამ მთელი საქრისტიანო ძაძით შემოსა, ხოლო მე კი უბადრუკს, რომელიც მას მეტის მეტად უყვარდი, შინაურმა ვინრო გარემოებამ და ავადობამ ენა მუცელში ჩამიგდო, მარჯვენა დამიღუნა და ფეხთ მომკვეთა, რის გამოისობითაც ვერ მოვახერხე აქნობამდე გამეზიარა თქვენი უღრმესი მწუხარება და ასე თუ ისე ნუგეში მეცა თქვენთვის. გარნა ნათქვამია: სჯობს გვიანე ვიდრე სულ არაო, ამიტომ გთხოვთ მიიღოთ ეს ჩემი დაგვიანებული გულის სიღრმიდან ამოსკვნილი წრფელი სამძიმრის წერილი სულგრძელობით და მიტევებით ჩემი უნებლიეთი დანაშაულობისა.

თქვენი ფეხთა მტვერი სამსახურს გარეშე მყოფი მასწავლებელი **ეფრემ ესტატესძე მარჯანიძე**.

---

### **დიდათ პატივცემულო ყოვლად-სამღვდელო ლეონიდი!**

სამწუხარო ამბავი მოგვიტანეს გაზეთებმა! ყოვლად-სამღვდელო ალექსანდრე, ეს წმინდა მოხუცი, მამა მგლოვიარე, ტანჯული ერისა მოშორებია საქართველოს! მისი გულ-მხურვალე ლოცვა აღარ აღევლინება მეუფის დაჩაგრული ქვეყნისთვის. როდესაც ამისთანა მოხუცი გვეხოცებიან, გულში რაღაცა მწყდება: განსვენებულისთანა ადამიანები წარსულისა და აწმყოს შემაერთებელი ხიდები არიან. ინგრევიან ეს ხიდები და მათთან ერთად იმედი წარსულისა და მომავლის შეერთებისა, ოდესმე მაინც გადაბმისა – ირყევა-სუსტდება და გულში ნელ-ნელა იზრდება საზარელი, სასოწარკვეთილების მომასწავებელი, ცარიელი ადგილი.

მინდოდა ჩამოსვლა, მაგრამ, ჩემდა სამწუხაროდ, სამსახურის გარემოებანი ისე უკუღმა დამეხლართენ, რომ ვეღარ მოვახერხე. უმთავრესი ამ გარემოებათაგანი იმაში მდგომარეობს, რომ ხვალისთვის აქ მოელიან ახალ მზრუნველს. მეგონა – დასაფლავება კვირისთვის იქნება დანიშნული-მეთქი და ამის გამო არა ვჩქარობდი სამძიმრის მონერას. თქვენ დარჩით ახლა სამშობლო ქვეყნის მავედრებლად, გულ-წრფელ მამად და ყოვლად შემძლებელს ვთხოვ შეგასრულებინოთ ეს დიადი მოვალეობა ისეთივე მხნეობით, სიმტკიცით, რო-

გორითაც გაატარა თავისი უმნიშვნელო სიცოცხლე ყოვლად-სამ-  
ღვდელო ალექსანდრემ. წმინდანი იყო და წმინდათა შორის  
განუსვენოს მას უზენაესმა მადლმა.

თქვენი გულითადი პატივისმცემელი **ნ. ლომოური.**

---

**თქვენო მეუფებავ ყოვლად სამღვდელო  
ლეონიდ!**

ბოდიშს ვიხდი, რომ ვერ გიახელით და ვერ ვიღებ  
მონაწილეობას ღვთის მსახურებაში, რომელიც შესრულებდა  
დაუვინყარი, სახელოვანი, ნამდვილი ქართველი კაცის, თქვე-  
ნი ბიძის, ეპისკოპოსის ალექსანდრეს სულის მოსახსენებლად  
მოვალეთ ვხდი ჩემ თავს ჩვენ ხონის საკრებულო ტაძარში  
ყოველ წირვის დროს, სანამ ცოცხალი ვარ, არ დავაკლოთ  
მოსხენება ამ ჩვენ ქართველთათვის სასიქადულო მღვდელმთა-  
ვარს, რომელიც მთელი 30 წლის განმავლობაში სწირავდა  
ღმერთს უსისხლო მსხვერპლს ამ დიდებულ ტაძარში. თუ  
არა ვცდები განსვენებულს უკანასკნელსათაც აქ მოუხდა ამ  
მსხვერპლის შეწირვა. თუ ჩემი ფიქრი მართალია, ღვთის გა-  
ნგებას უნდა მიაწეროს ეს კაცმა. სულითა და გულით შეუე-  
რთებით თქვენ მწუხარებას.

თქვენი მარადის პატივის მცემელი **დეკ. ბაკურაძე.**

**თქვენო მეუფებავ ყოვლად სამღვდელო.  
ლეონიდ!**

ყოვლად საღვდელო ლეონიდ! გულითადის მწუხარებით  
მოზიარე ვართ მე და ჩემდამო რწმუნებული სკოლის მონათვენი  
თქვენი მეუფების მწუხარებისა თქვენი სასიქადულო და ძვირ-  
ფასი ბიძის ყოვლად სამღვდელო ალექსანდრეს გარდაცვალების  
გამო. საუკუნოდ იყოს მისი ნეტარი ხსენება. გადაღმა სვა-  
ნეთის ლახმულის სკოლის მასწავლებელი **მიხეილ კვაჭაძე.**

1907 წელი 27 ნოემბერი.

---

\* \*  
\*

ყოვლად სამღვდელო ალექსანდრე ეპისკოპოსის გარდაცვალებასა და დასაფლავებაზედ, ადგილობრივ რუსულს გაზეთებში ბევრი სწერეს. სხვათა შორის იმ დროის „ზაკავკაზიეს“ რედაქტორმა პართენ გოთუამ დასაფლავების დღეს „ზაკავკაზიეში“ წერილი დაბეჭდა და სურათი ყოვლად სამღვდელოსი. მერე დაიბეჭდა ის სიტყვა, რომელიც თავ. პ. ი. თუმანიშვილმა შიო მღვიმის მონასტერში წარმოსთქვა. აქ ვბეჭდავთ ამ სიტყვას.

„Умеръ епископъ Александръ! Умеръ тотъ, кто горячо любилъ свою родину, христіанскую Грузію, кто болѣлъ душой за свой многострадальный народъ, кто ревниво оберегалъ безпорочную грузинскую церковь, кто боролся убѣжденно за ея независимость...

Безжалостная смерть не дала ему дожигъ и увидѣть свѣтлые моменты возрожденія родной церкви...

„Не стало одного изъ нашихъ крупныхъ общественныхъ дѣятелей! И въ самомъ дѣлѣ: взглянемъ на всю дѣятельность усопшаго архипастыря... Не онъ-ли создалъ этотъ великій образъ духовника, который дѣяніями и мыслью отдалъ своему родному народу всю жизнь свою, вселяя въ немъ христіанскія начала: духъ правды, смиренія и труда?...

Не онъ-ли отдавалъ всѣ свои сбереженія на возобновленія монастырей, этихъ памятниковъ исторіи христіанской Грузіи, которыхъ злая судьба грузинскаго народа превратила въ развалины и готова была совсѣмъ ихъ уничтожить, сама не признавая, что этимъ самымъ она уничтожала всю исторію грузинскаго народа?.. Не онъ-ли жертвовалъ на воспитаніе юношества того народа, который ему былъ такъ дорогъ и невѣжество массы котораго заставляло его болѣть душою и дѣлиться этой болью путемъ печатанія и распространенія многочисленныхъ трудовъ по исторіи славной прошлой Грузіи... Не онъ-ли лично своей черной работой, вотъ здѣсь въ этой обительской пустынѣ показывалъ примѣръ труда и примѣненія его къ землѣ, къ тому, что должно быть всего дороже для каждаго любящаго родину!...

„Память о епископѣ Александрѣ надолго останется въ народѣ грузинскомъ. Говорю только „надолго,“ потому что въ силу непрочности памяти людской и



самыя дорогія и близкія челоѣку лица быстро, послѣ смерти ихъ, испаряются... Но глубоко я убѣжденъ, что исторія нашей родины внесетъ на свои страницы свѣтлое имя безкорыстнаго дѣятеля преосвященнаго Александра“ ...

Кн. П. I. Тумановъ.

---

**ВАШЕ ПРЕОСВЯЩЕНСТВО, ГЛУБОКО УВАЖАЕМЫЙ ЛЕОНИДЪ!**

Не имѣя возможности пріѣхать на погребеніе въ Бозѣ почившаго дяди Вашего, глубокочтимаго Архипастыря Грузинской церкви, преосвященнаго Александра, прошу Васъ принять отъ меня и отъ Городскаго общественнаго управленія, какъ представителя всего населенія города Тифлиса, выраженіе искренняго соболѣзнованія по поводу горестной утраты, понесенной Вами и всѣмъ грузинскимъ народомъ, въ памяти котораго навсегда сохранится свѣтлый образъ усопшаго старца, святостью жизни и просвѣщенной дѣятельностью своей, пріобрѣвшаго всеобщую любовь и уваженіе.

Поручая себя молитвамъ Вашимъ, имѣю честь быть Вашего Преосвященства покорнѣйшимъ слугой

Кн. В. Чернезпвъ

15 ноября 1907 г. г. Тифлисъ.

რუსულს ენაზედ ასეთი წერილების რამდენიმე წერილი მოუვიდა ყოვლად სამღვდელო ლეონიდს. რომლებიდაც ვბეჭდავთ მხოლოდ ამ წერილს, იგი ეკუთვნის ე. თფილისის თავს თავ. ვ. ჩერქეზიშვილს

---

**ВАШЕ ПРЕОСВЯЩЕНСТВО,**

**МИЛОС'ТИВѢЙШІЙ ОТЕЦЪ И АРХИПАСТЫРЬ!**

У меня есть одно очень цѣнное семейное достояніе, перешедшее ко мнѣ отъ моего покойнаго тестя, Андрея Егоровича Мревлова, а именно-старо-грузинская (кахетинская) литургія Св. Іоанна Златоуста, записанная Мревловымъ линейными нотами еще въ 40-хъ годахъ подъ диктовку и съ голоса славившатося знаніемъ церковно-грузинскаго пѣнія архимандрита Софронія, урожденнаго князя Макаева. Записаны всѣ три голоса; запись очень точная и правильная, и, несомнѣнно, древнѣйшая изъ всѣхъ современныхъ записей, такъ какъ покойный Андрей Егоровичъ былъ первый и въ свое время единственный человекъ изъ грузинъ, основательно знавшій линейныя ноты и умѣвшій притомъ илжно записать любую мелодію. Постоянною его мечтою было издать эту литургію и тѣмъ сохранить ее для потомства, которое, къ сожалѣнію, съ легкой руки свящ. Карбелова (родоначальника нынѣшнихъ Карбеловыхъ,) вноситъ постепенно различныя измѣненія въ коренную грузинскую церковную мелодію, зачастую даже примѣняя къ ней, ей совершенно не свойственный, гармоническій строй западно-европейской музыки. Свою мечту покойный такъ и не успѣлъ осуществить. Нынѣ, съ Божіей помощью, я думаю выполнить это дѣло. Но вмѣстѣ съ тѣмъ при изданіи, въ предисловіи къ нему, мнѣ хотѣлось бы помѣстить нѣкоторыя біографическія свѣдѣнія объ архимандритѣ Софроніи. Я полагаю, что Ваше преосвященство, какъ любитель и знатокъ грузинскаго церковнаго пѣнія и, въ то же время, до некоторой степени, современникъ архимандр. Софронія, можете болѣе точныя біографическія свѣдѣнія сообщить о немъ. Чѣмъ кто-либо другой. А потому я беру на себя смѣлость почтительнѣйше просить Ваше преосвященство не отказать мнѣ, если это возможно, въ указаніяхъ въ настоящемъ случаѣ. Всякое указаніе Вашего Преосвященства объ архим. Софроніи будетъ для меня весьма цѣнно, и я приму его съ глубочайшею благодарностью.

Прося прошенія за доставляемое настоящимъ письмомъ безпокойство, имѣю честь быть Вашего Преосвященства, Милоствѣйшій Отецъ и Архипастырь, покорнѣйшимъ слугою

**Христофоръ Гроздовъ**

Директоръ народныхъ училищъ Тифлисскаго губерніи. Г. Тифлисъ, 16 декабря 1898 г.

## ბ. გრიზდოვის წერილის გამო.

კარბელაშვილებს ასე თუ ისე, მაინც ქართული გალობის შენახვის საქმეში, კარგი ამაგი მიუძღვისთ. მათ ამ გალობის საქმეში თუ რამ ნაკლი აქვსთ, ან რამე ცვლილებას ახდენენ, ესეც უეჭველია ქართული გალობის სავნო არ იქნება. ეს წერილი იბეჭდება მხოლოდ დაუკარგველობისათვის სოფრომ არქიმანდრიტის გალობის ცოდნის და მრევლოვის სანოტო შრომის აღსანიშნავად და არა კარბელაშვილების მიერ დასულ გალობის წინააღმდეგ.

სოფრომ არქიმანდრიტი გვარად მაყაშვილი იყო კახელი თავადის შთამომავალი. ეს არქიმანდრიტი თავის დროს შესანიშნავი პირი ყოფილა, მომზადებული ქართულს მნიშვნობრობაში და მასთან ქართული გალობისაც ზედ მიწევნით მცოდნედ. ასე გალობის მცოდნენი მაშინ სხვანიც იყვნენ, როგორც მაგალითებრ გრიგორევები, ანუ გრიგოლიშვილები, მ. დავითის ეკლესიის მოძღვართა გვარის წევრნი. ხოლო სოფრომ მაყაშვილი უპირატესი ყოფილა სხვებზედ გალობის, ცოდნით.

სოფრომ არქიმანდრიტი შესანიშნავი ყოფილა იმითაც, რომ იგი თურმე სოფელ-სოფელ ხშირად მოგზაურობდა, სოფლის გლეხის ბიჭებსაც კი შეჰყრიდა ერთად თურმე და ქართულ გალობას ასწავლიდა. ამის მაგალითია ის გარემოება, რომ სოფ. მარტყოფის გლეხთა შორის, ქართული გალობა მან რამდენსამე ოჯახს დაასწავლა ზედ-მიწევნით. სოფრომ არქიმანდრიტის გარდაცვალება ეკუთვნის 1859 წ. ცოტა მეტ-ნაკლებ. სხვა რამ ცნობა ჩვენ ამისა არა ვიცით რა. ამის მნახველი, მომსწრე და მის გალობის გავლენის ქვეშ გაზრდილ-განვითარებულია სხვათა შორის, ქართულ ეკლესიის მსახური გიორგი ვასილის ძე ბალიკანიანი. ასე და ამ გვარად, სოფრომ არქიმანდრიტის დროის ქართულ გალობის მცოდნე პირთა ვითარება აქ დღეს ისეა დაიშვიათებული, რაისა გამო უნდა ვსთქვათ მცირეოდენი რამე.

გიორგი ვასილის ძე ბალიკანიანი დღეს ქართველთ შორის არის ერთი მეტად იშვიათ პირთაგანი. ეს პირი გახლავსთ სრული ნიშან წყალი იმ ქართველთ ძველის დროის გონებრივის საზრდოების, როცა ქართველი ძენი სწავლას იძენდენ ქართველთ საკუთარ ხალას ნასწავლ კაცებთაგან, როცა ქართველთ შვილებს ანათლებდა და ამზადებდა ქარ-

თული სკოლა, ქართული ენა, ქართული წიგნი, ქართული გალობა და ქართველი მასწავლებელი.

გიორგი ვასილის ძე ბალიკანიანი სრული საბუთია, ჭეშმარიტი მაგალითი თავის დროის ბრძენ ქართველთ სულიერების და გონებრივის სიძლიერის. მიტომაც გახლავს, რომ ეს პირი კარგად მცოდნეა ქართულის გალობის, ხმაც თითქმის იშვიათი და ერთად ერთი პირი იმ დროების როცა სოფრომ არქიმანდრიტი სცხოვრობდა და მისი გალობის ხმაც გაისმოდა.

დიახ, როგორი მცოდნე გიორგი ვასილისძე ბალიკანიანი, გალობის იშვიათი მცოდნე პირია, ისეთივე გახლავს ქართულ სასულიერო წიგნების კითხვაში და მასთან ხმაც მშვენიერი აქვს, დაბადება მისი ეკუთვნის 1845 წლებს. დღესაც შესანიშნავია მისი გალობა, კითხვა და ხმაც. ყველა ამების დიდი დამფასებელი იყო ყოვლად სამღვდელო ალექსანდრე ეპისკოპოსი და ეს იტყოდა ხოლმე – „გიორგი დიაკვანი შესანიშნავი მცოდნეა გალობის, ქართული კითხვის, იგი ნაყოფია ქართული სკოლის და ქართული გალობის. დიახ, რომ ეს პირი დღეს თითქმის ერთად ერთია.“

ჩვენც მიტომ მოვათავსედ ეს ცნობაც ამ სულ მნათის გვერდით.

ანდრია იაკორის ძე მრევლოვი ყოფილა კარგად მცოდნე ქართულ გალობისა და ნოტების, მას მიუღია სწავლა თფილისის სემენარიაში ხელობით, მგალობელი ყოფილა, უკანასკნელ წლებს იგი მსახურობდა ქუთაისის სასულიერო სასწავლებელში ქართულ და რუსულ გალობის მასწავლებლად, გარდაიცვალა 1880 წლებს. საინტერესოა რომ მისი დაწერილი ნოტების წიგნი არ დაიკარგოს.

## ტელეგრამები

სამგლოვიარო და სამძიმრისა, რომელნიც მოუვიდა ყოვლად სამღვდელო ლეონიდს. ტელეგრამები საქართველოს ყველა ქალაქებიდამ, სასულიერო პირების, ქალაქის გამგეთა, სხვა-და-სხვა თავად-აზნაურთა და უმაღლეს პირთა, მასწავლებელთა და ბევრიც სხვა-და-სხვა შესამჩნევ მოღვაწეთა. ყოველი ტელეგრამა ცხადათ მონიშნებს ღრმა მნუხარებას შესანიშნავი მღვდელ მთავრის დაკარგვაზე. სამნუხაროდ ჩვენ ამ ტელეგრამების აქ ვერ მოვათავსედ. მათი რიცხვი დიდია, მართოდ „ქართული საეთნოგრაფიო საზოგადოების არქივში“ 60 მეტი ტელეგრამა არის შენახული.

## ლექსები

ყოვლად სამღვდელო ალექსანდრეს შესახებ ქებით ლექ-

სები და იამბიკოები ბევრს აქვდათ წინედ ნაწერები. ასეთი ლექსების და იამბიკოების მე თვით მინახავს ყოვლად სამღვდელოსთან. ყოველი ლექსი და იამბიკო განუსაზღვრელის ქება დიდებით მოიხსენებდა ყოვლად სამღვდელოს მამულის შვილობას, ყოვლად სამღვდელოს საქართველოში თვით მდაბიონიკი იცნობდენ კარგათ და აი ეს ორი ლექსიც მონამეა მის, რომელთაც ვბეჭდავთ აქ და რომელნიც დაწერილებია ქართველთ ჩვეულებრივ მდაბიოთაგან.

\* \*  
\*

ყოვლად სამღვდელო ალექსანდრეს აუარებელი წერილები აქვდა სხვა და სხვა პირთაგან მიწერილები, ზოგი ქართულად, ზოგი რუსულად, ასეთი წერილები პირუთვნელად აღნიშვნენ ყოვლად სამღვდელოს ალექსანდრე ეპისკოპოსის ქება-დიდებას. ამიტომ ასეთ ძველის წერილებიდან ჩვენ აქ მოგვყავს ეს ორი ძველი წერილიც, რომელიც არ იქნება მეტი დაბეჭდვისა, თუმცა იგინი წინედ არიან დაწერილები.

### **მაღალ-ყოვლად უსამღვდელოესო დიდებულო მწყემსთ-მთავარო ალექსანდრე!**

თქვენი ხანგრძლივი სამსახური მწყემსთ-მთავარო ის ხარისხში ისრე მძლავრი, ნაყოფიერი და ცხადია, რომ მან მოიცვა თვით მესხეთიც კი, ის მესხეთი, რომელიც ძველი დიდების ნაცვლად ძლივს ნაპერწკალსავით-და ბუუტავს. დიახ, თქვენმა მადლმა განაღვიძა იგიცა, რათა ჩვენ-მიერ მუხლ მოდრეკით ეამბოროს თქვენს წმიდა და ზეციურის მადლით შემოსილს მარჯვენას, მოგილოცოს ამა ხნოვანი სამსახურის შეძლება და შეავდროს ყოველთა არსთა არსებას განგრძელება დღეთა თქვენთა, რათა შეგესრულებინოთ ყოველი თქვენი კეთილი სურვილი და დაწყობილობა,

ჩვენ არ გავბედავთ დასახელებას იმ დიდი მადლისა და სიკეთისას, რომელიც თქვენის დიდ ბუნებოვანების თბილი გულიდგან მოფენილა ხალხთა სულისა და ხორცის საშვებელად. არ ჩამოვთვლით იმითომ, რომ დიდ-ბუნებოვანთა საქმის თქმა ენის წვერით ძნელია; გული უფრო შემძლებელი და მართლიერი მეტყველია და სწორედ ყველასთან ერთად ჩვენი გულიც ღაღადებს თქვენს სიკეთეს და სიკეთილეს. ვიტყვით მხოლოდ, რომ თქვენა ბრძანდებით ტრფიალება ჩვენი, სიქადული ჩვენი და მაგალითი ჭეშმარიტი ქრისტიანისი, ჭეშმარიტი კაცთ-მოყვარესი, ჭეშმარიტი მამულის-

შვილისა

დეკანოზი დიმიტრი ხახუტაშვილი.

ხელს აწერს საბლალოჩინოს 13 მღვდელი,  
ოთხი დიაკონი და 13 მეფსალმუნე.

### **თქვენო ყოვლად უსამღვდელოესობამ მღვდელ- მთავარო ალექსანდრე!**

დღეს, როდესაც მთელი საქართველოს რჩეულთა შვი-  
ლნი გამოუთქმელი სიხარულით და დიდის აღტაცებით მიე-  
გებნენ თქვენს 35 წლის სამღვდელ-მთავარო სამსახურის შე-  
სრულების და ქება დიდებით მოიხსენიეს თქვენი დაუღალავი  
შრომა და ღვაწლი სამშობლოს და მის წმ. ეკკლესიასადმი.  
მეც, ერთი უღირსი შვილი, ვკადნიერდები, თქვენი მეუფე-  
ბის წინაშე და სპარსეთის სამზღვრიდგან, წრფელის გულით  
გილოცავთ, თქვენო მეუფებავ, 35 წლის იუბილეს დღესას-  
წაულს და შევედრი ღმერთს, რათა დღენი თქვენი მეუფო-  
ბისა განამრავლოს ერთი ასად და დიდხანს გჰყოთ დღეგრძე-  
ლი სასიქადულოდ და საიმედოდ საქართველოს წმინდა ეკ-  
კლესიისა და მის მრევლსა. საქართველოს ერი არ დაივინ-  
ყებს თქვენს ღვაწლით შემოსილ სახელს; იგი თავის ისტო-  
რიის ფურცლებზედ ოქროს ასოებით აღბეჭდავს თქვენი მე-  
უფების სახელსა და ღვაწლსა. საუკუნოდ იქნება აგრეთვე  
დაუვინყარი თქვენი სახელი გორის მაზრის ერთ ჰატარა სო-  
ფელ დისევში, თქვენ სამშობლოში, სადაც თქვენ აღიზარ-  
დედ და სადაც თქვენ სთესეთ იმდენი კეთილი. დისელები  
თქვენი მეუფების თვის ტომნი არ დაივინყებენ თქვენს სახელს  
და ღვაწლს ვიდრემდე არ აღიგვება დედამიწის პირიდგან  
თქვენი მეუფებისაგან აღშენებული და განახლებული ძელი  
ჭეშმარიტის ეკკლესია, ვიდრემდის ქორივით თავს დაცქე-  
რის დისევის და კულებითის არე მარეს თქვენის მეოხე-  
ბით და ჩაგონებით განახლებული კულებითს მღვთის მშო-  
ბლის ეკკლესია. ბედნიერი ბრძანდებით თქვენო მეუფებავ,  
რადგან თვენის თვალითვე იხილეთ, რომ ცუდად არ ჩაუე-  
ლია თქვენ განწირულის სულის კვეთებას და თქვენგან გავ-  
ლილი ეკლიანი გზა არ დარჩენილა უკვალოდ და თქვენს  
მოძმებს თქვენის მაგალითად გაადვილებია სვლა თქვენგან  
გავლილი გზაზედ; თქვენ როგორც კეთილი მწინდნავი დღეს-  
ვე ხარობდ, ჩადგან თქვენგან დარგული წიღნები, თქვენვე  
მოისთვლიეთ. – ვეამბორები რა თქვენს კურთხეულ მარჯვე-  
ნას თავდაბლად მოვახსენებ თქვენს მეუფებას, რომ 9 მაის  
ჩემდამო, რწმუნებულ ეკკლესიაში გარდავიხედე სამადლობე-

ლი პარაკლის თქვენი მეუფების ღღეგრძელობისათვის.  
დავრჩები თქვენი მეუფების ლოცვა-კურთხევის მსურ-  
ველი თქვენი ერთგული მორჩილი მონა

მღვდელი ალექსანდრე ტატუნაშვილი

ყოვლად სამღვდლო ალექსანდრე  
ეპისკოპოსი.

მდაბიოთაგან თქმული

მრავალთა შორის კვლავ მოევლინა:  
ტანჯულსა ერსა მადლი ღვთიური.  
უხვად მონყალე ღვანლის და შრომის  
ვით რომ მანანა ნამი ციური.

არ დაუზოგავს ღონე და ძალა,  
ღვთის თაყვანის მცემ ხალხის მთარველი,  
ცას-შეჟი ჰვინა მის სისპეტაკემ  
და ერსა თვისსა საზრდო ყოველი.

დაიდგა ძეგლი, ძეგლი უკვდავი.  
უმანკო ერის სათაყვანები.  
კაცთ სიყვარული და სათნოება,  
ქრისტეს მოძღვრების შესადარები.

სიჭაბუკიდგან მან იღვა ტვირთად,  
ღვთის თაყვან ცემა, ხალხთ სამსახური  
და ასრე განვლო მრავალი წელი:  
არ დასდო ჯვარი მამა-პაპური.

აღზარდა შვილნი ერის მსახურნი,  
გულით მამაცნი, გრძობით სპეტაკნი,  
დაუზარელნი გმირნი მამაცნი  
შესანიშნავნი მხედართ-მხედარნი.

ვერა რა ნაშლის მისგან გაკვალულს,  
მედგრათ გაკაფულს გზას ეკლიანსა,  
ყოვლად სამღვდლო ალექსანდრესას  
უხვად მონყალეს და მადლიანსა.

გიორგი ქიზიყელი.

ყოვლად სამღვდლო ალექსანდრეს

მდაბიოთაგან თქმული

ოცდათექვსმეტს წელს ეწეოდით  
ცხოვრების ხვედრსა,  
შეჰლალადებდით ჩაგრულთ აღდგენას  
თვით ზეციერსა...

იგიც მაღლს გფენდა და გაძლევდა  
ნიჭსა კეთილსა.  
ზე აღადგენდა დღეს დაცემულ  
საქართველოსა.

უშიშრადაც წინ მიუძლოდით  
გულით მხურვალი,  
ვერ გაშინებდით მტრისა ძლევა  
ცრემლში ცურვაი...

და თან მოგდევდნენ სამშობლოს  
გმირთა გმირები,  
არ უდრკებოდნენ მრისხანე მტერს  
ქართველის შვილები.

ჰოი სულ მნათო გადმოგვხედე ბრწყინვალე თვა-  
წინ გაგვიძეხი გზა გვასწავლე სარწმუნოების, ლით,  
ხელში იპყართ ბასრი სიტყვა და წმინდა ჯვარი,  
გამოაღვიძე დიდი ივერი დღეს ცოცხალ მკვდარი...

ხელეჩო და ხერხის ნაცვლათ,  
ხელში ავიღე კალამი,  
ცხოვრებისგან დაჩაგრულმა  
მეტ ვერ გიძღვენი სალამი...

ხელობით ღურგალი იოსებ ნ. სიმონოვი.

წერილები



ყოველად სამღვდელთა ალექსანდრე ეპისკოპოზი როგორი პირ უთენელიც ლაპარაკში გახლდათ, ისეთივე იყო წერილების წერაშიც. როგორც საუბარში ქებასა თუ მღერვაში იყო უკიდურესი ქართველი მამულის შვილი, იგი წერილების წერაშიც იმავე კილოს ემორჩილებოდა. მათის წერილების რამდენიმე მაქვს, უამთა ვითარების წყალობით 1892 წ. შემდეგ ივანი დაკარგე აქა-იქ მგზავრობის გამო. შემჩა ერთი წერილი, საკუთრივ მათის ხელით დანერილი, რომელსაც ვებეჭდავთ აქ მიტომ უფრო, რომ მკითხველმა იცოდეს ამ შესანიშნავ მღვდელ მთავრის სულის ვითარება და ის ცდაც, თუ იგი როგორ დასტრფოდა თავის სამშობლოს და ქართველი ერის დანიწარების და წარმატების საქმეს, აი ესეც წერილი, რომელიც მივიღე ოზურგეთიდან 1882 წ. როცა ყოველად სამღვდელთა ალექსანდრე იქ გურიის ეპარქიას განაგებდა.

### **თქვენო პატიოსნებავ, უფალო ზაქარია ჭიჭინაძე!**

მადლი უფლისა ჩვენისა იესო ქრისტესი იყავნ თქვენზედა. წერილი თქვენნი მივიღე, რაისათვის ფრიად მადლობას გძღვნი, მე დიდად მოხარული ვარ, რომ თქვენ დიდი ღირსებას აძლევთ იმ საქმეთა, რომელთაც მე შევდგომილვარ; ესე იგი, ქართულ ძველი და ახალი მწერლობის აღდგენასა, ეგრეთვე, გალობისა და სხვათა.

ერთი სიტყვით მე შეუდექი ქართული ენისა და ლიტერატურის აღდგენას, და თქვენ ძრიელ კარგათ მიმხვთარ ხართ და აგინონიათ რომ მე ჩვენის სამშობლო ქართულს ენის აღდგომის, დაფუძნების და განვითარების სარბიელზედ გამოვსულვარ. ასპარეზი ესე, ჩემი აზრით და თქვენითათა, ფრიად მშვენიერ და სასარგებლო არს. ქართულის ისტორიის გორიზონტსა ზედა წარწერილ არიან მათი სახელები, რომელნიცა ესეთ წრფელათ იხნოდდენ ქართულის ენისათვის, მაშასადამე ისტორია შენიშნავს ანმყო დროშიდაც იმა პატრიოტთა, რომელთაცა არა დავიწყებით სამშობლო ენა და არიან მოღვაწენი მისთვის.

თქვენ მწერთ და გაზეთშიაც იწერებით, რომ პარტრეტი გიშოვნიათ ქართული ლექსიკონის ავტორისა, საბა სულხან ორბელიანისა, და გსურთ ეს ლექსიკონი, რომელსაც მე ვაბეჭდინებ, გაამშვენიეროთ იმ პარტრეტითა. მე თანახმა ვარ ამაზედ და მადლობასაც გწირამ. მაგრამ, რადგან პარ-

ტრეტის დაბეჭვდა იაფათ არ დაჯდება მაშ ლექსიკონსაც ფა-  
სი უნდა მიემატოს. მე ვაბეჭდვინებ ორს სრულს წიგნად  
ან თუ 2400 წიგნსა. თითო წიგნს უნდა დავასვათ ფასი 2  
მანეთი. და აბა ახლა რადგან მაგ პარტრეტს აბეჭდინებ რაო-  
დენსამე ეგზემპლიარს მაგათი ფასი რაღა დამიჯდება და ლექსი-  
კონი, თითო ეგზემპლიარი, მაშინ როგორ უნდა გავყი-  
დოთ. ამის პასუხი მალე მაცნობე, ამასთანავე მაცნობე რა  
დროისთვის თავდება დაბეჭვდა მაგ ლექსიკონისა, კნიაზ რა-  
ფიელ ერისთავს ჩემთან სიტყვა აქვნდა, რომ ეს ივლისის  
ჩქარა წიგნი მომწერე და მაგ ლექსიკონისა გარემოება მაც-  
ნობე სიმართლითა.

აი ეს არის ეხლა თფილისიდან მომივიდა წერილი, რო-  
მელშიც მწერენ რომ რაფიელ ერისთავს ლექსიკონის ბეჭდვა  
მხოლოდ მესხეთე ასომდინ, ესე იგი, ე მიუყვანიათ. აბა რა ვსთქვა,  
და ახლა საქმით სულ სხვა გამოვიდა. თითო ასოს, თითო და  
ოროლი თვე მოუნდა, აბა მაშ როდის დათავდება მაგ ლექსი-  
კონის ბეჭვდა. ეტყობა რაოდენიმე წელიწადი გასტანს?!

ახლა მე ამას გწერ შენ წერილზედ: შენ ინერებოდი  
დავით გარესჯაში მივდივარო, იქ კარგ წიგნებს ვიშოვნო  
და რომელი დავაბეჭდვინოთ, ხომ ხედავ ლექსიკონს აღარ  
გვითავებენ. მე რომ აქეთ წამოვედი მანდ ყველა გაყინა. და-  
ბეჭდათ ამოვარჩიე ლექსიკონი პეტრინისა, მაგრამ ვიცი კაცი  
ვინ იქნება წრფელი და მართალი რომ მივანდოთ ამის ბეჭ-  
ვდა. კაცი უნდა იყოს სწავლული და პატრიოტი.

ამ წიგნის პასუხი მომწერე.

თქვენი კეთილის მოსურნე. 1882 წელსა მართველი გუ-  
რიის ეპარქიისა ეპისკოპოსი **ალექსანდრე**.

**ქ. ოზურნეთი**

---

## **ალექსანდრე ეპისკოპოზი და მელა ქართველნი**

ყოვლად სამღვდლო ალექსანდრე ეპისკოპოზს ორ ენა  
მღვდელი, ბერი, და ქართველები ძრიელ სძულდა. 1880 წ.  
14 იანვარს, დიმიტრი ბაქრაძის წინაშე ერთი ქართველი  
მღვდლის შესახებ ეს სიტყვა სთქვა:

იოანიკე ეგზარხოსი საქართველოში რომ მოვიდა სიონ-  
ში, პირველ შეხედვის, ერთმა მღვდელმა (გვარი და სახელიც  
სთქვა) სიტყვა უთხრა. წირვის შემდეგ ეგზარხოსმა ჰკითხა:  
მამაო, თქვენი რუსული ენის კილო მე ისე მომეწონა, რომ

მინდა გკითხოთ თუ თქვენ ტომით ვინ ხართ, რუსი, ქართველი, თუ ოსი?... ამ მღვდელმა მიუგო: თქვენო მეუფებავ! მე, სამწუხაროდ ქართველად ვარ დაბადებული, ხოლო სულით წმინდა რუსი ვარ და ხორციით ქართველი... იოანიკე ეგზარხოსი ამაზედ გაკვირდა და იქვე უთხრა: – „შენ, მაგისტანა სიტყვის თქმით, არ უნდა იყო კაი კაცი“. მღვდელს ძრიელ ვნყინა ეს. მერე შეუძვრა დიდის ცდითა.

მის შემდეგ ეს მღვდელი ეგზარხოსს სულ იმას შეჰფიცავდა, რომ ქართველები მძულს, ქართული ენა მეჭავრება, რუსული მიყვარს, რუსულ ენას ვადიდებო.

გავიდა რამდენიმე ხანი. ამ მღვდელს ცოლი მოუკვდა. დასაფლავებაზედ ეგზარხი და მეც მიმინვია, ანდერძის აგების შემდეგ, ამ მღვდელმა ცოლი ქართულად დაიტირა. ეგზარხოსმა ჩუმად წამჩურჩულა: აკი ეგ ამბობდა, რომ ქართული ენა არ მიყვარს, ქართველები მეჭავრებაო, ცოლი ქართულად დაიტირაო.“ მერე ეს მღვდელი კარგად გააცნო ეგზარხს ალექსანდრე ეპისკოპოსმა და მასთან მოახსენა: მე მიყვარს საქართველო, ქართველი ერი, მისი ენა და ისტორია. ეს მე არ მიშლის, რომ მასთანვე მიყვარდეს რუსეთი, რუსეთის ერი, ვიყო მორჩილი და ერთგული რუსის მთავრობის და მასთან მენატრებოდეს რუსეთის ამაღლება, დაწინაურება. ეგზარხოსმა ასეთის გულ ახსნილი ლაპარაკისთვის დიდი მადლობა უთხრა და აქო ქართველი ერი.

### **ალექსანდრე ეპისკოპოზი მონაფეთა წინაშე**

ეგზარხოსი პალატის და რექტორ ნიკოლოზის დროს, თფილისის სემენარიის მონაფენი აღელდენ. მიზეზი ამის მათი ცხოვრების გაუმჯობესობის დავალებას შეეხებოდა, მთელი კვირის განმავლობაში შაგირდები გაფიცულები იყვნენ. ივინი ვერც ეგზარხოსმა დაანყნარა, ვერც რექტორმა, ვერც მთავრობის კაცებმა.

ეგზარხოსის დავალებით დათხოვნით ალექსანდრე ეპისკოპოსი მივიდა სემენარიაში მონაფეებს მოელაპარაკა. მეორე დღეს მონაფეები უკვე დანყნარდნენ და სწავლას შეუდგნენ. ეს ამბავი ჩვენ კარგად ვიცით, ხოლო ის კი არ ვიცით თუ ამ დროს რა ოსტატურად მოიქცა ყოვლად სამღვდელო ალექსანდრე, როგორ დაანყნარა მონაფენი, რა გვარი სიტყვა უთხრა და სხვანი. ისკი ვიცით კარგათ, რომ ყოვლად სამღვდელო ეპისკოპოზს მონაფეთათვის მშვენიერი დარიგება მიუცია, მასთან კაი სიტყვა უთქვამს.

ეს და ამ გვარ საქმენი ყოვლად სამღვდელოს ბევრი აქვს დახარჯული ჩვენს მოსწავლეებზედ. ამის ამბები კარგათ ეხსომებათ იმ პირთ, ვინც მაშინ, შემდეგ და წინედაც სცხოვრობდენ და სწავლობდენ სემენარიაში. მათ ეხსომებათ ბევრი რამ ყოვლად სამღვდელოს მოქმედების შესახებ, აქ

მხოლოდ მოგონება არის საჭირო და დანერა. ამას თუ ყურადღება მიექცა მცოდნე პირთაგან, მაშინ ბევრი რამ ცნობა აინუსხება და გამოქვეყნდება ალექსანდრეს შესახებ, რაც თანამედროვე თავობისთვისაც დიდად მნიშვნელოვნად დაშთება.

## **ალექსანდრე ეპისკოპოსი და ვლადიმერ მიტროპოლიტი**

საქართველოს ეგზარხოს ვლადიმერს მიტროპოლიტობა მისცეს, რუსეთში დანიშნეს. წასვლის დროს ალექსანდრემ მიტროპოლიტს მიულოცა და ეს სიტყვა უთხრა: – „მოგილოცამ მიტროპოლიტის ხარისხს. გაუწყებთ, რომ თქვენ იყავით უბრალო ბერი – მერე ეპისკოპოსი და ეგზარხოსი საქართველოს ეკკლესიისა. საქართველოს ეკლესია იმოდენათ მაღალია, ძველი და მძლავრი, რომის მაღლმა თქვენ თავის ასპარესზედ ასე დაგანინაურად და დღეს მიტროპოლიტის ხარისხით მიბრძანდებით რუსეთს. ეს უმაღლესი ხარისხი თქვენ მოგანიჭათ საქართველოს ძველ ეკკლესიამ და ამიტომ უნდა უმაღლოდე მას და არ დაივიწყო ამ ძველი ეკკლესიის ამაგი.

ეგზარხმა ამაზედ პასუხი მოუგო...

### **ალექსანდრე ეპისკოპოზი და ერთი მასწავლებელი.**

ერთმა ქართველმა მასწავლებელმა ერთი სემენარიელი მონაწე VI კლასის (ვ. დ.) ეგზარხოსთან დააბეზლა ასე: ის მონაწე წინამდევ წიგნებს კითხულობს. გარდა ამის უნახეს დანერილი ქალაქზედ ისიც რომ საქართველო რუსეთმა ჩაყლაპაო. ეგზარხოს უთქომს: მამ აქედან სჩანს, რომ ქართველებს რუსები გძულთო. მასწავლებელს უთქვამს: ეგრე გამოდისო. ამ დროს ალექსანდრე ეპისკოპოსი მეორე ოთახში მჯდარა, ეს ლაპარაკი გაუგია, მაშინათვე შესულა მათთან და უთქვამს.

„მასწავლებლო, სტყუი შენ და ატყუილებ ეგზარხოსაც. ქართველები ჯერ არ გაგიუბულან, რომ თავიანთი მთარველი ქრისტიან რუსები სძულდეს. სირცხვილი შენთვის, რომ ასეთ ჭორებს ლაპარაკობ. წინამდევ წიგნებს რუსეთში რუსები უფრო კითხულობენ, ეს წინამდევი წიგნებიც რომლებსაც აქ ქართველები კითხულობენ, რუსული არის, იგი რუსეთიდან მოდის და არა ქართული. შენ ვერ მიჩვენებ ვერც ერთ ქართველს მონაწეს რომ იმას რუსები სძულდეს. ამიტომ პასუხის მგებელი უნდა იყო წინაშე მღვთისა. ასეთის სიცრუისთვის. ყოვლად სამღვდელო! მე გამოვიძიებ, ყოველივეს მოგახსენებთ საქმის სინამდვილეს, გარემოებას. ხოლო ასეთ პირების ჭორებს კი ნუ დაიჭერებთ. ესენი ამით სარგებლობენ, ანგარიში აქვსთ რამე. ქართველებს რუსები უყვართ და ეყვარებათ კიდევაც, მათ სძულთ ცუდი კაცი როგორც ქართველი, ისევე რუსი და სხვანი. მე წავალ

ეხლავე სემენარიაში და გავიგებ ყოველივეს დანჯრილებით.

## ალექსანდრე ეპისკოპოზი და მეგრული ენა

ყოველად სამღვდელლო ეპისკოპოზი ალექსანდრეს ცხოვრებიდან ბევრი საყურადღებო ამბები და მოგონებანი დაინერება. ასეთ საყურადღებო ცნობები დღეს ჩვენში ბევრს მღვდელს და ბერსაც ეხსომებად, მაგრამ სამწუხაროდ წერით კი არააინა სწერს, ასეთი მოგონებანი ნათელს მოჰქვენს ყოველად სამღვდელლოს ღირსეულს ჭეშმარიტებას და დიდს მამულიშვილობას, იქნება დღეს შემდეგ სხვა და სხვა პირთ მოიგონონ ამის ასეთ ძვირფას მოგონებანი.

1903 წ. როგორც გაზეთებმა გვაუწყეს, საუბარი ატყდა მასზედ, რომ მეგრული ქართველები არ არიანო, მეგრული ენა ქართული ენის ძირი ფესვი არ არისო. ამას ლაპარაკობდნენ თურმე ზოგნი ისეთ ქართველ მეგრულნიც, რომელნიც ქართულ ისტორიის ასპარესზედ მწერლობენ, მოღვაწეობენ, ერთ ასეთ პირს, მაშინდელის ეგზარხოსისათვის სხვა და სხვა ცნობები უამბნია, ეგზარხოსი უტყუილებია ისტორიულის ცნობებით, ეგზარხოსმა საქართველოს ისტორიის არ მცოდნემ ყოველივე სიმტყუნე დაიჭერა, მართლად მიიღო და ამიტომ მთქმელს ჭეშმარიტების აღდგენის გამო მადლობა უთხრა. სისწორისათვის ხარისხიც დაჰპირდა.

მოხდა შემთხვევა, ყოველად სამღვდელლო ეგზარხოსი ფოთში გახლდათ, აქ ქალაქმა სადილი მიართვა, აქვე იყო ის ქართველი მოღვაწე, რომელიც ეგზარხოსს უმტკიცებდა, რომ მეგრული ენა სხვა არისო. როცა ასეთი პირის სადღეგრძელო დალიეს მაშინ მას ალექსანდრე ეპისკოპოსმა ვრცელი ისტორიული სიტყვა უთხრა და მერე ასე დააბოლავა: *Милостивый Государь! Желаю Вамъ быть искреннимъ, не двоедушнымъ, не вилять хвостомъ, изъ за генеральства не продавать родного языка*“, ეგზარხოსმა ალექსანდრე ეპისკოპოსის სიტყვა პატრიოტობაში მიიღო, ამისთვის ეგზარხოს, არც არის გასამტყუნე ამ ენების საქმის არ მცოდნეს ეთქვა, რომ: – *“И дѣйствительно онъ будетъ генераломъ”*. მერე ალექსანდრე ეპისკოპოსმა ეგზარხოსი ისტორიულად დააწმუნა რომ თქვენ გატყუილებენო „მე არა მგონია იყოს ერთი ისეთი მეგრული, რომელიც იტყვის, რომ ის ქართველი არ არისო“.

ასე მკაცრად იცავდა ქართული ენის ძირს – მეგრულს ეპისკოპოსი ალექსანდრე. ამის შესახებ ასეთივე პირუთვნელი გახლდათ ყოველად სამღვდელლო ეპისკოპოსი გრიგოლი-დადიანი რომლის აღწერას და ქართულ მეგრულ კილოკავის ცნობებს ცალკე წიგნად დავბეჭდავთ.

## ალექსანდრეს წინაშე ღიმიტრი ეპისკოპოზი

დიმიტრი ეპისკოპოზი (აბაშიძე) ფოთში დანიშნეს დროებით. ამ დროს ეპისკოპოზი ალექსანდრე ავად გახლდათ. დიმიტრი ეპისკოპოსი ალექსანდრესთან გახდათ ჩამომხტარი, ალექსანდრე ეპისკოპოსი მოკეთდა, ფეხზე დადგა. დიმიტრი ეპისკოპოსთან კაი განწყობილება აქვდა, მამაშვილური. ერთ დღეს ლაპარაკი აქვდათ. ალექსანდრე ეპისკოპოსმა ჰყვედრა ყველა ის ქართველნი, რომელნიც ისტორიულად ჩვენს არ მცნობს რუსეთის მთავრობის უმაღლეს პირებს ხშირად ატყუილებენ და მით სარგებლობენო.

დიმიტრი ეპისკოპოზმა (აბაშიძე) მიუგო: მე თუ ვატყუილებდი, მით ქართველებისათვის ხომ არა დამიშავებია რა, სურვილი მქონდა, რომ ეპისკოპოსობა მალე მიმეღო და ეგზარხს და სინოდს თუ ვატყუილებდი, მით ქართველებს ხომ არაფერი გაგიფუჭდათ. ამ სიტყვებს დიმიტრი ეპისკოპოსი დაჩოქილი ეუბნებოდა და თან პატიობას სთხოვდა. ალექსანდრემ ასე უთხრა მოკლედ.

„კაცი თავის ქვეყნის და ერის წინაშე სიყალბეს არ უნდა ემსახურებოდეს, ხარისხის მიღების გულისთვის, ორ ენა არ უნდა იყოს. შენ, პირველი საქართველოს უპირველესის ოჯახის თავადის შვილის შთამომავალთაგანი ხარ. მერე უნივერსიტეტში სწავლა დაამთავრე, მის შემდეგ აკადემიაში შეხველ და იქაც დაამთავრე სწავლა კაის სახელით, მასთან ბუნებითაც ნიჭიერი კაცი ხარ და რად ყალბობდი, ჩვენს წინაშე რად ლაპარაკობდი ცუდათ, უამსოდაც ხომ მიიღებდი შენ ეპისკოპოსობას. ადე, ღმერთმა გაპატიოს და დღეს შემდეგ ერიდე ორ ენობას და სიყალბეს“

დიმიტრი ეპისკოპოსმა შეჰფიცა, რომ მე რაც მინდოდა, ეპისკოპოსობა მივიღე, დღეს შემდეგ არაფერს ვიქმ წინანდებურსა, ვიქმნები ერთგული და ჭეშმარიტი ადამიანი. ამაზედ სთქვა კვალად ყოვლად სამღვდელო ალექსანდრემ.

„დიმიტრი ეპისკოპოზი ნიჭიერი ეპისკოპოზია, მასთან ჯერ ახალგაზდა. თუ რამ შესცდა, ეს შეიძლება მართლაც თანამდებობის მიღების სულ წასულობით მოუვიდა. ადვილი შესაძლებელია რომ ოდესმე მაგან ეგზარხოსობასაც მიაღწიოს. მასთან შეიძლება ხასიათიც გამოიყვალოს, გაიხსენოს თავისი მშობლის რძე და ძუძუები. საქართველო და მისი ძველი ისტორია, იყოს კეთილი და ერთგული მღვდელ მთავარი თავის სამშობლო ეკლესიის და მასთანვე იყოს მაღიდებელი რუსეთის ბედნიერების და ერთგულების. ეს სულაც არ დაუმლის ერთი მეორეს. შეიძლება დიახ, დიმიტრი ეპისკოპოზი გამოკეთდეს, მობრუნდეს სწორე გზაზედ. ეხლა ვილა რაში უნდა ატყუილოს“.

**ყოვლად სამღვდელო ალექსანდრეს სწულება.**

ჩვენმა ბ. ზაქარია ჭიჭინაძემ, რომელსაც ელექტროგომეოპატიური წამლობის სიკეთე რამოდენჯერმე გამოუცდია

თავის ავთომყოფობაში, რადგან იცოდა, რომ ყ-დ სამღვდელო ეპისკოპოზ ალექსანდრეს 1893 წელს ჩემი მასწავლებელი ექიმი ელექტროგომეოპატი სწამლობდა ჩემის რჩევით და დახმარებით, მთხოვა რაც ვიცოდი განსვენებულის ცხოვრების შესახებ დამეწერა და მეც დიდის სიამოვნებით ვასრულებ.

1893 წელს ყ-დ სამღვდელო ალექსანდრე ბძანდებოდა სვეტი ცხოვლობას ოკტომბერს მცხეთაში, წირვის შემდეგ იქვე ტაძრის გალავანში გაგვიყოლა ბინაზე ბ. რომანოზ დავითისძე მაჭავარიანი, ექიმი და მე, როგორც სიყმაწვილიდან ნაცნობი და ამხანაგი თავის ძმისწულებისა, ან ყ-დ სამღვდ. ლეონიდის, გურია სამეგრელოს მღვდელ მთავრისა და სხვათა. ბინაზე ყ-დ სამღვდელომ საყვედურით მიმართა ბ. ექიმს:

რატომ ქართველი ექიმები არას უშველით, რომ ეს ორი წელიწადია ავთომყოფობას თავი ვერ დავახნიეო?

ყ-დ სამღვდელო დაბძანდა სავარძელზე და მე გამომიშვირა ფეხი: აბა გამიხსენ ერთი, ექიმს უჩვენო. დაშარტული ჰქონდა ბანტებით, ვინრო ტილოს ქარშიკით, კვირისტავიდან კოჭებამდე. შემოვხსენ ტილო და მორგავით დასიებული უნახე. ამისთანა ჩემ დღეში არა მენახა რა. ექიმმა თითები დააჭირა ალაგ ალაგ სიმსივნეზე და თითები შიგ ჯდებოდა სიმსივნეში და თითის ნაალაგრები ჩაჩრუტნული რჩებოდა, როგორც გაუღვივარ ცომში და როდის-როდის ამოიმსებოდა ხოლმე.

ექიმმა მოახსენა: მაგის წამალი არა გვაქს, ვერას გიშველითო და ისევ ისე მჭიდროდ შემომახვევინა ქარშიკი სიმსივნეზე, თორემ სუსტად რომ შემოახვიო, სიმსივნე უფრო განზე გაიწვესო, მეც ისე შევასრულე და გამიკვირდა, თუ როგორ უნდა შეენუხებინა იმ მაგარს დაშარტვას და როგორ იტანდა? იტანდა რის წვალებით ღვთის მსახურების დროს, თითქო ფეხებში ნემსებს სჩხვლეთენო, სულ ირყეოდა ერთი მხრიდან მეორეზე. ამის შემდეგ ძირს ჩამოვედით მე და ექიმი, გალავანში. იქ ახლა მე ვკითხე ექიმს: ნუ თუ მართლა ვერა ეშველებარა მაგას მეთქი? მაგას საჩვენო პირი არა აქვსო, მომიგო მან, – გამკვირვებია აფთიაქში კედლები ირგვლივ სულ სავესეა წამლებით და ლამის ჭერზედაც კი წამლები ჰკიდია და ნუ თუ მაგის სამრგებლო რამე წამალს ვერ გამოჩხრეკო ქართველი ექიმები მეთქი? ეგ ეპისკოპოზი რამ მოგვიკვდეს, ვინლა გვყავს მაგისთანა ქართველებს მეთქი? ექიმმა მაინც იგივე მომიგო რაც ყოვლად სამღვდელოს: მაგის გამოსაბრუნებელი წამალი არა გვაქსო.

ამან ძლიერ დამალონა და დღისით და ღამით დარდში ჩამავლო. თბილისში წაველ და ვნახე ჩემი ახლად გაცნობილი, ბოლოს ჩემი მასწავლებელი ექიმობისა, ვინმე ბერი კაცი ინჟინერ-ზემლეშერი გლებოკოშანსკი და იმას შევჩვილე ყ-დ სამღვდელოს ავთომყოფობა და უკურნელობა. ამ გლე-

ბოკოშანსკიმ მითხრა: თუ გამიგონა და ბეჯითად მოეკიდა ჩემ წამლობას მე მოვარჩენ ყ-დ სამღვდელოსაო.

თუ წამღვილ იმედს იძლევი, მე ურჩევ ყ-დ სამღვდელოს, თავდებადაც დამიდგები და გინამლებინებს და რალა თქმა უნდა, ბეჯითადაც მოექცევა წამლობას მეთქი. თუმცა იმედი ღიდი მამცა ამ კაცმა, მაგრამ მე მაინც ვერ ვენდე, რადგან ვიცოდი, რომ ექიმები ყოველთვის ჰპირდებიან ხოლმე: ვეცდები მოვარჩინოვო და როცა კარგათ მოითბობენ ხელს და ეუბნებიან, რა ვქნა, ღვთის წება არ არის და ვერ მოვარჩინეო.

ამიტომ პეტერბურღში მივმართე ამავე კითხვით ელექტროგომეოპათიის კარაბადინის ავტორს, ვინმე სტეფანე ვლადიმერის ძე სმირნოვს. იმან პასუხი ჩქარა მომცა წერილით 21 ოკტომბრიდან 1893., რომელშიაც მწერდა, რომ ყოვლად სამღვდელომ ესა და ეს წამლები იხმაროს და თუ ბეჯითად მოეკიდა წამლობას, მორჩება უეჭველადაო. ეს წერილი დღესაც მაქვს და ბ. ზ. ჭიჭინაძესაც უჩვენე. მერე ვეახელ ყ-დ სამღვდელო ალექსანდრეს ამ წერილით და ველაპარაკე ყოველივე ზემოთქმული და ვთხოვე, რომ ჩემი წარჩევი კაცისთვის ეწამლებია. ყ-დ სამღვდელომ მისაყვედურა: ხომ ხედავდი, რომ ვწვალობდი, თუ კი ამისთანა იცოდი რამ, რატომ ადრევ არ მითხარიო.

მე მოვახსენე: მე წამალი მაშინ მოგიძებნე, როცა იმ დღეს, სვეტიცხოვლობას, გავეცანი თქვენს ავადმყოფობას მეთქი. მამ კარგო. მიბძანა, ჯერ ექიმი გეგე მაღალლოვი მწამლობსო და იმას გაუსწორდები, მაშინ შენ შეგატყობინებ და მაშინ მამიყვანე შენი ექიმიო და უფრო შენი იმედი მაქვს, აბა ერთგულად მომექეც, მამარჩინეთ და შენც ფულით დაგასაჩუქრებო. მე მოვახსენე: არა ბატონო, მე თქვენი ფული არ მინდა, ჩემი და მთელი საქართველო მის დასაჩუქრება თქვენი სიცოცხლე და კარგა ყოფნა იქნება, მე თქვენი გამოცემული წიგნები მაჩუქეთ, მეტი არა მინდა რა მეთქი და მინამ ლეონიდი (მაშინ ჯერ უბრალო ბერი) მოგესწრობათ, რომ თქვენი ალაგი იმის დარჩეს, მინამ ძალიძალად გაცოცხლებთ მეთქი.

ამის შემდეგ შინ წამოველ გახარებული, რომ ყ-დ სამღვდელო დამთანხმდა წამლობაზე და გლებოკოშანსკისაც შევატყობინე. ღიდი პატივისცემა მქონდა ცხონებულისა და დაახლოვებული ვყვანდი. ყველამ კარგა უწყით, რომ მისი კარი ნიადაგ ღია იყო, ზაფხულშიც სულ თბილისში ბძანდებოდა ხოლმე, ყ-დ სამღვდელო ალექსანდრე ყველას გაუყადრებდა თავს, ემასლაათებოდა, დასომდა სკამზე, ამ მთისას, იმ მთისას ჰკითხავდა და თითონ კი უფრო ბევრს ლაპარაკობდა ამ მთისას თუ იმ მთისას და აღარ აცდიდა, რომ სხვა-საც ეთქო რამე. შემდეგ მცირე ხნისა ყ-დ სამღვდელომ



დამიბარა მე და ჩემი ექიმი. ჩვენც წავედით, მოველაპარაკეთ წამლობაზე. ორი თუმანი გვიბოძა, რადგან მაშინ თბილისში არ იყო გომეოპათიური წამალხანა, პეტერბურლიდან გამოვიწერეთ კარაბადინიც და წამლებიც.

ჩემი ექიმი დაპირდა ყ-დ სამღვდელს სამ თვეში მოგარჩენო. სამთვეში სრულად კი ვერ მოარჩინა, მაგრამ შესამჩნევად კი არგო წამლებმა და ფეხები და წვივები დაუცხრა. ერთხელ ექიმს ჰკითხა; აკი დამპირდი: სამ თვეს მოგარჩენო და შენ კი ეხლა მიუბნები, რომ ჯერ კიდევ განვაგრძო წამლობით მართალიაო მოახსენა მან მე მაშინ მოგატყუე (დაბოლმოდ) საქმე იმ იმედით, რომ რაკი სამ თვეს ჩემ წამლობის გემოს მიიღებდი და სიკეთეს გამოსილ/უდო მერე რალად დაანებებდი წამლობას მინამ მყ ამის ნებას არ მოგცემდიო. მაშინ მე რომ მეთქო: ორი წელიწადი ან ერთი წელიწადი მოუნდები წამლობასაო, გაიძნელებდი, არ იწამლებდი და საქმე წახდებოდაო და ახლა კი მინამ კარგა არ მორჩები, თავს რას დაანებებ წამლობას, ხომ მოგეხსენებათ: სენი ჯანში ფუთობით შედის და მისხლობით გამოდისო და თქვენ ნაირი ავადმყოფის ჩქარა მორჩენა და სისხლის დაწმენდა შეუძლებელიაო.

ყ-დ სამღვდელს ამაზე ბევრი იცინა, მართლა, რომ კაი ხერხია, თორემ ეგრე ხანგრძლივ რომ გეთქო წამლობა, იქნება გამძნელებოდა და ვერ მენამლაო. ამასობაში დადგა მარიამობისთვის მარხვა და ხშირი წირვა-ლოცვით ვიღლებოდი და ვეღარ ვახერხებდი ყ-დ სამღვდელსთან სიარულს და სულ ექიმს მივანაბრე. ამ დროს ფეხები ისევ დასიებოდა და ავადმყოფობა ისევ მობრუნებოდა, მარხვა რომ გავიდა, მე ჩვეულებრივ უნდა დამეწყო სიარული ყ-დ სამღვდელსთან და მივედი ერთ დილას და ჯერ მაქსიმე კელენიკი ვინახულე. მაქსიმემ მითხრა: არ შეხვიდე, თორემ ძალიან გაგლანძლავსო. რათა მეთქი? იმათაო, რომ ვილაც ექიმი მოუყვანე, ვერც არჩენს და არც თავს ანებებსო.

მე გამიკვირდა, აქამდე კარგა მიდიოდა საქმე და ეხლა რა დაემართა მეთქი? მაშინვე გავქანდი გლეხოკოშანსკისთან, რომ მიზეზი კარგა გამეგო. იმანაც მითხრა: „ჯერ მეც მგლის თვალით მიყურებს ყ-დ სამღვდელიო და შენ კი ძან გაგლანძლავს, ჯერ ნუ შეხვალ, მინამ რამე ნაირად არ დავამშვიდებო. ვერ გამიგია: ასე საქმე რად დატრიალდა და ავადმყოფობა რად დაუბრუნდაო. მოვკვდი, გავიშალე, წამლებს ხან ასე ვაძლევ, ხან ისე და ვერა გამინწყვიარაო. ახლა მისი შუშები შინ წამოვიღე, წამალი შინ უნდა გაუკეთო და ჩაუტანო“. სამი დღის შინ გაკეთებული წამალი ჩაეტანა და ისევ ჩქარა შევლებოდა ყ-დ სამღვდელს და სიმსივნეც დასცხრომოდა.

ამის მერე ექიმმა მითხრა: მეოთხე დღეს დილით ჩადი,

წამლები სტოლზე აწყვია, შუშები დაცლილი იქნება და გაუკეთე წამლებიო, მეც ვეახელ იმ დღეს დილით ყ-დ სამღვდელოს. გალანძღვით კი არ გამლანძღა, მაგრამ მისაყვედურა: შენი ეგ იმედი მქონდა რომ ამდენ ხანს აღარა მნახეო? მეც მოუცლელობით ვიმართლე თავი. მერე მაქსიმე კელენიკს დაუძახე: ნადული წყალი მამიტანე, უნდა წამალი გაუკეთო მეთქი. მანაც მამიტანა სავსე ღრაფინკა. მე ვკითხე მას: ეს მტკვრის წყალია მეთქი? – დიახო, მომიგო მაქსიმემ. – შაბით არის დანმენდილი მეთქი? – დიახო, ამაზედაც მომიგო მაქსიმემ. ამაზე მიუბრუნდი ყ-დ სამღვდელოს და საყვედურით მოვახსენე; თქვე დალოცვილო, ასე უყურადღებობით რათ ექცევით თქვენს წამლობას მეთქი? მინამ მე დავდიოდი) მაქსიმეს სულ იმას ვეუბნებოდი: მტკვრის ფაგით დანმენდილი წყალი არ მოუტანო წამლისთვის მეთქი.. მაგასაც ონკანის წყალი მოჰქონდა და მიტომ საქმეც კარგა მიდიოდა მეთქი.

რაკი მე ვეღარ დავდიოდი, მაქსიმესაც ექიმისთვის სულ მტკვრის შაბით დანმენდილი წყალი უძლევია და შაბს წამალი აუჭრია და მიტომ ავადმყოფობა ისევ მოგიბრუნდათ მეთქი! ამ ნაირად თქვენის უყურადღებობით წინაღამ საქმე არ გააფუჭეთ და კინაღამ წამლობა არ მიატოვეთ და მეც წინაღამ არ გამლანძღეთ, რომ არ ჩამომეცადა და აღრე შემოვსულიყავ, მინამ თქვენ შეწუხებული ბძანდებოდით მეთქი. მაზე მაქსიმეს დაუძახა და შეტუქსა. მაქსიმემ თავის მართლება დაიწყო: ერთი ბენო შაბსა ვყრი მღვრიე წყლის დასანმენდად და ის როგორ ასჭრიდა წამალსაო. ყ-დ სამღვდელო კიდე გაუჭავრდა: შე ოხერო, შენ რომ ცოტა შაბსა ჰყრი, ესენიც ცოტა წამალს ჰყრიანო და რატომ არ გაფუჭდებაო? რა გაჭირებაა, ამას იქით თუ არ სარეცხისთვის, მტკვრის წყალი სულ არ იხმარო.

აქ უნდა ვთქვა, რომ გვიან მორჩენა ყ-დ სამღვდელოსი იმისი ბრალიც იყო, რომ: ჩაიში, საჭმელში და დასალევდაც მტკვრის შაბით დანმენდილ წყალსა ხმარობდნენ ხოლმე და მართო წამალში არ ვხმარობდით და ამ შემთხვევის იქით კი უფრო სამუდამოდ მივატოვებინეთ, მაშინ ძნელად დასათმობი, მტკვრის წყალი და საქმეც უკეთ წავიდა წამლობისა, აი, ასე: ზოგი რამენაირად თითონ წახდენს საქმეს, წამლობას მიატოვებს და იტყვის არაფრის ვარგისია ელექტროგომეოპატია, მაგრამ ყ-დ სამღვდელო ასე წინდაუხედავად არ მოიქცა კეთილ გონიერება იხმარა და მინამ ამნაირად საქმე თავის თავად არ გამოირკვა ვერ გავიგეთ, თუ ავადმყოფობის მობრუნების ბრალი რა იყო?

შემდეგ ყ-დ სამღვდელო ისევ ჩქარა მორჩა და დაგვიტკბა. ერთხელ მე მოვახსენე: ბატონო, ყველაფერ სიკეთეს ამჩნევთ თუ არა ამ წამლობისგან? რომ უსათვალაოდაც ჰკვი-

თხულობთ ხანდახან, რაც წინად არ შეგეძლოთ, რომ აღარც აქათ იქით ირყევით და ბოძივით მაგრა სდგებართ მღვთის მსახურების დროს და როცა დაიჩოქებთ, ხელათვე ასდგებით ხოლმე, რაც აქამდე სხვის დაუხმარებლად არ შეგეძლოთ მეთქი. ამაზე მიბრძანა ვგრძნობ ყოველივე ამ საკვირველ ცვლილებასო და შე გიჟო, ეს რაღაც კი წამლობა ჩანს, იქნება არა სწავლობო? მე მოვახსენე: ბატონო, მე მაღარი-ით ვარ ავად, მაგ დაშამათულ ექიმს ვეხვეწები, რომ მასწავლოს, როგორ ვინამლო, მაგრამ არ მასწავლის, თუ გინდა ფული მამე და გინამლებო. მე კი ფულს სწავლებაში ვპირდები, რასაც ჩემი სიღარიბის დაგვარად გადამიკვეთს, ნაწილ ნაწილად გადაუხდი, მაგრამ არ შვრება მეთქი.

ამის გამო ყ-დ სამღვდელლომ სთხოვა იმ ექიმს: „მამა ნიკოლოზი თქვენთან მამაშვილურად არის და რატომ წამლობას არ ასწავლითო, ამით თქვენ რა დაგაკლდებათ, თქვენ ავადმყოფებს არ წაგართმევსო, ასწავლეთ გეთაყვა, რა გინდა შენი სულის გულისთვის ამან სიკეთე ქნას და თითო ოროლა კაცს არგოსო? ისეთი კაცები თქვენთან რომ მოვიდნენ, ვერც თქვენ გაიგებთ იმათსას და ვერც ისინი თქვენსაო, მამა ნიკოლოზი კი გამოადგებათო, ყველაფერს გაუგებთო და ამანვე გაიგო, რომ შაბნყალს ჩემი წამალი უფუჭებია, თქვენ კი ვერ გაიგეთ ამ ორ კვირაშიო და ასე ქართულის ოჯახისას, ქართველის ავ-კარგს ქართველი უფრო ჩქარა და კარგა მიხვდებაო და ექიმიც დაპირდა: ვასწავლი, ისწავლოსო და დამიწყო პრაქტიკაზედ სწავლება. თუმცა წიგნი იმ ექიმის ჩუმად გამოვიწერე პეტერბურლიდან და იმისავე ჩუმათ გავიგე წამლობაში რომელი წიგნითაც ხელმძღვანელობდა, მაგრამ უპრაკტიკოთ ვერათფერი იქნებოდა ჩემი წამლობა და ახლა ყ-დ სამღვდელლოსგან ვარ ბედნიერი, რომ ეს წამლობა სისრულით შევისწავლე. ამის მერე რაც ხანი იცოცხლა, ამ უჭირველად იცოცხლა წამლობის მეოხებით, კურთხეულ იყოს ხსენება მისი. წამლობისა ფულად არა უბოძებია რა და არც მე მითხოვნია, თავის დაბეჭდილ წიგნებს კი ზედწარწერით მსაჩუქრობდა ხოლმე და სამაგიერო ყ-დ სამღვდელლო ლეონიძმა მიწყალობა ჩემი შვილის სწავლის ფული, როცა ვსთხოვე და ჩემი გაჭირება გავაგებინე.

თბილელი მთავარი. **ნ. ოქრომჭედლიშვილი.**

ყოვლადსამღვდელო ალექსანდრე ეპისკოპოსისა  
1822-1907

XI – 9

დასაფლავებულია თვისგან განახლებულს შიო მღვიმის ტაძარში, მარჯვენა მხარეს, ეკკლესიის პირველი სვეტის უკან, რომელსაც აძევს კარგი ქვა შემდეგის წარწერით:

„განისვენე, უფალო, მონასა შენსა, საქართველოს ჭეშმარიტს შვილს და მოღვაწე ბერს, შიო მღვიმის დიდებულის ლავრის აღმაშენებელს, შენს სადიდებელად მას შინა სამუდამო კრებულის დამაარსებელს და მის ნივთიერად უზრუნველ მყოფელს, საკუთარის საფასით ორისავე ტაძრის განმახლებელს და ყოვლის სამკაულით აღმავსებელს, წინამძღვრისა და კრებულისთვის სახლების ამშენებელს, და ლავრის განმამდიდრებელს ვენახებით, ბაღებით, სახნავის მიწებით, წისქვილით, სამუშაო იარაღით და საქონლით, ყოვლად უსამღვდელოეს ალექსანდრეს.“

ყოვლად სამღვდელო ეპისკოპოსის საფლავის მახლობლივ, ცოტა ზემოთ, მარჯვენა მხარეს, ასაფლავია მაქსიმე იესეს ძე ჩიგოგიძე. ყოვლად სამღვდელო ალექსანდრე ეპისკოპოსის ერთგულ მოამაგე მსახური, რომელიც ამავე მონასტერში ბრბოთა თავ დასხმის დროს იქმნა უღვთოდ მოკლული, აი ესეც ამ ერთგული მსახურის საფლავის ქვის წარწერა:

„აქ განისვენებს გვამი ვერაგულად მოკლულის ამა ლავრის საუკეთესოს მორჩილის და ყოვლად უსამღვდელოესის ალექსანდრეს უერთგულესის მსახურის მაქსიმე იესოს ძის ჩიგოგიძის“

1861-1906

## განცხადება

### ეპისკოპოსი გრიგოლ დადიანი

მაქვს სურვილი ცალკე წიგნად გამოვსცე ეპისკოპოზი გრიგოლ დადიანის სიტყვები და მის ცხოვრების ცნობები. თუ ვისმეს რამე მოეპოვებად ვსთხოვთ მათ ეს სიტყვები და ცნობები დროებით გვათხოვონ. ვინც რამეს გადმოგვცემს, ჩვენ ყოველივეს დავსტამბავთ, დაბეჭდვის შემდეგ ყოველივეს ისევ პატრონებს დაუბრუნდებთ.

ადრესი: **ფოთი**, გადასცენ გურია სამეგრელოს ეპისკოპოსს ყოვლად სამღვდელო ლეონიდს.  
**თფილისს**, წერა-კითხვის სამართველოს.

უმთავრესი შეცდომა ამ წიგნში

24 გვ. 1 სტრიქონზე უნდა იყოს ც ი ნ ც ა ძ ე  
3 სტრიქ. უნდა იყოს მ ე უ ფ ე ო .

## განცხადება

### ეპისკოპოსი გრიგოლ დადიანი

მაქვს სურვილი ცალკე წიგნად გამოვსცე ეპისკოპოზი გრიგოლ დადიანის სიტყვები და მის ცხოვრების ცნობები. თუ ვისმეს რამე მოეპოვებად ვსთხოვთ მათ ეს სიტყვები და ცნობები დროებით გვათხოვონ. ვინც რამეს გადმოგვცემს, ჩვენ ყოველივეს დავსტამბავთ, დაბეჭდვის შემდეგ ყოველივეს ისევ პატრონებს დაუბრუნდებთ.

ადრესი: **ფოთი**, გადასცენ გურია სამეგრელოს ეპისკოპოსს ყოვლად სამღვდელო ლეონიდს.  
**თფილისს**, წერა-კითხვის სამართველოს.

სიტყვები და წერილები ფასი 30 კაპ.

ყოვლად-სამღვდელო ალექსანდრე, გამოცემა 1903 წ. 30 კ.